


WANT

NIUSPEPA BILONG YUMI OL PAPUA NIUGINI STRET! - 27 YIA NAU

40 pes Issue Namba 1246 Wik i stat long Fonde Me 14, 1998 50t



• Nupela metal faktori bai kamapim 2000 moa wok - pes 3

• 6 pes Biding na Konstraksen ripot - Stat long pes 11

• KANAGE BILONG DISPELA WIK - Lukim long pes 17

NEKS WIK:
Ful ripot bilong agrikalsa kibung long Goroka

Tupela moa memba joinim gavman sait

Ol sios pret long gavman skul subsidi bai sot

KATOLIK sios long Papua Niugini i pret long lukim olsem mani bilong nesenel gavman i wok long sot long wok bilong edukesen insait long dispela yia. Sios i pret dispela bai kamapim bikipela hevi na ol bagarap long wok bilong skul long 1998.

Sios i raitim pas i go pinis long nesenel Minista bilong Edukesen Muki Taranupi long toksave olsem ol i gat hevi long gavman polisi we ol i mekim ol toktok na ol samting tasol i no kamap gut.

Opis bilong Katolik Bisop Konfrens na ol lida bilong Relijes Kongrigesen long PNG i tok gavman i mekim planti toktok na nius long ol wok na polisi bilong em long skul subsidi. Tasol bikipela samting tru nau em ol skul na planti arapela edukesen opis na banis i painim bikipela hevi tru long mani bikos long baset bilong gavman, ol i no skelim inap mani long ol skul long dispela yia.

Ol i givim piksa olsem nogat inap helpim mani bilong baim Natschol na dispela bai kamapim bikipela hevi tru long ol bikipela skul na koles long pas long namel bilong dispela yia. Na dispela inap kamap wantaim planti bikipela hevi moa sapos gavman i no stretim dispela hevi hariap.

Ol i soim bel hevi bilong ol tu olsem insait long sios Haia Edukesen Institut, namba bilong ol studen ol i kisim i no bihainim namba bilong spes skul i gat. Tasol dispela em plen na laik bilong sios long wok bung wantaim gavman long apim namba bilong spes long ol skul .oa studen.

kim bilong

YAKAM KELO i raitim

GAVMAN bilong Skate na Nali i strong yet wantaim tupela moa memba bilong Oposisen i kalap joinim ol long Trinde aste. Tupela memba em Gavana bilong Madang Jim Kas na memba bilong Manus Charlie Benjamin.

Kalap bilong tupela memba ya i apim namba bilong gavman i go antap moa long 70, presiden bilong PNG Fes Pati, Peter O'Neill i tokaut.

Ol memba husat em ol Minista insait long PNG Fes Pati, Kala Swokim, Ian Ling Stuckey, Dokta Fabian Pok, Peter Arul na Peter Waieng i bin mekim bikipela tok welkam long tupela memba ya long joinim ol.

Mista O'Neill i tok pati bilong ol i gat 36 memba na dispela em bikipela namba tru long wanpela pati insait long gavman. Olsem na ol i ken go het long mekim wok bilong ronim kantri na no ken wari moa long namba na strong bilong gavman.

Gavana bilong Madang Jim Kas i tokaut olsem disisen bilong em long joinim gavman bilong Bill Skate em bikos i pilim olsem em i gat gutpela sapat long hap-sait. Olgeta pren na ol lain em inap wok gut wantaim i stap long gavman sait.



• Long lephan i go long rait em Gavana bilong Madang Jim Kas, Minista bilong Pablik Enteprais Fabian Pok, Presiden bilong PNG Fes Pati Peter O'Neill, Minista bilong Pablik Sevis Ian Ling-Stuckey, Minista bilong Koreksinel Sevises Peter Arul, na Memba bilong Manus Charlie Benjamin. Ol i apim glas long welkamim tupela nupela memba long skruim namba bilong gavman. Foto: Ivan Bayagau.

Em i tokaut olsem em i gat bilip long dispela yangpela gavman aninit long lidasip bilong Bill Skate. Planti bilong ol memba na Minista long gavman sait i winim ileksen long 1997 we, nau em 10-pela mun bilong ol long palamen.

Mista Kas i strongim mov bilong em na tok ol pipel bilong Madang bai kisim gutpela helpim long dispela senis na em i askim ol long stap bihain long dispela gavman long kisim gutpela sevis na ol helpim.

Madang Gavana i askim tu ol arapela memba bilong palamen long joinim gavman bilong Skate long stretim ol wok na hevi we '22 krismas i lus pinis na ol olpela provinsel na nesenel gavman i no bin stretim i kam inap nau.

Memba bilong Manus Charlie Benjamin i tok tu olsem dispela kalap bilong em lusim Oposisen na i go joinim gavman em bihainim laik na tingting bilong ol pipel bilong em long Manus.

i go moa long pes 2

Advertisement for MUTRUS featuring a rugby player and the text: 'MAJOR SPONSA BILONG RAGBY LEAGUE INSAT LONG PAPUA NIUGINI' and 'GOVERNMENT WARNING: SMOKING IS DANGEROUS TO HEALTH'.

PLIS RIPOT

Mosbi:

TRIPLELA yangpela raskol i bin dai long Mosbi siti long dispela wik insait long wanpela sutaut wantaim plis long Faiv Mail Mobil Sevis stesen. Eitpela bilong ol i stap long han bilong plis.

Plis ripot i tok long Mande moning samting olsem 5.30, 11-pela manki i laik go wokim stilpasin long Faiv mail sevis stesen tasol wanpela plis patrol ka i lukim ol na i go bungim ol. Ol manki i stilim pinis ol sampela kaikai na mani long sevis stesen stoa. Insait long pait, plis i bin sutim dai tripela bilong ol na narapela tripela i kisim bagarap taim ol arapela em plis i holim pasim ol na ol i holim ol i stap long plis sel.

Ol raskol em oo miks grup bilong Sentrel, Galp na wanpela bilong Simbu provins.

Taim em i salim tok sori long ol papamama na hauslain bilong ol dai raskol manki, Plis Minista Tom Pelika i tok plis bai go het mekim wok bilong ol aninit long mama lo na givim bikpela mekim save i go long ol dispela lain husat i bihainim rot long stil pasin long lukautim ol yet na ol famili bilong ol.

Mista Pelika i tok planti tok lukaut i go pinis long ol raskol na i luk olsem ol i no laik harim tok.

Em bin tok PNG em i wanpela yangpela kantri na yumi bungim ol kain hevi long sait bilong sosel na ikonomi. Tasol em i tokol yangpela i noken yusim ol dispela olsem eksklus long wokim raskol pasin bilong stil o long ol papamama i salim ol pikinini bilong ol long wokim stilpasin bilong sapotim famili.

Mista Pelika i tok sapos yumi nogat planti raskol pasin, planti wok bai kamap, moa ausait kampani bai i kam insait na bai i gat moa wok long ol manmeri bilong dispela kantri.

Em i apil long ol provinsol gavana na ol papamama long painim sampela gutpela wok aninit long nupela rifom long kantri na kisim ol yangpela bilong ol long wok long wanwan provins bilong ol.

Em i apil tu long ol papamama long sekim gut wokabaut long ol pikinini bilong ol. Em i tok gavman i gat wok long lukautim sefti na sekyuriti long pablik na plis fos em wanpela han we i mekim dispela wok.

Lae, Morobe:

Wanpela kalabus man i wok long ronawe long plis na em i kilim dai wanpela man na bubu bilong em long Lae long disepla wik.

Plis ripot i tok birua i bin kamap long Malahang Industriell senta long Lae long Tunde apinun, bihain ol sekyuriti long wanpela haus kaikai i ringim plis taim ol raskol i laik karimaut stil pasin.

Ol plis i bin go kwiktam na wantaim ol sekyuriti gad, ronim tupela stilman husat i bin sut nabaut long ol man na kilim dai wanpela pikinini bubu meri na bubu bilong em.

Plis i bin holim pasim wanpela bilong ol na i stap nau long plis sel. Tupela lain i dai i bilong Saidor eria insait long Madang provins.

Wewak, Is Sepik:

Plis long Wewak Is Sepik i sanap sambai bihain long killing bilong tupela man long las Fraide.

Plis i bin sutim dai wanpela yangpela man long Mangro kompaun long Sarere nait taim wanpela komyuniti lida i bin katim het bilong wanpela yangpela man long Nuigo setelmen long Fraide nait.

Ripot i tok ol bin kilim yangpela man long Nuigo taim em i laik brukim haus na wokim stil pasin.

Manki long Mangro kompaun em ol plis i bin sutim em taim ol i ronim ol raskol lain husat i bin karimaut stilpasin long taun.

Haus paia na kukim yangpela meri

MATHIAS MALE i raitim

PAIA i kukim wanpela haus long Mosbi las wik Tunde na kukim liklik meri 4-pela kris-mas na planti kago bilong famili kos olsem K4000.

Ol pipel long Gerehu stet 6 na papa bilong haus Mista Pius ol i tok haus ya paia taim em yet na Misis i bin laitim kandel na putim long windoa sait taim em i go silipim tupela liklik meri ya long bet.

Bihain long tupela slip i stap Mista Pius na meri bilong em

go aut sindaun stori wantaim sampela wantok fren long wan haus lain taim paia kirap long haus.

Bikpela 6 yia meri we i slip i stap i kirap singaut na kam ausait long haus taim 4-yia meri silip i stap yet, Mista Pius i tok. Em i tok taim em wantaim meri bilong em na ol poroman i go hariap bilong sevim laip bilong liklik meri ya tasol paia i inapim haus pinis na ol i hat tru long go insait na sevim laip bilong meri na ol sampela kago bilong ol. Planti ol mangi traim long go insait bilong sevim meri ya tasol

strong bilong paia i pusim ol kam bek na i no givim spes long ol," Mista Pius i tok.

Mista Pius na ol ai witnes i tokim Wantok olsem kirap bilong dispela paia ol i bilip strongpela win mas pusim kandel i go daun long matres bikos Mista Pius i laitim kandel na putim antap long windoa sait. Sapos nogat taim kandel i lait go sot na halv kandel i rol antap long kandel weks na go antap long bet na paia kirap o wanpela bilong dispela tupela rot ol i bilip olsem paia i kirap.

Mista Pius tok famili bilong em i lusim laip bilong liklik meri

na ol kago mak moa long K4000 na dispela i kamapim bikpela hevi tru long famili na long komyuniti wantaim.

Dai bodi bilong meri i bin lusim Mosbi long Fonde 8, long wik go pinis na go long asples bilong em long Hagen we ol i bin lusim bodi go daun long graun long ples matmat.

Long dispela taim bilong hevi plis na Sen Jon Ambulens lain kam bung na tokim ol manmeri olsem laitim kandel em i no gutpela pasin bikos planti taim kandel paia save kamapim moa hevi long PNG.



Laki mama! - Dei bilong ol mama i bin kamap las Sande na dispela mama bilong Lapwing Drive, Godens, Blanche Yogomin i bin amamas nogut tru bikos em i winim K100 long makim wanem ol ragbi lig tim long NRL long Ostrelia bai win. Long ol 10-pela pilai em i bin kisim 9-pela rait.

Gavman kisim moa namba

i kam long pes 2

Mista Benjamin i tok Manus i nogat mausman long dispela gavman bikos em yet wantaim Gavana Steven Pokawin i stap long Oposisen sait. Em i tok bai em i sapat na wok klostu yet wantaim Steven Pokawin tasol long sait bilong pait long kisim ol helpim na sevis, em i mas tingim ol pipel na provins long dispela.

Mista Benjamin i tok Manus em wanpela liklik provins na i save kisim liklik helpim i kam long gavman. Olsem na long dispela as, em i laik joinim strong wantaim ol arapela Niugini Ailan memba long gavman nau long ol i ken bung na pait strong long kisim helpim i kam long Manus na rijon bilong ol. Ol Niugini ailan lida long gavman nau em, Benard Vogae Wes Nu Briten Gavana, Peter Arul memba bilong Kendrien, Francis Koimanrea Is Nu Briten Gavana, Alois Koki memba bilong Pomio, Sir Rabbie Namaliu memba bilong Kokopo, Michael Ogio Not Bogenvil, Sam Akotai Sentrel Bogenvil na Ian Ling Stuckey memba bilong Kavieng.

Charlie Benjamin wantaim Bernard Vogae em tupela memba bilong Nesene! Alaens Pati bilong Sir Michael Somare. Tasol tupela i bruk pinis na stap long gavman nau.

Long tok amamas na welkam long tupela memba ya, Minista bilong Pablik Entaprais Dokta Fabian Pok i tok tupela memba ya i wankain memba wantaim ol long nupela pati bilong ol PNG Fes Pati. Nau ol i gat inap namba na ol i no inap wari long namba gem long palamen. Ol i ken go het long wok bilong ol.

Minista bilong ol Haus Kalabus (CIS) Peter Arul i tok amamas tu long tupela memba ya i kam joinim ol. Em i tok olgeta memba long gavman nau em ol poroman na pren long bipo. Olsem na nau bung wantaim bilong ol long wok politik em bai gutpela tasol.

Planti mani paul pinis long gavman opis: ICAC tokaut

YAKAM KELO i raitim

PLANTI mani i bin paul pinis long ol wok na opis bilong gavman long 1993 i kam inap nau, man i go pas long kamapim nupela lo opis bilong ICAC, Peter Donigi i tokaut long las wik.

Mista Donigi i tokaut long namba wan raun bilong ICAC komiti long Mosbi olsem long 1993 Odita ripot long ol wok bilong sampela gavman opis i kam inap nau i soim olsem bikpela mani i bin paul. Tasol nogat man i kisim taim o lo i no kotim wanpela man long dispela.

Mista Donigi i tokaut tu olsem sampela provins tu i gat dispela kain pasin bilong mani na ol samting i paul. Odita ripot long ol provins i soim dispela tasol nogat kot i kamap na nogat man i go long kot.

Mista Donigi i tokaut olsem long wanpela provins, Odita ripot i soim olsem wanpela pablik sevans opisa i no mekim gut wok bilong em na ol rekot bilong mani na ol samting i paul. Tasol taim em i lusim dispela provins na go wok long narapela provinsel gavman, em i kisim promosen na

kamap bikman long nupela wok bilong em.

Lida bilong ICAC i tokaut tu olsem sampela gavman opis i no kamapim gut mani long ol wok bilong ol bikos wok bilong ol i no gutpela long sait bilong baim na kisim takis long ol kago na ol samting. Na tu long sait bilong wokim mani, ol i no wokim gut wok.

Sampela pablik sevans tu i save kisim bikpela pe i go pas long taim bilong ol stret long kisim pa. Ol i kolim edvens pemen. Long wanpela taim, wanpela pablik sevans i kisim K12,700 olsem edvens pemen, Mista Donigi i tok.

Long dispela as, Mista Donigi i tok opis bilong ICAC (Intanesenel Komisen Agens Korapsen) i mas kamap long stapim ol paul na stil pasin i save kamap long kantri na ol opis bilong gavman na ol wokman.

Mista Donigi insait long ripot bilong em long makim grup bilong em, i tok ICAC i mas kamap bikos long ol sosaiti we developmen long sait bilong industri na bikpela bisnis i kamap long senisim laipstail, pasin bilong paulim mani na mekim ol paul o stil pasin long wok i save kamap bikpela tu.

Mista Donigi wanpela biknem loya na pablik sevans woka bilong kantri long bipo i kam, i bin loya bilong olpela ami komanda Jerry Singirok long hevi bilong Sandlain ami long las yia na nau em lida bilong kamapim dispela nupela lo bilong kamapim ICAC opis long wok egensim ol pasin stil na paulim ol samting.

Long dispela namba wan semina, biknem pasto, Pasto Charles Lapa i tok bikpela samting em olgeta manmeri bilong Papua Niugini wantaim ol lida bilong kantri i mas go bek long lotu. Olgeta manmeri i mas save long pasin bilong lotu bai ol i ken gat gutpela tingting na gutpela pasin i ken kamap.

Pasto Lapa i tok olsem gavman bilong Papua Niugini i mas mekim lo bilong Sande. Long Sande, olgeta samting i mas stop na olgeta manmeri i mas go long lotu. Dispela em ol namba wan samting mipela i mas statim pastaim long stretim bel na tingting na pasin bilong man pastaim. Sapos nogat, pasin bilong stil, paulim samting na bagarapim ol samting bai i stap yet, Pasto Lapa i tok.

Insait long dispela namba wan bung bilong ICAC, ol liklik

lain husat i bin kamap long harim tok bilong ol lain i go pas long kamapim ICAC na ol palamentri komiti bilong dispela ICAC kempen i soim olsem ol i wanbel long ICAC opis i mas kamap long mekim-save long ol pasin stil na bagarap we i wok long kamap long ol lida na pablik sevans.

Dispela ripot bilong ICAC bai raun long planti provins long kisim tingting bilong ol manmeri. Bihain bai komiti i go pas long dispela wok, Gavana bilong Isten Hailans provins Peti Lafanama na grup bilong em bai kisim ripot i go bek long palamen.

Palamen bai sindaun na glasim na traim kamapim tingting long mekim ICAC i kamap lo long wok klostu wantaim opis bilong Ombudsmen Komisen na plis fos long ol hevi bilong stil na paulim samting.

Ol palamentri komiti insait long dispela ICAC komiti em, Peti Lafanama, Steven Pokawin Gavana bilong Manus, Andrew Baing memba bilong Makam, Pater Robert Lak Gavana bilong Westen Hailans provins, Peter Ipatas Gavana bilong Sauten Hailans provins na Francis Koimanrea Gavana bilong Is Nu Briten provins.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea



Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and
Group Editor in Chief:
Anna Solomon.

Advertising Manager:
Mike Kanin.

Editor of Wantok:
Leo Wafiwa.

Papers distributed by air
throughout PNG.

Available by air mail
subscription within
Papua New Guinea
and overseas

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

WANTOK

NIUSPEPA BILONG OL PAPUA NIUGINI

Poka masin ken bagarapim famili, we i as bilong olgeta gutpela sosaiti

Dispela wik, Gavana bilong Madang, Jim Kas, i joinim sait bilong gavman, na skruim namba bilong PNG Fes Pati bilong Praim Minista Bill Skate.

Planti pipel bilong Madang, na ol arapela bilong PNG i no kalap nogut long dispela. Ol i wetim tasol dispela long kamap, bihainim kamap bilong Kas long kibung bilong praim minista na laik bilong em long hailans, long stat bilong dispela yia.

Kas i resis long go long dispela kibung, na olsem ol ripot i tok i go insait long sampela egens wantaim sivel aviesen lo, we i stap nau long han bilong kot.

Sapos Kas i mekim gutpela disisen o nogat, em samting bilong em yet.

Tasol dispela wik, em tok strong olsem em bai bringim yet poka masin long Madang, maski ol pipel i egensim.

Em bin tok dispela i gutpela long bringim moa mani i go insait long provins. Na bai gavman i ken yusim long moa developmen wok.

Deputi gavana i sapotim dispela mov na tok, sampela taim gavman ken mekim ol disisen we pipel no laikim. Tasol sapos gavman pilim olsem em gutpela disisen, em ken go het wantaim em, maski pipel egensim. Tupela lida rabisim ol birua em poka masin bai kamapim long laip na sindaun bilong ol famili. Olsem sampela pipel save tok, "em laik bilong wanwan manmeri long pilai".

Em tru. Tasol poka em i olsem huk. Taim em hukim planti manmeri, famili bai kisim taim. Papa o mama bai westim mani. Famili bai nogat kaikai long haus. Em wanpela hevi.

Tingim dispela. Em gutpela long bilding sosaiti wantaim moa mani we as bilong sosaiti, em famili, i bungim hevi bikos long poka, o nogat?

Gutpela famili em i bikpela samting o as bilong olgeta gutpela sosaiti. Sapos famili o as bilong olgeta gutpela sosaiti i bagarap, sosaiti bai gat hevi.



• Koporet Afeas Menesa, Andrew Yaueib, i holim graun i gat nikel na kobat. Na Menesing Dairekta lan Holzberger i lukluk long dispela 'ore'. Foto: Ivan Bayagau

Nupela metal fektori bai kamapim 2000 moa wok

WENCESLAUS MAGUN I raitim

HAILENS Pasifik, wanpela indipenden maining kampani long kantri bai wokim namba wan metal fektori long Madang provins. Dispela projek bai kamapim moa long 2000 wok.

Menesing Dairekta bilong Hailens Pasifik (HP) grup, lan Holzberger na Koporet Afeas Menesa, Andrew Yaueib i tokaut long dispela.

Mista Holzberger i tok dispela em i namba wan taim tru bilong HP long go insait long dispela projek na em i bilip sapos

Nesanel Gavman, Madang Provisnel Gavman na ol papagraun long Krumbukari insait long Bundi na Saidor i wok bung, ol i ken statim wok.

Wanpela wok painim HP i mekim long 1996 bihain long ol i kisim dinau mani long benk i soim olsem ol inap kisim samting olsem 33,000 ton bilong nikel metel na 2,800 ton bilong kobat long wanwan yia. Dispela wok painim bai pinis long dispela yia na sapos ol benk i amamas long en, ol bai givim mani long statim dispela projek long yia 2001. Dispela projek bai wok i go inap klostu 30 yia olgeta o moa.

Mista Yaueib i tok tu olsem

HP bai wokim wanpela bikpela bris long Saidor we ol i gat tingting long wokim taun. Bikpela bilong dispela bris bai winim bris bilong sip long Mosbi na bilong Lae. Ol i gat tingting long mekim dispela bris long wanem HP bai kisim samting olsem 350,000 ton bilong salfa na fiul long arapela kantri na bringim i kam long PNG bilong mekim metel. HP i gat tingting tu long kisim ol laim ston long Saidor na long ol arapela kantri.

Taim wok i stat, HP bai pamim graun malmalum ol i digim long Krumbukari i go daun long Saidor insait long paip we ol bai kamapim nikel, kobat na sol insait long fektori bilong ol.

Frieda Riva pulap long gol na kopa

WANPELA bikpela kopa na gol diposit long wol em Hailans Pasifik (HP) i painim long kantri nau i stap long Frieda Riva. Frieda Riva i stap namel long Is Sepik na Sandaun provins.

Insait long wanpela wok painim HP i mekim long 1996, ol i painim olsem kampani i ken digim klostu 220,000 ton kopa na 330,000 auns gol long wanwan yia. Dispela projek bai i stap inap samting olsem 13 yia olgeta.

Long go het na kamapim ol wok bilong main long Frieda Riva, benk i askim HP long painim ol arapela kampani bilong wok bung wantaim HP long karim aut wok painim we Benk i givim dinau mani long HP long mekim.

Bihainim askim i kam long ol benk we HP i kisim dinau, HP i go het na singautim wanpela bikpela maining kampani, Cyprus Amax bilong Amerika long joinim ol long Frieda Riva kopa/gol projek. Cyprus Amax i putim samting olsem K14 milien long mekim dispela wok painim. Na long dispela yia ol i putim gen K64 milien bilong karim aut narapela progrem bilong dispela projek.

Ol bisop laikim gutpela pasin long famili

OL KATOLIK bisop bilong Papua Niugini (PNG) na Solomon Ailans (SI) i askim olgeta pipel bilong PNG na SI long kamapim, holim pas na strongim ol gutpela pasin insait long famili.

Ol i tok planti ol gutpela pasin tumbuna i lus pinis, na planti taim ol Kristen pasin tu i no stap strong. Kain olsem planti marit i save bruk. Olsem na ol bisop i tokaut long sampela gutpela Kristen pasin we i ken holim famili i stap strong.

Ol i tok laip bilong wan wan memba insait long famili em i dia moa na em i holi. Ol papamama i olsem wanwok bilong God taim ol i kamapim pikinini. Taim laip i stat pinis insait long

bel bilong mama, em i holi, na nogat wanpela papa o mama i gat rait long kilim dispela nupela laip.

Ol bisop i singaut tu i go long ol marit long holim strong promis ol i mekim insait long marit. "Sapos yumi laik bai marit i mas stap gut longpela taim inap wanpela indai, tupela i mas tingim gut na holim strong dispela promis tupela i bin mekim," Ol bisop i tok. Ol i tok, marit i no inap wok nating. Nogat. Tupela i mas wok long dispela.

Long strongim marit ol bisop i askim ol marit long stap gut. Man i no ken aigris, pilai nating o slip wantaim arapela meri na meri tu i no ken mekim dispela

samting long arapela man.

Narapela bikpela samting ol marit i mas mekim em long tok-tok namel long ol yet. Wanpela bikpela hevi ol bisop i tok i save kamap insait long marit em pasin bilong i no toktok wantaim bipo long marit na insait long marit. Dispela i save kamapim ol kainkain hevi.

Moa yet, ol bisop i askim ol marit long stap klostu olsem gutpela pren. Ol i tok tupela marit i ken gro klostu long arapela long planti samting long laip bilong tupela. Dispela i no min pasin bilong 'slip wantaim tasol'. Sapos tupela bodi tasol i bung, na tingting na laik bilong tupela i stop longwe, dispela pasin bilong bodi i

nogat mining bilong en.

Ol i askim ol marit long trastim arapela arapela, long sapotim arapela arapela, na long lukautim pikinini. Ol papamama i gat wok long lukautim gut helt bilong ol pikinini bai ol i ken amamas. Ol i mas tisim ol pikinini long bilip. Namba wan tisa na namba wan katekis long ol pikinini em ol papamama.

Ol bisop i askim ol papamama long skulim ol pikinini long prea. Ol i tok sampela taim papa na mama tupela yet i mas prea. Na ol bisop i askim ol marit long laikim tru arapela poro man o meri olsem ol i laikim ol yet. Ol i tok dispela laik i mas gro tu.

WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
Arapela PNG eria	K52
Ostrelia na Nu Silan	K84 (US\$46)
Esia Pasifik na Japan	K99 (US\$55)
Amerika na Yurop	K172 (US\$95)



Bogenvil nius wantaim VERONICA HATUTASI

Nu Silan givim helpim long Bogenvil

GAVMAN bilong Nu Silan i givim K12.5 milion long helpim Bogenvil long sait bilong edukesen.

Foren Minista Don McKinnon i tok helpim grup bilong Nu Silan, Oxfam na Voluntia Sevis Abrod bai go pas long dispela wok we aninit long en, bai ol i salim 20 tisa na ol arapela samting bilong skul long Bogenvil

Mista McKinnon i tok helpim bai i go long olgeta hap bilong ailan tasol bai i hat long helpim ol lain husat i stap long eria we BRA bos Francis Ona i putim tambu long en. Tasol em i tok

sapos ol NGO grup i laik toktok wantaim Mista Ona long dispela samting, em i orait.


Red Kros long PNG i bin kisim K107,640 long Nu Silan bilong helpim ogenaesen long ol wok bilong em long Bogenvil.

Mista McKinnon taim em i prisenim sekmani i go long siameri bilong PNG Red Kros Janet Philemon i tok Nu Silan i amamas long gutpela wok bilong helpim ol pipel we ogenaesen i mekim long Bogenvil na em bai go het long givim sapot bilong em.

Em bin tok dispela sekmani we

Nu Silan i givim em kontribusen long kantri bilong em bihainim wanpela apil we Intenesenel federesen bilong Red Kresen Sosaiti i bin mekim long imejensi apil bilong helpim Bogenvil.

Mista McKinnon i tok long dispela yia, Red Kros bai kamapim ol progrem long helpim ol famili husat i lusim ol kea senta na i go sindaun long ol liklik ples bilong ol. Ol bai sapotim tu praimer heli kea rihabilitesen, trening long ol helt woka na kaunseling long ol yangpela man husat i bin stap insait long BRA na resistens grup.



• Foren Minista bilong Nu Silan, Don McKinnon.

Kaputin askim ol biknem kantri long helpim

PLANTI yangpela manmeri long Sentrel Bogenvil bai gat sans long kisim liklik wok long helpim lukautim lo na oda olsem plis.

Ripot i tok Ostrelia bai givim K3.3 milien long helpim kirapim Bogenvil plis projek long Arawa insait long sentrel Bogenvil. Dispela h'helpim mani bai kam aninit long helpim grup bilong Ostrelia, em ol kolim long AusAID.

Projek bai helpim long trenim ol yangpela manmeri Bogenvil bilong stap insait long oksileri plis long ailan, we bai lukautim lo na oda na gutpela sindaun long ples, komyuniti na provins.

Bai i gat 500 yangpela manmeri i stap insait long oksileri plis fos bilong Bogenvil. Sampela bilong ol dispela manmeri i stap pinis long Bomana Plis Trening Koles. Na ol bai sindaun long kos insait long 6-pela mun.

Foren Minista bilong Ostrelia taim em i tokaut long helpim we kantri i givim long go hetim wok bilong Bogenvil plis i tok kisim bek lo na oda na plis long lukautim dispela long ailan em i bikpela samting long rot bilong bringim bek gutpela sindaun long ailan.

Aninit long Lincoln agrimen, olgeta grup i bin wanbel olsem ol sekyuriti fos bai i lusim Bogenvil isi isi, taim ailan i gat ol lain plis bilong em yet long lukautim lo, oda na pipel.

Mista Downer i tok trening bilong ol oksileri plis long Arawa bai kisim siksipela wik na Ostrelia na Nu Silan i sapotim. Nu Silan i gat wanpela edvaisa bilong helpim trenim dispela grup. Antap long nomol plis trening, ol yangpela man bai skruim save long stretim ol bel hevi, komyunikesen na wok long stap olsem ol namel man long stretim hevi.

SINGAUT i go long ol bikpela kantri long givim sapot long Bogenvil long rot bilong stretim ples, na ol arapela wok taim ailan i wok long kamap orait.

Palamen Memba i mas PNG gavman na toktok wantaim BRA/BIG, Sir John Kaputin i mekim dispela toktok. Sir John em ko-siaman tu bilong Esia, Karibien, Pasifik/Yuropien Yunien (ACP/EU).

Sir John i bin mekim dispela toktok long bung bilong ACP/EU we ol bin holim long kantri Muaritus. Em i askim strong ol bikpela kantri olsem Yuropien Yunien, Ostrelia, Nu Silan, Japan na Yunaited Stets wantaim tu ol bikpela bodi olsem Wol Beng na Yunaited Nesens long givim helpim long Bogenvil.

Sir John i tok Yunien i singaut tu long kirapim wanpela spesel developmen Bogenvil bilong Bogenvil na long ACP/EU memba kantri long putim mani long en we bai go long helpim grup we i helpim ol wok long

kamapim gutpela sindaun long Bogenvil, nutrel Pis Monitoring Grup (PMG).

Em i tok ol proposol long dispela samting i stap insait long wanpela ripot we ol bin redim bihain long wokabaut bilong asembli i go long Bogenvil long mun Februeri bilong dispela yia. Grup ya i bin go long Bogenvil na Is Nu Briten provins bilong glasim na lukim long ai bilong ol yet ol samting i kamap na givim helpim.

Sir John i tok resolusen we asembli i tok oraitim i autim strongpela laik bilong ol long lukimolsem dispela ol helpim we ol i kisim i mas karim kaikai insait long komyuniti, ples na laip bilong ol long helpim kamapim gutpela sindaun. Na i no wara nating.

Em i singaut long ol memba na dona kantri olsem Yuropien Yunien long givim helpim kwiktaitim long wok bilong stretim ples na ol pipel, moa yet ol yangpela i ken go skul long helpim ol kisim

wok. Asembli i givim bikpela tingting long helpim ikonomi bilong ailan long kamap orait, moa yet agrikalsa sekta na stretim ol rot, bris, skul, tisa trening na helt.

Sir John i tok asembli i givim K6 milion helpim long PNG na em bai salim gen narapela K8 milion na ol i singaut long gavman bilong yusim ol mani long helpim agrikalsa sekta long Bogenvil.

Sir John i tok asembli i askim ol grup long toktok na wanbel long politikol futja bilong Bogenvil.

"Asembli i bilip olsem Bogenvil i no inap kisim ful independens long PNG na bihainim dispela, i gutpela long PNG i givim moa pawa long en," Sir John i tok.

Yunien i sori olsem BRA lida Francis Ona i no wok long stap insait long ol toktok bilong painim gutpela sindaun long Bogenvil na strongpela askim bilong ol em long Mista Ona i go insdait long ol toktok.




Minista Seravo tok taim bilong sapotim ol Bogenvil pipel

OL pipel bilong arapela hap bilong PNG mas sapotim brata susa bilong ol long Bogenvil ailan long dispela taim, Minista bilong Lens, Viviso Seravo, i tok bihain long saining bilong sispai agrimen long ailan. Saining bilong sispai agrimen i bin kamap long ailan long tupela wik i go pinis.

Mista Seravo i tok nau gutpela sindaun i mas kamap. Na dispela em bikpela laik bilong em. Na gutpela luksave i mas kamap namel long ol PNG na Bogenvil ailan pipel.

Em i tok ol pipel bilong Bogenvil i gat longpela na hatpela rot long bihainim long stretim ples na lukim olsem gutpela sindaun i stap na i no bagarap. Em i askim ol pipel long PNG bilong helpim Bogenvil na ol pipel bilong em long dispela rot long kamap



• Viviso Seravo.

orait na stretim ples. Em i tok long 9-pela krismas i go pinis, Bogenvil i bin bungim bikpela hevi, wari, pen na bagarap. Olsem na em i askim strong ol pipel long PNG long givim sapot na nogat moa hevi i kamap gen.

Vanimo haus sik bod rait olgeta

HELT Minista Ludger Mond i givim bikpela tok amamas long bod bilong Vanimo haus sik. Em long mekim gutpela wok na lukim olsem haus sik i sevim gut pipel. Dispela em long gutpela wok ol bin mekim long tripela krismas olgera. Na tok Vanimo haus sik bod em i wanpela long ol "liklik lain" bod husat i mekim gutpela wok long lukautim na lukim olsem ol haus sik i mekim gutpela wok ol i mas mekim. Dispela em long givim nambawan helt sevis i go long pipel.

Minista i tok ol bod bilong wanwan haus sik em nupela samting gavman i kamapim. Na wok bilong ol em long wokim ol lo na rul we haus sik i mas ron olsem wanem. Na tu sem taim em long lukim olsem wok edministresen i ron gut. Minista i tok tu olsem bod i no inap long mekim gut wok sapos pipel i no givim sapos. Dispela em long soim gutpela pasin olsem lukautim propeti o samting bilong haus sik.

Em i tok planti bod i no mekim gut wok. "Maski gavman i tok i nogat mani o i gat mani tasol i no givim, Vanimo haus sik bod i bin go het na mekim gutpela wok stret," em i pinisim tok olsem.

Sampela pipel laikim pait long stap yet, Solomon Ailans PM tok

SAMPELA lain i laikim olsem pait long Bogenvil i go het yet, Praim Minista bilong Solomon Ailans, Bartholomeo Ulufa'alu i tokaut olsem.

Mista Ulufa'alu i tok olsem long dispela wik bihain long sampela samting we ol i bilip olsem i bilong yusim long pait long Bogenvil i lus long ol kontena long bris long Honiara, Solomon Ailan.

Dispela ol samting em ol bin painim long Honiara bris long mun Janueri bilong dispela yia. Na i gat ol samting olsem gan, katres na ol arapela samting bilong pait, we sampela lain i bin salim long ol BRA long Bogenvil. Gavman bilong Solomon Ailan i bin banisim kontena we i gat ol dispela samting long bris. Na long dispela wik, ol i painimaut olsem sampela bilong ol pait samting insait long kontena i lus.

Bihainim dispela samting, Praim Minista Ulufa'alu i tok sampela pipel i laik pulim yet hevi long Bogenvil. Mista Ulufa'alu i tok em bin lukim ol kontena we ol samting i stap long en. Na em i painimaut olsem wanpela trak, lenrova na karavan we ol samting i bin stap long em i empti nau. Em i tok sampela lain i bin draivim trak wantaim ol samting i go aut. Na bihainim lusim ol trak na lenrova bek long bris. Em i tok wanpela sut aut i bin kamap namel long boda eria bilong PNG na kantri bilong em long dispela mun. Na wanpela man, hapkas Bogenvil na Solomon Ailan i go pas long dispela sut aut.

Mista Ulufa'alu i autim dispela toktok bihainim askim long Palamen long pait samting em ripot i tok olpela gavman bilong Solomon Mamaloni i bin odarim. Kos bilong ol dispela samting em K8 milien.

Ol pait samting em ripot i tok Mamaloni gavman i bin odarim i stap aninit long lukaut bilong Ostrelia na Nu Silan gavman.

Poka masin bai go yet long Madang - Kas tok

LEO WAFIWA i raitim

GAVANA bilong Madang, Jim Kas, bai go het yet long bringim poka masin i go insait long provins, maski ol pipel i egensim.

Gavana Kas tokim Wantok logn dispela wik olsem. Em i tok ol pipel i givim em pawa long taim bilong ileksen. Na em i kisim dispela pawa long mekim ol disisen, i no olsem ol Non Gavman Ogenaisesen.

Em i tok i no olgeta taim bai em i mas go bungim ol pipel long kisim ting long wanem kain senis em laik kamapim long provins. Bikos ol

pipel i votim em pinis long makim maus bilong ol.

Deputi Gavana bilong Madang, Bengau Nengo, i tok dispela disisen i no bikpela laik bilong ol Madang pipel. Tasol sampela taim gavman mas mekim disisen we em ting i gutpela long bihain taim, maski ol pipel i no laikim.

Astingting bilong provinsal gavman long mekim dispela em long strongim provins long kisim moa mani. Na kamapim moa developmen. Tupela lida i rabisim ol hevi long sosaiti em poka masin bai bringim.

Wanpela grup i protes egensim dispela muv em ol kolim Madang

Pipel Egens Poka Masin. Grup ya i bin holim bikpela protes long Madang. Na nau ol salim leta i go pas long Praim Minista Bill Skate, Minista bilong Provinsal na Lokol Level Gavman, Simon Kaumi, Minista bilong Jastis na Memba bilong Madang Open, Jacob Wama. Na askim ol long yusim wanem pawa ol i gat long stapim poka masin i go insait long provins, inap wok painimaut i go insait long ol hevi em poka masin ken givim pipel.

Grup i bilip olsem Gavana Kas i no bihainim pasin bilong demokrasi long harim krai bilong ol.

Tupela trabel man ranawe long Vanimo haus kot

FELIX RAMRAM i raitim

PLIS long Vanimo i givim strongpela tok lukaut long ol pipel long taun long no ken haitim ol trabel man.

Provinsal Plis Komanda Edward Kinamon i mekim dispela toktok taim tupela trabel man, husat i wok long wet kot i bin ranawe long Trinde Me 6, ausait tasol long Vanimo haus kot.

Taim plis i kisim tupela i go kamap long haus kot, ol i givim nem bilong tupela olsem Ali Mark na Robert Uteng. Namba tri man em husat i ranawe tu tasol plis i holim em kwik, em plis givim nem bilong em olsem Rex Mark.

PPC i tok tripela wantaim i bin kksim sans long "sut long geit" bilong Vanimo haus kot na ranawe i go ausait taim ol i wetim kot. Tasol wantaim helpim bilong pablik na ol i holimpas wanpela tasol, em long Robert Mark. Na brata bilong em Ali wantaim Robert Uteng i ranawe na stap hait nau.

PPC i givim strongpela tok lukaut olsem ol pipel haitim tupela bai kisim taim. Dispela tok lukaut i go tu long ol pipel bilong setelmen eria, na tu long ol ples klostu long taun olsem Waromo, Vanimo, Yako, Ossol na Ilolo nambis setelmen.

Plis i tok dispela tupela man i stap hait em ol man nogut tru. Na askim olsem husat manmeri i lukim tupela, mas ripot kwik long plis.



Ol PMV bas draiva kisim skul... • Sief Superintended John Maru,

Dairekta Trefik bilong Mosbi plis i toktok long sampela papa na draiva bilong ol PMV bas insait long Jack Pidik Pak long stat bilong dispela mun. Em i skulim ol long we bilong draiv gut we ol i no inap kamapim birua. Ol opisa bilong Lens Trensport divisen i kamap tu long bung ya. Lens Trensport divisen wantaim trefik divisen bilong plis bai wok bung long lukim olsem ol PMV bas i mas sasim tasol 50t long kisim pasindia raun long siti. Foto: Ivan Bayagau.

Ostrelia bai helpim ol famili long haus

OL famili long Bogenvil husat i bin stap insait long kea senta, o ol liklik ples na bin kam aut nau tasol long bus bai kisim helpim wantaim ol samting bilong wokim haus.

Foren Minista bilong Ostrelia, Alexander Downer, i bin tokaut olsem.

Mista Downer i tok gavman bilong em i putim K3,042 milien i go long

Intanesenel Federesen bilong Red Kros (IFRC) long helpim ol pipel bilong Bogenvil long go bek sindaun gut long ol asples bilong ol. IFRC i karimaut wanpela program long helpim ol Bogenvil pipel husat i bin lusim ples long taim bilong hevi i go sindaun bek long ples taim ples i wok long kamap orait. Aninit long program, ol bai givim ol

risetelmen pasesel i go long 700 ples long Bogenvil.


Wanwan pasesel bai i gat long en ol samting olsem tamiok, hama, nel, tep mesa, so, fail, skru draiva na ol arapela moa samting bilong wokim haus long en. Bai i gat long em tu ol samting long yusim long wok gaden long en olsem savol, fok, sarif na bus naip. Mista Downer i tok ol helt

senta na etpos bai kisim ol pasesel wantaim ol marasin na ol helt woka bai kisim trening long skruim save bilong ol. Aninit long program, ol bai stretim wara saplai na ol toilet bilong ol haus sik, helt senta na et pos.

Bai i gat kaunseling long helpim ol pipel husat i bungim hevi long taim bilong trabel.

FIGHT SKIN DISEASE

Unique 3 - in - 1 Action



USE DAILY ON SKIN FOR MORE COMPLETE PROTECTION

Kompensesen askim stapim wok long Mendi Kisenepoi rot

LEO WAFIWA i raitim

WOK bilong stretim Mendi Kisenepoi haiwe long Sauten Hailans i stap nau, bihain long ol papagraun i askim long kompensesen.

Wanpela kampani long Mendi, Global Konstraksen Pty Ltd i wokim dispela

mentenens wok, we i kos K56 milien olgeta.

Bikpela hap bilong dispela mani em gavman bilong Ostrelia i givim. Na liklik hap tasol long mak bilong 5 pesen em PNG gavman i givim. Dispela 5 pesen i bilong baim ol papagraun kompensesen long gaden kaikai bilong ol, em dispela wok mentenens i bagarapim.

Asua nau em gavman i no baim kwik ol papagraun. Mekim na ol papagraun i no amamas. Na stapim wok long go het.

Man i go pas long dispela bikpela rot wok em Peter Biggs. Em i tok dispela wok i kos bikpela mani tru. Na ol papagraun i no amamas bikos gavman i slek long baim kwik dispela liklik kom-

pensesen mani, em ol papagraun i laikim.

Biggs i tok bikpela laik bilong Ostrelia gavman we i stap long ol polisi bilong en em long givim mani long ol lokol kampani o pipel long kain wok olsem. Na long kain pasin olsem, em bai no gutpela long welfea bilong ol pipel na bisnis wok long provins.

Wok long Mendi Kisenepoi rot em las wok bilong joinim Lae na Sauten Hailans provins, we bikpela wok bilong painim wel wantaim gol, kopa na ol arapela minerel i kamap nau. "Olsem na dispela wok long rot em i bikpela long ol bisnis wok bilong Papua Niugini," Biggs i tok.

4-pela bot
bai ketsim
pipel salim
spak brus

VERONICA
HATUTASI i raitim

GAVMAN bilong Ostrelia odarim pinis 4-pela patrol bot long holim pasim ol manmeri i salim spak brus o mariwana namel long solwara bilong em na Papua Niugini.

Bikos nau yet pasin bilong hait na salim spak-brus long PNG i go long Ostrelia i kamap bikpela long boda eria namel long Tores Stret Ailans bilong Ostrelia na Westen provins. Olsem na tupela gavman i wokbung wantaim nau long traim stapim na daunim dispela hevi.

Ol plis na kastoms opisa long tupela kantri i wari bikos ol dispela kain pasi nogut i kamap bikpela. Planti toktok i kamap namel long tupela kantri long traim daunim dispela hevi bilong hait na salim baim ol tambu samting i go antap.

Ol ripot i tok ol dispela patrol bot we Ostrelia i odarim em ol bai yusim long mun Julai.

Ostrelia i tokaut long rot we em i lukim olsem gutpela long traim daunim hevi ya. Ol i laik strongim gutpela wok komyunikesen na yusim foapela kastom bot we bai i sambai redi long givim helpim kwiktai long ansarim dispela kain hevi. Ol patrol bot bai mekim moa wok raun long nait na helikopta bai raun long dispela eria we hevi i save kamap long en.

Minista bilong Kastoms long Ostrelia, Warren Truss, i tok ol bot ya em ol bai stap long 4-pela ples insait long Tores Stret boda olsem Saibai, Mabuiag, Kokonas na Danley Ailan.

Kavieng bai holim 1998 Yunaited Sios bung

WENCESLAUS MAGUN i raitim

YUNAITED Sios long Papua Niugini bai holim anuel Rijinel Edukesen Sekreteris Konferens long Ligga, Kavieng long Sarere Me 23 i go pinis long Sande Me 31.

na 9-pela edukesen seketeri bilong Yunaited Sios rijen insait long kantri bai kamap long dispela bikpela konferens.

Ol bai makim ol lain long Wes, Galp, Taun, Is Papua Bikples, Hailens, Papuan Ailans, Bogenvil, na Nu Briten. Bai gat tupela seketeri, wanpela bai kam long Is na wanpela i kam long West na ol lain bilong Niu Ailan yet i makim wanpela bilong ol.

Progam bilong dispela konferens i soim olsem ol edukesen seketeri bai glasim ol lo o polisi bilong Yunaited Sios Edukesen na tu toktok long wok bung namel long Niu Ailan Provins Gavman na Yunaited Sios long sait bilong edukesen. Ol bai toktok tu long Sande Skul bilong Yunaited Sios.

Insait long dispela konferens ol bai glasim buk wan i go long buk tri ol i wokim long Malumaluan Timal senta we Jenny Charlesworth bilong Yunaited Sios long Australia i wokim.

Bishop Gerson Kapman bilong Niu Ailan Rijin bai go pas long opim dispela konferens na Modereta bilong Yunaited Sios long PNG, Rev. Edea Kidu bai welkamim olgeta seketeri.

Ol sumantin bilong Manggai Hai Skul wantaim ol Umbuk man kwai grup wantaim ol arapela singsing grup bilong Niu Ailan bai kamapim sampela gutpela singsing long dispela bikpela de.



Helpim i kam long taim bilong hevi... • Long taim

bilong bikpela san na ais long PNG, planti hap bilong kantri i sot tru long kaikai. PNG gavman, ol arapela kantri, sios na ol pipel bilong PNG yet i painim kainkain rot bilong helpim ol brata susa i kisim taim. Long Kep ples insait long Turubu long Is Sepik provins, ol pipel i wokim saksak, kisim kulau na salim i go long helpim ol pipel bilong Koil ailan. Pasin ol pipel blong Kep ples i mekim i mas soim yumi rot na opim ai bilong yumi ol pipel bilong PNG long bihainim pasin tumbuna we bipo yumi save senisim kaikai na ol arapela samting wantaim ol pren long arapela ples.

Poto: Gabriel Mollok

Saonu tok Kokoda Trel gat bikpela helpim

WOK developmen long Kokoda Trel bai kirapim ol developmen projek i go daun long ol asples long stretim na helpim na kamapim gutpela sindaun long long laip bilong ol manmeri.

Dispela developmen bilong putim kamap gutpela na nupela komyunikesen sevis long dispela rot namel long Sentrel provins na Oro provins i bikpela developmen tru long ol ovasis lain husat i save kam long wokabaut long dispela Kokoda Trel rot.

Vais Minista bilong Turism, Tred na Industri na memba bilong Kabwum Ginson Saonu i mekim dispela toktok long opim bilong redio komyunikesen netwok long Kokoda Trel long las mun.

Mista Saonu i tok dispela rot o Kokoda Trel em olpela Prait Minista bilong Australia Paul Keating i bin pasim tok pinis long stretim na developim long ol krismas i kam.

Dispela rot o Kokoda Trel i gat nem long taim bilong Wol Woa 2 na long dispela taim ol turis o ovasis manmeri i save laik wokabaut long dispela rot gen long lukim ol samting na pilim dispela rot bilong woa long taim bilong bipo.



• Vais Minista bilong Turism, Tred na Industri Ginson Saonu (lephan) na memba bilong Kairuku Hiri, Moi Avei i wokabaut long opim ol redi netwok long Kokoda trel. Ol Ostrelia ami i bin mekim dispela projek aninit long Ausaid program.

Mista Saonu i tok nau dispela redio komyunikesen sistem i orait, ol turis o ovasis lain i laik wokabaut long Kokoda Trel i ken kisim gutpela helpim long gutpela sevis bilong toktok long ol redio wantaim ol asples lain o ol ples lain wan-

taim ol waitman. Mista Saonu i tok dispela rot, Kokoda Trel i gat bikpela helpim i stap long en. Olsem na taim developmen program bilong em i kamap gut na pinis, bai ol manmeri long Sentrel na Oro provins long dispela hap

rot bai kisim planti helpim. Dispela rot Kokoda Trel i gat nem long PNG na ovasis tu na bai pulim planti turis manmeri long wol i kam long lukim, Mista Saonu i tok.

Memba bilong Kabwum i tok sapos dispela developmen pro-

gram i kamap na go het yet, bai sindaun na laip bilong ol famili i groa gut tu.

Vais Minista i mekim bikpela tok amamas i go long PNG Royel Konstelulari na Australia Difens Difens Fos pesenel long kampa wantaim dispela komyunikesen netwok.

Ol arapela lain memba i tok amamas i go long ol tu em, National Cultural Commission, Koiari Development Authority na ol arapela long sapot na helpim bilong ol.

Long pinisim tok, Vais-Minista Saonu i tok ol kalsa na ol samting bilong bipo i stap long kantri i gat planti i gat planti rot na wei bilong kamapim gutpela helpim na ol trupela wok.

Vais Minista Saonu i go long opim dispela redio komyunikesen netwok long Kokoda Trel rot wantaim ol bikpela man olsem memba bilong Kairuku Hiri Moi Avei, Sentrel Gavana Ted Diro, namba tu plis komisina Sam Inguba, Eksekutiv Dairekta bilong National Cultural Commission, Dokta Jacob Simet na ol bikman bilong Australia ami na PNG plis.

Developmen save stat long ples: Somare tok

BUSTIN ANZU i raitim

DVELOPMEN save state long ol liklik ples na bihain i go long ol bikpela ples na kamapim bikpela developmen. Tasol planti taim gavman i no save lukluk long dispela na helpim "Sir Michael Somare i tok".

Sir Michael Somare i mekim dispela toktok bihain long em i kamap long 25 yia Silva Jubili bilong yangpela didiman aninit long projek bilong ELC-PNG, Lutheran Developmen sevis (LDS) long Malahang lae.


Sir Somare i tok bikpela Papa God i bin blesim yumi we i gat planti ol abus na kaikai long ples. Tasol yumi i no save lukautim na mekim wok. Planti taim yumi save singautim gavman long fri saplai. Dispela i save mekim yumi kamap lesman na meri. Tasol em i tok em i sapotim ol YD long bikpela wok ol i save mekim long kamapim ples. Olsem na em i salutim ol long gutpela wok ol i bin kamapim 25 yia i go pinis.

Em tu i strongim ol na tok YD i ken go het yet long narapela 25 yia long mekim em 50 yias olgeta. "Bikpela samting mi amamas long yupela ol lain bilong holim graun

bilong wanem yupela i no save wet long helpim bilong gavman tasol long yupela yet." Sir Somare i tok.

Long sios tu bikpela helpim save givim long ronim dispela sevis aninit long LDS, YD i kisim ples bilong ekstensen sevis long wanem dispela sevis i dai pinis na wanem wok ol i save wokim em YD i kisim. Em i tok long gavman inap long givim bikpela han long wok bilong ol dispela lain. Ol lida bilong gavman inap tingim ol pipel bilong ol tasol nogat. Em i tok olsem dispela wankain sevis tasol em i laik kamapim long ples bilong em na nau yet mekim sampela luksave i stap. Gavana Luther Wenge tu i mekim wankain toktok long ol gavman mas lukautim ol gut long ol liklik helpim. Em i tok planti taim ol i save stap long strong bilong ol yet. Na nau ol i soim olsem ol i ken stap narapela 25 yia na mekim 50-yia olgeta. Em i tok tu olsem dispela em i piksa we i soim olsem ol bun tru bilong kirapim ples insait long kantri.

Em tu i tokim ol olsem longpela rot ol i kam pinis olsem na ol i mas joinim na i go het yet, ol i noken slek na malolo, nogat. Sir Michael Somare yet i bin opim YD taim em i stat long 1973 taim em i stap Sief Minista.



• Rod Pearce (Lephan) na Alphones Pu, tupela husat i makim PNGFL na Highlands Ragbi lig givim piksa bilong sek moni i go long ol opis bilong NDES.

Hailans ragbi resis givim K58,000 long ol bagarap

YAKAM KELO i raitim

OL manmeri bilong 5-pela hailans provins bai kisim helpim bilong ol marasin saplai i kam long helpim bilong Spear Highlands Heros ragbi lig resis. Man i go pas long dispela Highlands Heros ragbi lig resis Alphonse Pu i tok ol manmeri bilong hailans yet i bin helpim long pulim mani bilong helpim ol yet.

Insait long foapela wik ragbi lig resis, ol i kamapim olsem K58,000 long geit fi. Dispela mani long las wik Fraide, Mista Pu wantaim menesa bilong Will Limited, John Alsbury husat em mesa sponsa bilong dispela tonamen i givim dispela mani i go long bos bilong Nesenel Disasta na Emejensi Sevis (NDES) Ludwig Kembu.

Mista Pu i tok dispela pilai i bin pulim sapot na wanbel bilong olgeta 5-pela hailans gavana long kamapim. Ol gavana i bin sapot bikos dispela em pilai we i sut long helpim gen komyuniti.

Menesa bilong Wills PNG, John Alsbury i tok sponsa bilong ol i go wantaim sapot bilong ol bikos long gutpela plen na tingting bilong

kamapim helpim i go bek long pipel. Dispela tu i helpim ol long redim ol pilai bilong hailans rijen long bikpela ragbi lig resis bilong SP Inta Siti Kap.

Mista Alsbury i tok long rekot bilong ol, geit i bin pulim ol manmeri mak olsem 20,000 olgeta long kamap lukim pilai long foapela wiken bilong pilai ya. Mista Alsbury i tok em i amamas tru long kain pasin na sapot we i kamap na mekim pilai ya i kamap gut na pinis gut. Ol plisman tu i bin mekim gutpela wok tru long stapim ol trabel na bikhet pasin long i no ken kamap.

Gavana bilong Westen Hailans provins, Pater Robert Lak i tok em i amamas long sapotim dispela tonamen bikos olgeta mani na helpim bilong pilai ya bai i go bek long helpim ol pipel husat i kisim bagarap long hevi bilong ais long kantri.

Pater Lak i tok em i gat bikpela sapot long mekim dispela pilai i mas go het yet long neks yia na ol yia bihain. Bikos astingting bilong em i gutpela.

Gavana Lak i tok i gutpela long lukim ol pipel i helpim ol yet long dispela kain rot na em i amamas

long mani bilong dispela pilai bai go long baim ol marasin bilong helpim ol manmer i kisim bagarapim long birua bilong ais na bikpela san long ol hailans rijen.

Man i go pas long dispela pilai, Alphonse Pu i tok dispela yia em namba wan taim ol i kamapim dispela pilai. Tasol long neks yia, bai ol i pulim ol arapela klap long ol wanwan distrik bilong hailans olsem long Gumine, Banj, Tari na ol ples olsem. Dispela em long kisim moa lain i kam long givim sapot wantaim na strongim dispela tingting bilong helpim ol yet wantaim ol kain hevi olsem.

Mista Pu i tok dispela yia em ol i lukluk long baim marasin long ol hevi we i kamap long bagarap bilong ais na biksan. Tasol neks yia, bai ol i lukluk long arapela hevi na bagarap we ol i ken helpim na stretim dispela rot bilong pilai wantaim na pulim mani bilong karimaut helpim wok. Gavana Pater Lak i tok dispela pilai bai i go yet na sapot bilong em bai i stap yet. Em i save tu olsem ol arapela gavana bilong hailans bai givim sapot bilong ol tu na mekim dispela pilai i go het yet long neks yia na ol yia bihain.


Yumi mas kamap gutpela wok boi

VOLUNTIA wokman i tok long yumi mas kamap gutpela wokboi na no ken tingting long ol fri samting olsem ol lesman save tingting na wokim.

Mista Ernest Haab husat i gat 14 krismas na save long wok didiman long ples i tok em i oamamas i go long ol lain husat i no save les na putim olgeta tingting i go long wok bilong ol. "Mipela laikim kain man olsem yupela husat i save tingting tumas long ol wok bilong ol yet long ples. Yupela i namba wan stret. "Haab i tok. Em i mekim dispela singaut long amamasim 25 yia silva jubili bilong YD long Lae las wik Sarere.

Sem taim tu wanpela namba wan instrakta na nau bikman bilong ELC-PNG sios wokman Fan Komandong Karai i tok dispela sevis tu i bringim ol arapela wok olsem sios lida, kaunsila, pasto na tu Bishop. Em i tok i no long save bilong holim graun nogat. Narapela samting em wokabaut skul i bringim developmen i go insait long ol ples na dispela i bringim planti save gen i go long ol pipel. Narapela namba wan motiveta Muinepe Kerra i tok YD i bringim planti save i go long ol ples. Kain sevis bilong lotu na tu ol narapela sevis insait long komyuniti. Em tu i tok planti ol i mas kisim helpim. Nau yet ol i sot long ol motivetas.

Nau yu no nap brasim strong bai yu wasim isi tasol!



NUPELA Pawa Klina. Tok save long ol pren bilong yu.

Wei bilong wasim samting wantaim NUPELA Pawa Klina. Dispela Klina yu save pinis tasol ol i putim mo pawa long detergent. Em i save putim out ol strongpela Pawa bubble long go insait long ol klos na klinim ol gut tru. Yu no nap wok hat bai Pawa bubble i wokim strongpela wok. Mekim de bilong yu isi traim NUPELA Pawa Klina em igat mo Pawa na strong bilong detergent.

Ol studen lukim narakain piksa

VERONICA HATUTASI
i raitim

PLANTI paul tingting i bin kamap long St Peter Chanel Praimeri skul insait long Nesenel Kapitel Distrik (NCD) las wik taim sampela sumatin i guria nating, pun-dan na lukim sampela kain piksa.

Long ol toktok we *Wantok* i kisim, ol mangi i krai o lap,

singsing kalakalap, sampela i toktok long tokples we nogat man i klia long en. Na bihain bodi bilong ol i guria na ol pun-dan. Ol i lukim tu ol kainkain piksa. Sampela i lukim piksa na pes bilong Jisas, mama Maria, angelo na sampela i bin lukim satan.

Wantok i no kisim namba bilong hamas sumatin i pilim dispela samting, tasol ol bos bilong skul i tok planti sumatin i bungim dispela samting na

olsem ol bos bilong skul long NCD i givim tok orait long St Peter Chanel Praimeri skul long salim ol skul pikinini i go long haus long belo taim las Fonde. Long Fraide skul i bin pas olgeta na ol bos bilong skul i bin holim wanpela bung long tok-save long ol papamama long dispela samting na tu kisim tingting bilong ol.

St Peter Chanel Erima em i wanpela Katolik Sios ejensi skul we i gat moa long 700 skul

sumatin long en. Stat long 1996, skul i bin go insait long nupela edukesen rifom na i gat Grets 7 na 8 na tu Elemeteri Prep inap long Gred 6 long lowa level.

Long bung we skul i bin holim las Fraide wantaim ol papamama, Hetmistres Mary Biti i tok ol i no save watpo dispela samting i kamap long skul tasol em i askim ol papamama long stap isi, lukautim gut ol pikinini na givim gutpela stia tok long ol.

Tripela bruda kisim kos bilong helpim ol lain i kisim sik long drag

WOL BENK aninit long lukaut bilong Nesenel Nakotiks Buriu (NNB), i sponsaim tripela Sekred Hat bruda i go kisim skul bilong skulim ol lain spak brus na ol arapela drag i bagarapim laip bilong ol.

Bruda Michael Kai wantaim Bruda Andrew Singer bilong Kairiru Ailan long Is Sepik na Bruda Lazarus Pung bilong Hagen i go kisim tupela mun kos long Hap We Haus - Pertapis, Singapo. Ol i kisim skul long kos ol i kolim Terapiutik Komyuniti (TC). Dispela kos i stat long Mas 4 i go pinis long Me 4 long dispela yia. Ol bruda i tok, dispela em i namba wan taim tru bilong ol long PNG i go long kisim kain skul long Singapo.

Astingting bilong dispela kos, em long helpim ol lain husat i kisim spak brus na ol arapela drag na i bagarapim laip bilong ol bai ol i ken painim rot bilong helpim ol yet.

TC kos i sut i go long helpim ol pipel long glasim laip bilong ol yet, painim wanem hevi tru i mekim na i suvim ol i go long kisim ol drag olsem spak brus o mariwana, dring bia, smok na ol arapela drag, na helpim ol long helpim ol yet long painim wanem kain pasin ol i mas mekim long laikim ol yet, na lusim pasin bilong kisim ol dispela drag.

Long Papua Niugini, i nogat wanpela senta bilong TC i stap. Ol bruda i tok, i tru ol i gat bois taun long Wewak, long Is Sepik, Hohola rimand senta long Mosbi, Nesenel Kapitel Distrik na long Erapp long Morobe provins, skul bilong TC ol i lainim long Singapo em i nupela kos tru we i no stap insait long program bilong ol. Olsem na ol i gat laik long statim skul bilong TC stret long PNG. Nau yet, bikos ol Sakred Hat bruda i nogat mani bilong kamapim kain skul olsem, ol i tingting long bringim skul bilong TC i go insait long wanem program ol i kamapim pinis long Wewak, Erapp na Hohola.

Tasol ol bruda i singaut strong tru i go long gavman long kamapim TC. Ol i laikim gavman i kamapim TC long helpim ol lain i go long kalabus taim ol i brukim lo bilong kisim drag. Dispela ol lain lo i kalabusim ol aninit long pasin bilong kisim drag i noken bung wantaim ol arapela lain i brukim ol arapela lo. Long bilip bilong ol bruda, TC em i wanpela gutpela kos tru we inap stopim na helpim ol mangi drag i paulim het bilong ol pinis.

Moa yet, ol bruda i askim tu gavman long salim ol wokman bilong Woda o Koreksinel Institut Seives (CIS), i go kisim kos bilong TC na kamapim TC skul insait long ol haus kalabus long PNG. Ol i singaut tu i go long gavman long kamapim TC na riabilitesen senta bilong ol meri yet bai ol meri i kisim gutpela skul long lusim pasin bilong kisim ol drag.

Long wankain taim ol bruda i askim ol non-gavman ogenaisesen, ol Sios, ol gavman bodi na husat ol wanwan manmeri o grup long kantri husat i gat laik long helpim wok bilong stopim pasin bilong kisim drag long wok bung wantaim NNB. Ol i bilip NNB i ken salim husat ol lain i gat laik long go kisim TC kos sapos ol i aplai long en.

Bikpela lotu bilong tingim 25 yia bilong Holi Spirit bai kamap

WENCESLAUS MAGUN
i raitim

ASBISOP Brain Barnes, na tupela arapela bisop wantaim samting olsem 50 pater bai go pas long mekim misa long Sir John Guise stadium long Mosbi long Me 31, long 8 kilok long moning bilong tingim jubili yia bilong Holi Spirit.

Ol bisop bai givim sakramen bilong Kopirmasio tu long dispela Pentekos Sande i go long moa long 700 pikinini long olgeta peris insait long Mosbi asdaiosis.

Ol komiti i go pas long redim program bilong dispela bikpela jubili selebresen i askim olgeta Katolik insait long Mosbi asdaiosis long kam bung wantaim long dispela bikpela de na selebretim jubili yia bilong Holi Spirit.

Komiti Siaman, Pater Rodrigo i tok, program bai stat long 8 kilok long moning wantaim prea na singsing. Ol Katolik yut bilong Mosbi asdaiosis bai go pas long dispela. Pater Rodrigo i askim ol Katolik na ol arapela Kristen brata na susa long kam joinim ol yut long singsing na lotuim God triwan.

Bikpela misa bai stat long 9 kilok long moning. Long helpim ol Katolik bilong wanwan peris long go bung wantaim long peris bilong ol, Pater Rodrigo i tok, bai i gat pilag bilong wanwan peris. Olsem

ol lain long St Mary's katridrel i mas go bung long hap we yelo pilag i stap. Dispela bai mekim isi long ol pater bilong ol dispela peris long givim komyunio na tu bilong ol Katolik long bung wantaim long gutpela pasin na selebretim dispela bikpela pestode.

Long redim yumi long dispela pestode, Pater Rodrigo i tok, wanwan peris insait long asdaiosis i askim ol Katolik bilong wanwan peris long bung na beten Novena o prea i go long askim Holi Spirit i kam daun na blesim ol Katolik bai ol i ken selebretim gut dispela bikpela pestode. Dispela Novena bai stat long Fraide Me 22 na i go pinis long Sarere Me 30.

Pop John Paul II i singautim olgeta Katolik long selebretim bikpela Jubili yia 2000 long tingim taim Santu Maria i karim Jisas i kam inap long yia 2000.

I gat tripela hap bilong dispela bikpela Jubili selebresen. Long 1997, Pop i dediketim dispela yia i go long tingim Jisas Kraus. Long 1998, Pop i dediketim dispela yia i go long tingim Holi Spirit na long yia 1999 Pop i dediketim i go long tingim God Papa. Long yia 2000, Pop i dediketim dispela yia i go long God Triwan.

Ol Katolik long olgeta hap bilong graun i stat pinis long selebretim dispela ol jubili yia stat long 1997 i kam inap long dispela yia na bai go het long selebretim long 1999 i go inap long yia 2000.



• **Piksa bilong Jisas Kraus olsem wanpela man bilong Bogenvil na Holi spirit i helpim ol pipel bilong Bogenvil long painim bel isi. Sista Sarah CSJ i droim long tingim Bogenvil Sinod long 1987. Foto: R Koller**

SAMPELA taim yumi lukim wanpela liklik boi o meri i wok long pilai na tu em i wok long toktok wantaim em yet. Yumi lukim na harim na yumi lap. Tasol yumi bikpela manmeri yumi tu i save toktok wantaim yumi yet. Na em i no kranki samting o longlong samting. Nogat. Em i lo bilong yumi.

Sampela taim yumi save toktok olsem long yumi yet. "Em nau! Yu bin mekim gut!" O yumi save tok olsem: "Dispela wok bilong yu i no stret." O yumi save harim kain tok stia olsem. "Yu mas putim gut yau. Yu mas senisim dispela kain pasin. Yu rong!" Sampela taim yumi save harim wanpela tok insait i go olsem. "Mi bin mekim nogut long em." Mi belhat kwiktai taim tumas na givim ansa." Mi sori. "Mi mas tenkyu long em."

Sampela yumi i save toktok wantaim yumi yet long taim yumi gat kros o yumi belhat long narapela man/meri. Na yumi save singaut nogut tru long taim yumi paitim pinga long hama. O sampela taim we yumi kros nogut tru long wanpela samting o wanpela

Mi toktok wantaim mi yet

TU MINIT TINGTING

manmeri. Dispela pasin i no gat rong bilong en, nogat. Maus i pairap nau bel bilong yumi i kol liklik. Em i olsem wanpela marasin.

I gat narapela kain pasin bilong toktok wantaim yumi yet. Em hia: long taim yumi belhat tru long wanpela man o meri o samting, orait, yumi mas sindaun na raitim daun long pepa olgeta tok kros na tingting kros bilong yumi long dispela samting. Raitim i go i go inap bel i kol gen. Orait, nau yu ritim dispela tok kros bilong yu; ritim pinis, orait, nau yu ken tromoim i go. Yu no ken salim i go long narapela man o meri, nogat. Dispela rait bilong yu i bin mekim kot bilong yu; olsem nes i save katim buk i solap long han bilong yu, na nau olgeta susu nogut i kam ausait na nau em inap drai gen.

God yet i save bosim ol tok insait bilong yumi. Long dispela

we em i save stiaim laip na wok-about na sindaun bilong yumi. God i no larim yumi stap nating long dispela graun. Nogat. Em i no larim yumi wan wan i painim rot i go long heven. Nogat. Em i sambai long helpim yumi. Em i stap insait long yumi na i stiaim yumi.

Yumi olsem wanpela liklik balus. Ating yumi bin lukim olsem: long taim pailot i statim ensin bilong balus pinis, nau em i karamapim yau long tupela liklik spika, na em i toktok wantaim man i stap insait long tawa bilong ples balus. Many ya i save bosim olgeta balus bai tupela balus i no ken bam. Bipo pailot i tekov, em i save toktok wantaim man long tawa. Toktok pinis, nau em i flai i go antap long mekim wok bilong em.

Yumi tu i mas wankain. Long moningtaim, bipo yumi go long wok bilong yumi, yumi mas putim



FRANK MIHALIC i raitim

yau long tok insait i laik stiaim yumi long dispela de. Yumi mas sarap na wet tupela o tripela minit tasol, na bai tok save bilong Bikman i kamap.

Harim! Nau tasol long taim yu ritim dispela hap tok, long win nabaut long yu i gat olkain tok i flai i go i kam long redio o tele-

visen o wailles. Yumi no save lukim o harim ol dispela tok; tasol ol i stap. Yu opim redio o telipon o televisen bilong yu na bai yu painimaut olsem: dispela i tru.

Oltaim oltaim God i wok long toktok o tok save wantaim yumi long kain kain rot long tok stia bilong man/meri nabaut, long skul bilong tisa, long eksampel bilong ol manmeri nabaut, long ol pes bilong niuspepa, long ol pes bilong Baibel, long ol tok bilong redio, long ol piksa bilong televisen.

Tasol nogut yumi slip na ol dispela tok stia na tok save i go pas nating long ai na yau na tingting bilong yumi. Em i no kostim yumi wanpela toea; em i presen bilong God husat i laik stiaim laip bilong yumi.

Sapos yumi aipas na yaupas na mauspas bai yumi belpas tu. Bai em i asua bilong yumi stret. Long wanem, God i laik helpim yumi na yumi no laik. Yumi mas opim redio bilong laip bilong yumi bai ol gutpela samting i ken kamap long han bilong God.

Stap gut long haus

Dispela em namba 6 hap bilong ol ripot o tokskul i kam long Konsuma Afeas Kaunsil (CAC), husat i lukautim rait bilong ol konsuma. Wanwan hap bilong dispela tokskul em Wantok bai prinim long olgeta wik long dispela pes, we bai helpim ol konsuma.

Ol rot long stopim birua long kamap long haus

HAMASPELA taim ol man i save tokim yu long noken simuk taim yu silip o taim ai bilong yu i laik silip, o noken yusim planti samting long pawa o putim ol marasin longwe long ol pikinini.

Yu bai ting olsem, ol dispela samting em yu save pinis tasol planti manmeri, pikinini i save painim bagarap o dai taim ol painim birua insait long haus.

Wanpela pikinini i pulim laplap bilong tebol na kapsaitim kap ti o kofi antap long em yet oa wanpela pikinini i putim nidel i go insait long pawapoint o lapun meri i pundaun insait long ples bilong waswas na brukim lek bilong em. Dispela em sampela bilong ol kain birua i save kamap long haus taim yumi i no save wari tumas long ol.

Yumi bambai lukluk long sampela bilong ol dispela

samting we i ken kamapim birua insait long haus.

Pundaun

- Yu noken larim ol liklik pikinini i pilai antap long ol dabol bed o bed i gat antap na tamblo, nogut ol i pundaun. Yu mas sekim ol banis arere long ol dispela bed sapos ol i stap strong.

- Long stopim ol pikinini na ol bikpela manmeri na pikinini bilong pundaun, yu mas sensim ol floa mat, o carpet sapos ol i bruk. Yu noken putim mat long tamblo bilong ol lata o ples i wel. Yu mas klinim na draim ol samting i kapsait long floa hariap nogut ol man i pundaun.

- Yu mas wokim banis long antap na tamblo bilong ol lata. Yu mas putim lait long lata na noken lusim ol narapela samting long lata nogut ol man i bamim na pundaun

- Yu no ken lusim bebi long ol baouncing net antap long tebeol o ol kaunter.

- Yu mas putim lok long ol windoa, o wokim gut ol wnoa wantaim waia inap long stopim ol pikinini long pundaun i go outsait. Pasin doa i go aut long verenda olgeta taim sapos yu gat ol liklik pikinini.

- Sapos yu gat bathrum yu mas klinim olgeta taim, olsem bai em i no inap wel oa yu mas putim raba mat insait long ples waswas long stopim yu long pundaun.

- Sapos yu yusim ol longpela sia bilong ol pikinini long sindaunim ol pikinini yu mas pasim ol long ol rop bilong dispela kain sia.

Paia

- Yu noken simuk taim yu silip long bed o taim ai bilong yu silip.

- Yu noken larim ol liklik pikinini i pilai wantaim masis o faia.

- Yu mas stap klostu long stov o ples bilong kukim kaikai sapos yu wok long kuk. Yu mas lukaut gut long ol oil o gris i no ken kapsait i go insait long stov o paia nogut paia i kirap i go bikpela. Yu mas klinim grease lon gol stov gut.

- Sapos yu yusim kendel, yu mas mekim dai pastaim long yu go silip.

- Sapos yu yusim liklik lam na colman lam yu mas sekim gut sapos ol dispela lam i wok gut. Na tu yu mas sanapim o hangamapim long longwe long ol samting olsem laplap, pepa, taunam na ol narapela samting inap long kisim paia kwik.

Pawa holim man

- Yu mas baim plastic karamap long karamapim ol pawa point sapos yu

gat ol liklik pikinini, nogut ol i putim ol samting i go insait long pawa point.

- Sapos yu gat ol liklik lait we i gat karamap long em na i nogat glob i stap long en, yu noken plagim i go long pawa point na larim i stap nogut ol pikinini i putim pawa on na putim han i go insait long hap bilong glo na pawa holim ol.

- Yu no ken yusim planti pawa tumas long haus. Sapos yu no nidim sampela samting, pasim pawa long ol.

- Yu no ken holim ol pawa point o pasim ol switch oa holim ol samting i wok long pawa sapos han bilong yu i wet.

- Yu no ken draim ol kolos long ol pawa lain.

- Yu noken traim long fiksिम ol pawa point o ol narapela samting i wok long pawa sapos yu nogat save long dispela wok.

Moa neks wik



COFFEE INDUSTRY CORPORATION LTD INDUSTRY AFFAIRS DIVISION

PRAIS LONG WANWAN WIK

*Average prices (t/kg) as at:	11/05/98	Range	04/05/98 Apr -98	
ARABICA:				
Green Bean (DIS LAE)	Y1 391	375 to 400	389	400
	Y2 NQ	NQ	NQ	NQ
	X 419	410 to 440	420	428
	A 438	420 to 470	443	452
Parchment (Factory Door)	Class 1 280	230 to 310	277	272
	Class 2 263	200 to 290	253	261
	Class 3 253	180 to 275	239	246
Cherry (Factory Door)	59	55 to 60	58	60
ROBUSTA:				
Green Bean	290	-to 285	285	249
Parchment	143	120 to 160	137	134
Cherry (Indicative)	42		40	41
NEW YORK "C" CLOSING 08/05/98				
Other Mild Arabicas				
US cents/lb	127.45		126.95	144.00
1 Kina = US\$.493		.493	.497
Toea/kg:-				
Without discount/premium	569.64		567.70	638.51
With discount of 4c/lb	552.05		549.81	623.88
Y-grade Gross f.o.b. Lae *(1)	552.05		549.81	623.88
Levy on (1)	(2) 91.00		91.00	120.00
Y-grade (Net f.o.b. Lae) (1-2)	461.05		458.81	503.88
* Indicative				

MAKET TOKTOK

Long Niu Yok las wik Kopi 'fiusa' prais bilong mun Julai i no senis tumas. Pastaim i go antap US\$0.05, na bhaini i go daun gen wankain, long wanem wanpela bikpela kopi treda i bin tok, i luk olsem bai olgeta kopi long wol bai i moa long nid bilong husat ol i laikim kopi. Orait, sapos i olsem, bhaintaim prais bilong kopi bai go daun.

Long PNG, long wik i go pinis olgeta prais i no senis tumas, na prais long ol faktori dua i gutpela liklik long wanem i gat bikpela resis namel long ol baia.

Ol prais bilong FOB em i as tru bilong prais bilong 'fiusa' prais wantaim ekseins reit i bung na mekim prais FOB, prais long wanwan ekspota i no wankain.

PRAIS LONG OL FAKTORI DOA (t/kg) Wik i girap 11/05/98

AREA	ARABICA			ROBUSTA	
	1	2	3		
NATIONAL	230 to 305	210 to 300	200 to 290		55 to 60
KAINANTU	-to 305	-to 300	NQ		-to 65
GOROKA	275 to 315	255 to 290	240 to 280		-to 56
KUNDIAWA	-to 300	-to 270	NQ		NQ
MINJ/BANZ	270 to 305	280 to 290	-to 290		-to 55
MT. HAGEN	NQ	NQ	NQ		NQ
WAPENAMANDA	NQ	NQ	NQ		NQ
LAE	255-to 260	210-to 230	NQ	NQ	NQ
ASEKI	-to 250	-to 230	NQ		NQ
MUMENG	NQ	NQ	NQ		NQ
WAU/BULOLO	-to 260	-to 250	NQ		NQ
WASU	NQ	NQ	NQ		NQ
MADANG	-to 240	-to 220	-to 200 110	-to 130	NQ
EAST SEPIK				150 to 160	
Robuster cherry	indicative				42

- Notes:**
1. Dispela stail CIC is wokim long soim ol Prais long wanwan wik.
 2. Ekseins Reit: Long prais bilong US\$ wantaim kina PNGBC iet kolim pei long kina wantaim US\$ long Mande long wanwan wik.
 3. 1kg. = 2.20462 lb
 4. Prais bilong kofi long dispela wik ikam long prais bilong ol espota na prosesa long Monde wantaim prais bilong ol 'future' prais long las Fraide.
 5. Long kisim save moa long dispela telefonim CIC Industry Affairs Division long telefon numba 732 1266.

SBDC helpim yu wantaim ol liklik wok bisnis



INSAIT long sol treda bisnis, papa bilong bisnis i mekim olgeta wok. Papa bilong bisnis i save holim olgeta profit i kamap, tasol em i mas redi long baim ol hevi olsem mani i sot long bisnis. Em i gat sans long kamap bos tu. Nogat man bai tokim em long wanem taim bilong wok o em i mas wok hat. Kamap gut bilong bisnis i bhainim hatwok bilong em. Sapos bisnis i gat dinau long arapela lain na i no bekim mani bilong ol, ol i ken kisim papa bilong bisnis i go long kot. Na kot i ken pusim em long salim bisnis long kisim mani long bekim mani bilong ol arapela lain.

Taim kot i pusim papa bilong wanpela bisnis long go long kot long salim ol samting bilong em lng bekim dinau bilong arapela bisnis, dispela em ol i kolim unlimited liability. Dispela i min olsem i nogat mak o stop long mani bilong em yet we papa bilong bisnis i mas bekim long stretim bisnis bilong em long dinau. Sampela taim, em i mas salim olgeta samting bilong em long kisim inap mani long bekim dinau.

Partnership (patnasip) em narapela kain bisnis we i gat long Papua Niugini. Ol lain insait long dispela kain bisnis em ol i kolim ol patnas. I gat lo i banisim long amas namba

bilong ol lain tasol i ken stap olsem patna. I gat ol gutpela as tru long ol man i kamapim patnasip. Olsem sol treda, astingting bilong patnasip em long kamapim profit bilong ol papa bilong bisnis.

Patnasip i gat i gat ol gutpela samting long em moa long hol treda bisnis.

1. Bikos patnasip i gat planti lain manmeri, em i save gat planti mani long statim bisnis. Sampela taim patnasip bisnis i ken bikpela na i gat planti woka bilong em, yusim planti ol liklik masin na tuls long wokim kamap planti samting o kamapim moa sevis winim sol treda.

2. Ol patna i save gat sampela kain save na eskperiens bilong mekim wok. Kain olsem sapos patnasip i lukautim plentesen bisnis, orait wanpela patna i mas gat save long wok agrikalsa, save long ol masin bilong plentesen, na save long rot bilong salim ol kaikai bilong plentesen. Sapos wanwan patna i gat save long wanwan samting olsem, em i no inap hat long baim sevis bilong ol ausait lain.

3. Sapos patnasip bisnis i no mekim profit o i gat sampela hevi, olgeta patna i mas serim dispela hevi wantaim. Nogat wanpela man bai kisim bikpela bagarap long dispela hevi.

Patnasip i gat sampela hevi tu.

1. Olsem sol treda (wan man bisnis), ol patna long patnasip bisnis i gat unlimited liability o ol dinau tu. Olsem na dispela i ken mekim ol patna i salim olgeta samting bilong em long bekim bek ol dinau em i gat long bisnis.

2. Sampela taim ol patna i no save wanbel wantaim long ol samting bilong ronim bisnis. Planti patna i no save ronim bisnis moa bikos long ol kros o hevi namel long ol yet long bisnis.

3. Ol patna i mas serim profit wantaim. Taim bisnis i wokim liklik profit tasol, wanwan patna i no save kisim bikpela tumas.

Kilim dai long dua bilang Santu Papa Pop

HETMAN bilong Katolik Sios long wol, Pop Paul John 2 na Vatiken komyuniti i kirap nogut na wari long indai long bos bilong ol Swiss gad sekyuriti bilong Pop las wik. Wanpela wanwok yet bilong em yet i bin sutim dai sekyuriti bos na meri bilong en na bihain man ya i sutim dai em yet. Dispela em naba wan kiling long Vatiken insait long 150 krismas. Ridim ripot long dispela samting daunbilu.

WANTAIM yunifom, ol klos na ol arapela bilas ol i putim, ol Swis gad husat i save lukautim Pop i luk olsem ol lain i kamaut long stori buk, kain we i pulim tingting olsem manmeri i no inap long bilip olsem em i tru.

Tasol long las wik birua i bin kamap long santu ples we planti Kristen manmeri long wol i save lukim olsem ples na as long lotu na ol kain birua long kilim dai man i samting we i save kamap ausait long Vatiken siti, hetkota bilong Katolik Sios long wol.

Kepten Alois Estermann husat i gat 43 krismas i bin ekt-ing komanda long praivet ami bilong Pop ol i kolim long Swiss Gads. Ol bin promotim em: olsem komanda na long las wik Mande bipo long seremoni long makim opisol luk-save long en i kamap, yangpela wanwok bilong em Cedric Tornay wantaim 23 krismas i bin sutim em na meri bilong em, Galdys Meza Romero. Bihain, Koporol Tornay i bin sutim em yet wantaim 9mm SIEG 75 gan.

Ripot i tok Tornay i bin gat belkros long komanda na wanpela bilong ol samting em i straik long en em no kisim gutpela luksave long wok bilong em olsem wanpela gad long Vatiken.

Dispela em i namba wan long bikpela na nogut birua i kamap insait long histri bilong Vatiken na i bin kirap nogutim na kamapim bikpela sori long ol 100 memba Swiss gad husat i mekim tok promis long givim laip bilong ol long lukautim Pop.

Pop John Paul 2 long sori bilong em i tok disepla birua em i apinim hat tru long bilipim i kamap. Planti lain long Vati-ke, Swiselan na wol i no bilipim olsem dispela samting i kamap na ol tu i sori nogut tru. Ol atoriti long Vatiken i tok kain samting em i wok bilong long-long man we tripela pipel i bin dai long en.

Stori bilong Swiss Gad olsem praivet ami long Pop i stat long bipo bipo yet taim Pop Julius 2 i bin kamapim wanpela agrimen wantaim gavman bilong Swiselan long kisim ol yangpela man bilong Lucerne na Zurich long praivet ami bilong em long Vatiken siti.

Stat long dispela taim, Vatiken i save kisim ol yangpela man bilong Swiselan long praivet ami bilong lukautim Pop na Vatiken. Bipo ol ikisim ol long ami bilong Pop, Vatiken i save glasim ol long ol dispela samting. Ol i mas bilong Swiselan na ol i bilong lotu Katolik, krismas bilong ol i mas stap aninit long 30, ol i mas gat gutpela rekot na gutpela pasin na ol i mas ol strongpela man



• Pop John Paul 2 i sekhan long kepten Alois Estermann na meri bilong em, Gladys Meza Romero long wanpela praivet bung long las yia.

na longpela bilong ol inap long 1.75 mita na ova.

Pop i bin tok ol hevi, wari na kwesten long dispela birua em i putim long han bilong God Papa husat i papa bilong laip na dai bilong olgeta man.

Olgeta turis long Vatiken, dispela praivet siti insait long Rom, i save lukim ol Swiss gad stat yet long geit i go insait long Vatiken. Yunifom bilong ol i luknais wantaim vetikol straip we i gat repela, yelo na blupela long en.

Maski potnait pe i no gutpela tumas, ol yangpela man husat i joinim praivet ami bilong Pop i amamas na ol i praut long stap insait liklik ami long wol na karimaut wok bilong ol.

Kepten Estermann bilong Swiselan em i pikinini bilong wanpela fama i bin wok olsem Swiss Gad long Vatiken inap long 18 krismas. Em i marit long Galdys bilong Venezuel, Saut Amerika, husat i bin wanpela loya na em i wok long embasi opis bilong Pop long Venezuela long faipela krismas. Tupela i no bin gat pikinini tasol ol stap amamas long wanem ol i gat ol arapela gutpela wok long inapim laip bilong ol.

Kepten Estermann i bin go olsem bodigad bilong Pop long 30 pema wokabaut we em (Pop)

i mekim i go long ol ovasis kantri long wol. Taim wanpela Arab i laik sutim dai Pop na kamapim bagarap long bodi bilong em insait long wanpel bikpela bung long Rom long 1981, Kepten Estermann i bin banisim Pop na abrusim birua.

Ol ripot i tok Kepten Estermann i bin wanpela gutpela Katolik man na soldia bilong hatwok. Em i amamas long wok olsem Katolik na soldia long ami bilong lukautim Santu Papa.

Long Koporol Cedrich Tornay, man husat i bin sutim Kepten na meri bilong en, em i lukim tupela olsem birua bilong em.

Long ol ripot, Tornay i bin gat belkros insait long em na long de bipo em i karimaut kiling, em bin komplem long sampela wanwok bilong em olsem em no amamas long pasin we ol bos i no luksave long wok bilong em olsem wanpela Swiss Gad.

Ripot i tok belkros bilong em i bin stat long mun Februari long dispela yia taim Kepten Estermann i bin givim em wanpela woning pas taim em no bin stap long bareks long wanpela nait. Ol Swiss Gad i gat ol strik lo tru we ol i mas bihainim na stat long 123 kilok biknait, olgeta i mas stap insait long

bareks bilong ol. Pasin we Tornay i wokim em ol atoriti i harim na ol no bin wanbel na dispela i skruim belkros bilong Koporol Tornay long ol. Bel bilong em i bin hat moa yet taim em i harim olsem em no stap long lista bilong ol Swiss Gads we Pop bai i givim luksave long ol insait long seremoni long Mande, wankain taim ol bin laik luksave long Kepten Estermann long nupela wok olsem komanda.

Olsem na Koporol Tornay long dispela taim em i kilim tupela Kepten na meri bilong em na em yet, em bin wet wantaim Swiss SIRG gan we i save karim long wok na sikipela katres. Em bin sutim dai Kepten wantaim tupela katres, meri bilong em na bihain em yet. Ol bin painim gan aninit long bodi bilong Koporol Tornay.

Ol atoriti long Vatiken i wok long mekim ol wok painimaut long dispela birua. Dispela kain birua i no save kamap long Vatiken. Iaspela taim samting olsem i bin kamap em long 1848, 150 krismas i go pinis taim ol bin kilim dai praim minista bilong Pop Pius 9, Kaun Peligrino Rossi.

- Plikse na stori i kam long Daily Telegraph niuspepa

Wansolwara Nius

Niuspepa edita pret long indai

APIA, SAMOA: Edita bilong *Samoan Post* niuspepa, Moles Taumo i tok em i pret long laip bilong em bihain long wanpela gavman minista i go long opis bilong em, tromoi ol tok kros na tok bai sutim dai em (Taumo). Mista Taumo i tok Minista bilong Telikomunikesens Leafa Vitale i no amamas long wanpela nius long hevi bilong graun we minista i stap long en na niuspepa i laik putim. Mista Vitale i bin go long opis bilong niuspepa edita na wokim ol toktok kros olsem em (Vitale) bai sutim Mista Taumo.

"Mi no laikim ol giaman toktok na samting we bai kamap bihainim disepla em katres long het. Mi dispela kain man husat i save haiarim man nogut long karimaut dispela wok sapos mi yet mi no mekim," minista i tok. Mista Moles i tok em no amamas na em i wari long wanpela bikman i holim pablik opis olsem i mekim dispela kain toktok. Ol niusman i wok long bungim ol kain hevi taim ol i autim long pablik ol wok nogut na pasin bilong paulim mani insait long gavman.

15 soldia kam long Bogenvil

VANUATU: Gavman bilong Vanuatu i tok em i laik lukim gutpela sindaun i kam long Bogenvil na pipel bilong em.

Deputi Praim Minista Pater Walter Lini i wokim dispela toktok insait long wanpela seremoni las Fraide we ol bin tok gutbai long 15 ami lain bilong ol husat i go long ailan Bogenvil long stap insait long Pis Monitering Grup (PMG) bilong lukautim go het bilong gutpela sindaun long Bogenvil. Pater Lini i tok em no bin isipela wok long salim dispela grup long gobikos kantri i gat ol hevi bilong em yet tasol em i bilip olsem rot we Vanuatu i bihainim long stap insait long PMG i strongim polisi we Saut Pasifik rijon i mas stap gut wantaim nogat meknais long ol wok developmen long go het. Dispela 15 pipel we Vanuatu i salim long stap insait long PMG i gat long en wanpela sios minista na wanpela meri long en. Ol bin lusim Vanuatu bilong go long Bogenvil las Sarere.

Namba bilong pipel go antap

HONOLULU: Komonwel bilong Noten Marianas i kamap nau olsem ailan kantri we Amerika i lukautim insait long Pasifik rijon wantaim namba tu bikpela populesen o namba bilong pipel.

Long ol ripot, we US sensus opis i bin redim long 1997 na em i autim nau tasol, Guam wantaim 133,152 pipel i stap olsem namba wan na Noten Mariana Ailan wantaim 63,763 i kamap namba tu bilong kisim ples bilong Ameriken Samoa husat i bin stap namba tu long ol arapela yia tasol nau i stap namba tri wantaim 60,383.

Sensus ripot i soim olsempopulesen bilong tripela ailan teritori i go antap insait long 7-pela krismas taim ol bin karimaut kanding long hamas manmeri na pikinini i stap long kantri, hamas i dai na hamas i kam insait na lusim kantri.

Kopra prais goap

HONIARA: Prais bilong kopra long Solomon Ailans i bin go antap gen long dispela wik. Em i namba tri taim long dispela yia taim prais bilong kopra long Solomons i go antap.

Komoditi Marketing Atoriti bilong Solomon Ailans i tokaut long dispela samting long dispela wik. Nupela rekot level long pe bilong kopra i go olsem K348 long wanpela ton bilong namba wan gret. Kopra em bun bilong ol pipel insait long rurel eria we ol save pulim mani long en. Long las yia, kantri i bin salim aut 60,000 metrik ton kopta na i pulim moa long K8 milion long en.

Kamapim rijonal ea trefik

PASIFIK: Ol ailan kantri insait long Pasifik rijon we i karamapim tu Ostrelia na Nu Silan i wanbel long traime fomim wanpela Pasifik aviesen maket.

Wanpela bung bilong ol aviesen minista insait long rijon i bin bung long Suva Fiji las wik na ol i sapatim tingting long kamapim rijonol ea trefik kontrol na ea spes menesmen. Ol minista long bung i bin wanbel long wok bung wantaim na was gut long sekyuriti long ples balus na balus yet na daunim ol hevi bilong haijek na ol arapela moa birua.

Long dispela taim, ol ea trefik kontrol senta long Australia, Nu Silan, Fiji, Tahiti na Yunaitet Stets i lukautim menesmen bilong Intenesenel ea trefik long Pasifik.

- Ol stori i kam long Pacnews

BILDING na KONSTRAKSEN



• Bilding na Konstraksen developmen i kamap insait long kantri. Poto i soim Poreporena Haiwe.

Developim PNG bilong taim bihain

BARBARA MASIKE i raitim

DEVELOPMEN insait long Papua Niugini i save kamap long planti kain wei. Long sait bilong bilding na konstraksen, planti kain senis i kamap pinis long kantri bilong yumi.

Long Pot Mosbi yet nau i gat planti ol stua i kamap, gutpela rot netwek wantaim Poreporena haiwe tu i stap na nupela teminol long Jackson's ples balus i stap olsem mak bilong ol nupela konstraksen long kantri.


Long ol narapela provins Gurney ples balus i win tru wantaim nupela teminol bilong em na long maining taun long Lihir, Niu Ailan provins planti kain samt-ing tu i wok long kamap olsem nupela helt senta we oli bin opim long las yia tasol.

Insait long Bogenvil yumi ken lukim ol nupela wok bai kamap klostu - dispela bai strongim tru sispai agrimen gavman na ol BRA i sainim long stapim ol pait na bringim bel isi i go bek long provins. Yumi ken redi nau long lukim planti ol kain bilding bai kamap long ol skul, ol hausik na ol narapela sevis insait long Bogenvil.

Long helt na edukesen planti ol skul i wok long kamap na ol nupela helt senta tu i stap pinis. Wanpela bilding i sanap nau em long nupela Krietiv Ats Fakalti bilding long Univesiti bilong Papua Niugini. Dispela bilding em oli kolim long Beier Creative Arts Haus Bihain long Professor Ulli Beier husat i bin stap olsem tisa long olpela Nesenel Ats skul.

Tasol planti long ol dispela wok em ol bikipela kampani tasol i save kisim kontrak long mekim na ino ol liklik bisnis bilong ol Papua Niugini yet.

Sapos yumi laik bai kantri bilong yumi i mas develop yumi mas givim planti wok kontrak igo long ol liklik bisnis, em nau bai yumi lukim trupela developmen.



• ANATAP: Nupela opis bilong Ostrelia Hai komisina long Mosbi.
 • LEPHAN: Ol wok konstraksen long nupela teminol long Jackson's ples balus long Mosbi.

BILDING na KONSTRAKSEN

Carpenters bai opim nupela stua long Lae

BARBARA MASIKE i raitim

KASTOMA sevis em i wanpela bikpela samting tru long bisnis tasol moa yet em gro bilong kampani i sain olsem bisnis i kamap gut.

Dispela em i tru long Carpenters Hadwea husat i lukluk nau long opim narapela nupela stua gen insait long Lae, Morobe provins.

Jenerol menesa bilong Kapentas John Wilson i tok nupela stua ya bai kamap namba faiv insait long kantri. Ol narapela i stap long Ulaveo Kokopo, we oli bin opim long 1994 na Rabaul na Madang long 1997 na men stua long Waigani yet.

Mista Wilson i tok kampani i baim pinis wanpela bilding long Milfordhaven rot long Lae na nau yet em i wok long kisim kuotesen long ol sampela bilding kampani husat bai stretim gut olsem oli laikim.

Mista Wilson i tok stua bai op na redi long bisnis samting olsem Julai long dispela yia.

Em i tok kampani i tingting long opim nupela stua long Lae bikos bisnis i gutpela long hap we i stap olsem bik-rot long Hailans,

Mamose na Niugini Ailans rigon.

"Em bai isi tru sapos Lae i kamap olsem distribusen senta bilong ol dispela rigon, Mista Wilson i tok.

Em i tok tu olsem bisnis i wok long kamap gut tru na kampani i wok long kisim planti kastoma moa yet long ol grasruts lain husat Mista Wilson i helpim tru kamap bilong Carpenters long Papua Niugini.

Carpenters i spesolais long salim ol kain samting long bilding na konstraksen olsem timba, plai-wud, ol waia bilong mekim banis na jenerol hadwea.

Ol kastoma tu i kem painim ol kainkain samtring bilong haus olsem kebol, ol tu;ls bilong mekim gaden na Boral ges tu i stap.

Ol wokman bilong Kapentas i save olsem kastoma sevis i wanpela bikpela samting tru olsem na yu bai hamamas long mekim soping long Kapentas we ol bai laik long helpim yu.

Kampani tu i save givim plaming sevis bikos dispela sevis i go wantaim sevis bilong wokim haus.

Mista Wilson i tok strong bilong kampani i stap long ol grasruts lain husat i save luksave long Kapentas olsem wanpela gutpela


stua.

Capentas tu i gat gutpela treining bilong ol wokman bilong em i stap na wanpela wokman husat i mek yus long ol dispela progrem em long Cornelius Bikta husat istap wok olsem brans supavaisa.

Mista Bikta i tok em i hamamas tru long wok wantaim kampani ya husat i helpim em long mekim ol narapela kos long wok olsem supavaisa na taim menesmen wantaim Price Waterhouse.

Ol dispela kos i helpim em tru long wok bilong em. Kapentas i gat samting olsem 200-pwl wokman meri insait long ol stua bilong em long kantri na i tingting long kisim narapela 60-7- moa wokman na meri long nupela stua long Lae.

Malaysia Boneo Finance (MBF) Carpenters Ltd, wanpela Sydney Stock exchange (exsens) kampani i bosim dispela Carpenters (PNG) Ltd na i stap long Westen Samoa, Fiji we bikpela opis bilong Saut Pasifik i stap. Histori bilong kampani i go bek long 1919 taim kampani i kam pes taim long Papua Niugini aninit long WR Carpenters na nau i stap strong na i gat bikpela bilip long helpim wantaim gro na developmen bilong Papua Niugini.



• Brens supavaisa Cornelius Bikta, husat i kisim trening long Price Water house.



• Carpenters Hadwea jenerol menesa John Wilson.



Carpenters Hardware

Your friendly local hardware store.

We have a full range of hardware, building supplies and timber at affordable prices.


Head office
Port Moresby

Branches at:

- 1) Ulaveo, Kokopo
- 2) Rabaul
- 3) Madang

Soon to open on Milfordhaven road in Lae.

BILDING na KONSTRAKSEN



• Boinamo Enterprise i save mekim ol dispela kain bilding tu insait long Lae siti. Long raithan - haus bilong slip.

Boinamo Enterprise - hamamas long givim kwualiti sevis

BOINAMO ENTERPRISE i statim bisnis operesen bilong em long Lae long yia 1973 olsem wanpela liklik bilding kampani husat i save mekim ol haus bilong slip na ol opis. I kam inap nau Boinamo Enterprise i gro tasol em i bes yet long Lae siti, Morobe provins.

Kampani i gat samting olsem 320 wokman meri na long taim i gat plan-ti wok kampani i save kisim samting olsem 550 wokman meri.

Ol konstraksen wok bilong kampani em long mekim ol haus, hotel, stua na supamakot, skul na benk, putim paip bilong wara na papi bilong karim pekpek na ol dispela kain samting.

Kampani tu i kirapim ol fektori bilong mekim simen, tebol na sia na krasha. Ol dispela sevis i save helpim tru kampani wantaim ol wok konstraksen bilong em.

Long wok bilong em insait long bilding na konstraksen kampani i save kisim ol liklik na bikpela wok wantaim. Kampani i save lukluk gut tru na kisim wok kontrak na nau yet i wok long kisim planti wok meintenans insait long Lae sisti yet.

Dispela em ol kain wok olsem septic tenk, drein na ol kain liklik wok olsem. Nau yet kampani i gat seven-pela ekspetriet wokman i stapo olsem ol supavaisa. Plaming supavaisa i save lukluk long olgeta plaming meintenans wok.

Boinamo i operetim wanpela somil long Omili we em i save sowim ol timba, tritim ol na salim long pablik. Timba i kam long mil em ol yet save draim long joinari bilong kampani yet. Mil i gat kapasiti long milim samting olsem 30 kubik mitas timba long wanwan de na nau yet sampela meintenans wok i wok long kamap bai mil i bikpela na gat kapasiti long mekim samting olsem 400 kubik mitas timba long wanwan de.

Bosman bilong timba mil em wanpela man bilong Papua Niugini yet.

Boinamo i gat feltori bilong mekim simen blok na i save yusim tripela masin wanpela em mobail.

Kampani tu i gat wanpela krasha long wara Bumbu we kampani i save kisim gravel. Kampani i gat kontrak long baim graun we i gat gravel klostu long hap krsha i stap long em. Gravel we i krash pinis em ol pablik i save baim.

Joinari fektori long Omili i save mekim ol kainikain timba joinari, ol kabinet, tebol na sia bilong ol nara-pela kampani na ol gavman opis. Boinamo nau i stap olsem meja saplaia bilong ol timba palet.

Nau yet tu kampani i wok long go insait long loging bisnis na long 1994 em i bin baim PI logging na operet long Taraka. Dispela i mekim isi long kampani bai em i ken kisim timba konsesen long baim timba long liklik prais.

BOINAMO

BOINAMO ENTERPRISES PTY. LTD.

**BUILDING & CIVIL
ENGINEERING CONTRACTORS**

Suppliers & Manufacturers of:

- Concrete Blocks, Pipes, Flower Pots
- Sand & Gravel
- Ready Mixed Concrete
- Roofing Iron & Timber Merchants
- General Maintenance
- Block Laying
- Tiling

Nglaung Street, Omili

Phone: 472 4695 or 472 1385

Facsimile: 472 6373, P.O. Box 1799, Lae.

BILDING na KONSTRAKSEN

Port Moresby locksmith-helpim yu stap sef

BARBARA MASIKE i raitim

PORT MORESBY LOCKSMITH i stap olsem wanpela long ol kampani husat i save helpim yu long stap sef insait long haus o kompaun bilong yu.

Dispela kampani i save katim ol ki bilong haus, ka na i ken helpim yu taim ol man nogut i brukim haus bilong yu na go insait stilim ol samting.

Port Moresbylocksmith i ken helpim yu wantaim ol narapela sevis bilong em olsem sef sevising, lokaut sevis, masta ki sevis, sef deposit sevis na mobail sevis.

Sistem

Bosman bilong ol teknisien John Lape i tok samting olsem tupela yias igo pinis pasin bilong stilim ka i go antap stret na em i

bin kamapim wanpela sistem we ol ka owna i ken putim registresen namba bilong ol igo insait long komputa na potokopim ol laisens bilong ol.



Long wanwan de kampani ya save kisim samting olsem 20-pela wok we ol klain i save laikim olsem senisim ol lok bilong ol haus o opis,sefsevising, lokaut sevis masta ki sevis na sef deposiut sevis.

Wokmanmeri


Nau yet kampani ya i gat 8-pela wokmanmeri husat i save wokhat tru long givcim ol dispela sevis .

Inap long taim emi stat kampani i gro na tude em i wanpela long ol dispela kampani husat i wok long givim loksmith sevis insait long Pot Mosbi siti yet.

• Antap poto: Wokman long Port Moresby Locksmith Jim Nimo i katim ki bilong ka.









• Tupela wokmeri long Port Moresby Locksmith Morea Lense opis klak i sanap na Helen Robert opis Menesa i sindaun. Tupela i bisi tru long kisim ol wok na klains i laikim sevis. Poto: Ivan Bayagau.



COMPLETE SERVICE DOMESTIC - COMMERCIAL

Agent for:

- Bi-lock
- 0Z41
- Status "6"
- CMI Safes


 KEY CUTTING	 SAFE SERVICING	 LOCKOUT SERVICE
 MASTER KEYING	 SAFE DEPOSIT SERVICE	 MOBILE SERVICE

325 6388

Facsimile 325 6765
Bird of Paradise Arcade,
Tabari Place, Boroko - P.O. Box 2943, Boroko

BILDING na KONSTRAKSEN

BHP Steel- helpim yu painim gutpela prodak




• Antap: BHP i save saplain gutpela stil long mekim ol kain samting olsem dispela bris ya. Aninit lephan: BHP Steel ken helpim yu long baim gutpela stil bai stap long taim long kainkain klaimet na ples. Aninit raithan: Sapos yu man bilong mekim haus kam sekim BHP Steel long kisim gutpela stil.

SAPOS YU man bilong mekim haus na yu laik baim stil yu mas luksave olsem Papua Niugini i gat tupela kain klaimet we long Hailans ples i kol na long nambis ples i save hat.

Stil em i ken kisim bagarap long ol dispela kain klaimet tasol wanpela kampani em long BHP Steel i ken helpim yu tru long painim wanem kain prodak bai gutpela long ples yu kam long em.

Long wanem BHP Steel em i wanpela kampani husat i salim ol kainkain stil prodak i ken stap strong long ol kainkain klaimet maski ples i kol tumas o ples i hat tumas.

Na BHP steel tu i save moa yet long ol wanem kain prodak i stap olsem na oli save toksave olsem husat man i laik baim stil prodak i mas lukim ol saplaia bilong ol pas-




taim long oli laik baim stil bikos prodak ol i baim na yusim i ken stap strong long wanem kain kondisen i stap.

BHP Steel i gat ol kain stil i stap olsem ol kalabon stil we oli penim pinis na ol dispela i gat zinalume

alloy bilong rufing na bilong mekim banis tu stap na kisim ples bilong galvanais stil long bilding indastri insait long Ostrelia.

Planti senis tu i kamap long ol prodak bilong BHP Steel. Planti long ol nau i bikpela na gutpela



moa, waid na longpela moa na yu ken kisim long gutpela prais tu.

BHP Steel tu i ken helpim yu stret long katim stil long wanem sais yu laikim.

BHP Steel nau i ken helpim yu long katim ol prodak long mak yu

laikim na tu ol i gat risistens long paia na i strong moa yet na ino hevi tumas.


BHP Steel i givim gutpela sevis planti yias i kam inap nau olsem na bilding indastri insait long Papua Niugini i gat trast long em.

Sand Storms in Saudi Arabia Typhoons in Taiwan Deluges in Papua New Guinea.

*Is the steel you are buying proven in the extremes?
Does it offer strength, long life, and superior performance?*

There are many suppliers of steel for building and construction in PNG, but few are able to guarantee their products where the elements are at their harshest.

At BHP our steel products continue to be preferred for usage in the world's toughest environments.



**Your partners in
quality steel solutions**




BHP BHP Steel Building Products

Contact your nearest sales office at:

LAE P.O. Box 872, Tel: 472 1866 Fax: 472 1697	PORT MORESBY P.O. Box 5455, Boroko, Tel: 325 4688 Fax: 325 4641	MADANG P.O. Box 2119 Tel: 852 3497 Fax: 852 3499	RABAU P.O. Box 62 Tel: 982 1872 Fax: 982 1873	MOUNT HAGEN P.O. Box 71, Tel: 542 1111 Fax: 542 2324	KIMBE P.O. Box 433 Tel: 983 5458 Fax: 983 5435
---	---	--	---	--	--

BILDING na KONSTRAKSEN



• Antap: Sapos yu stap long Lae, Morobeprovin, yu ken painim olgeta samting long wokim ol kain haus long Plumtrade. Lephon: Plumtrade i salim ol kain samting bilong mekim haus.

Plumtrade winim 6-pela yias

PLUMTRADE em Morobe provins 6-pela long salim ol plaming gat nupela spes inap wanpela kampani i yias nau na i win tru na hadwea samting. long 2000 skwea stap insait long Lae, long wok bilong em Nau yet kampani i mitas long mekim opis

bilang em i kamap bikpela.

Plumtrade i save salim ol samting bilong plaming, ol hadwea, ol stil paip, ol timba na ol narapela samting bilong mekim haus.

Kampani em wanpela man Rodney Brown husat i menesing dairekta nau i bin statim na nau i gat samting olsem 70-pela wokman meri. Mr Brown i tok kampani i gat 33% nesenel ownasip.

Mista Brown i tok samting olsem 50% long ol saplai kampani i save salim i save

BARBARA MASIKE i raitim

kam long ovasis kantri olsem Nu Silan, Australia na sampela i kam long ol kantri long Asia. Narapela 50 % em ol i save mekim insait long Papua Niugini yet. Ol prodak i save kam long ovasis em ol samting olsem glas na narapela hadwea we ino stap long PNG. Ol samting i kam long PNG yet em olsem nil, peint, ol waia na ol samting bilong mekim haus.

Tasol wok bisnis bilong Plumtrade i no

stap long Lae tasol. Kampani i gat tupela sels man husat i save raun long ol narapela hap bilong kantri na salim bisnis bilong ol.

Ol bosman bilong kampani tu i gat ekspiens i winim samting olsem 90-pela yias insait long plaming na hadwea indastri.

Plumtrade i gat komitmen long givim training long ol nesenel wokman meri na i gat komitmen tu long helpim PNG i gro.



PTY. LTD.

E-Mail
plumtrade@global.net.pg

Milfordhaven Road,
P.O. Box 2336 Lae,
Papua New Guinea



caroma
SANITARY WARE



MARLEY



Rheem



HARDIE'S
Building Products &
Building Systems

Phone:
472 6244

Fax:
472 6249



FOSROC




Ramset



pryda

PLUMBING - HARDWARE - TIMBER



• Plumtrade i winim 6-pela yias nau long salim ol dispela kain samting bilong mekim haus.

L A I P S T A I L

KANAGE

"Em nau, narapela wik bilong mi ken"



WANPELA taim Kanage i go long wanpela hotel long ples bilong em yet long Goroka. Trangu mangi nogut ya i no save long odarim kaikai long hotel. Olsem na em i go sindaun longwe liklik long ol manmeri.

Em sindaun i stap na wanpela waitman i kam sindaun long tebol klostu long em. Waitman i tokim weita olsem: "Waiter, glass of dring please." Kanage lukim pinis na em tu tok: "Waiter, glass of dring please."

Stap liklik weita i kam bek na waitman i tok: "Waiter, chicken please." Kanage tu kirap tokim weita: "Waiter, chicken please."

Waitman kaikai pinis na tok: "Waiter, wine please." Kanage tu tok: "Waiter, wine please." Man, mangi nogut ya amamas nogut tru na sindaun i stap.

Waitman i laik tekova nau na em i tok: "Waiter, tissue please." Kanage lukim na taim weita i kam long em, em i tok: "Waiter tissue please."

Waitman ya lukim na belhat nogut tru. Na go tokim Kanage: "Mate, you are doing everything I am doing." Kanage belhat na kirap tokim waitman: "Wanem, yu tasol save kaikai tissue a". Em tok olsem na kaikai tissue na wokabaut i go ausait.

WINA BILONG DISPELA WEEK EM

NANCY GENA
BOROKO, MOSBI

SAPOS yu ting yu gat wanpela gutpela pani stori, orait katim hap pepa long fran pes i makim, "Mutrus Kanage bilong dispela wik" na salim wantaim stori bilong yu i kam long *Wantok Nuispepa*, PO Box 1982, Boroko, NCD, PNG.

Putim nem na adres bilong yu long pas na bai yu gat sans long kamap wina bilong "Mutrus Kanage bilong dispela wik" na winim wanpela praiz. SANS, YAH!

Stori na nem bilong yu bai kamaut long wanwan wik so noken lus tingting long baim *Wantok nuispepa* na painimaut!

MUTRUS

• Kanage em marit man wantaim wanpela bebi boi. I no longtaim meri bilong em indai. Trangu Kanage wari nogut tru na krai wantaim. Em tingim ol guttaims bilong em long yangpela laip bilong tupela i kam inap indai painim em.

Em krai i go na ai bilong em red nogut tru. Em wok long krai na toktok wantaim olsem: "Hai hai, meri bilong mi ya, hai hai ... olgeta taim bai husat kukim kaikai bilong mi ... olgeta taim bai husat wasim ol klos bilong mi ... olgeta taim mi go wok gaden, husat bai helpim mi ... wai na, meri bilong mi ya ... man indai orait ya ... meri indai ya samting ya ..."

Tambu man harim krai bilong Kanage. Na em tu krai wantaim na bekim olsem: "Hai, yu baim pinis ya ... larim em kari i go ..."

Trangu Kanage harim olsem na em stap long toktok na krai tasol.

Peter Saki Seipe (Namba 2 wina)
VANIMO

• **Moa tok pilai wantaim Kanage long pes 19**



• Ol lain long Lae i lukautim wota bafalo bilong helpim ol mekim wok. Foto: Bustin Anzu.

PNG i gat pasin bilong helpim narapela

MASTA WAI i raitim

PAPUA Niugini i save gat pasin bilong helpim narapela long taim wanpela i sot long ol samting o wanpela i stap insait long taim bilong hevi.

Dispela pasin bilong helpim narapela i stap bipo long taim bilong ol tumbuna bilong yumi i kam inap tude. Dispela pasin i stap long bel na tingting bilong yumi. Long 1990 i kam, bikpela pait long Bogenvil i bin mekim planti manmeri i stap long taim nogut. Ol i sot long mani bilong baim kaikai na samting na sindaun bilong ol i bin nogut.

Tasol long traim helpim ol turangu bilong Bogenvil long dispela hevi, ol manmeri bilong Papua Niugini long olgeta provins i helpim wantaim ol kolos, kaikai, marasin, sel bilong wokim haus na ol kainkain helpim ol i ken givim. Olgeta manmeri i mekim dispela bikos ol i sori long ol turangu bilong Bogenvil. Ol pipel i pilim sori i kamap insait long bel bilong ol na ol i givim helpim bilong ol.

Long 1994, bikpela bagarap i kamap long Rabaul taun na planti ples insait long Is Nu Briten provins. Das bilong volkaun i karamapim olgeta samting na ples i bagarap olgeta. Planti kaikai, haus na ol gutpela samting i bagarap long dispela birua bilong volkanu.

Orait, ol manmeri bilong arapela prvoisn bilong Papua Niugini i kirap gen bungim han wantaim long givim helpim. Bikos dispela birua bilong volkanu i mekim planti manmeri i lusim haus bilong ol na painim ples bilong sindaun. Olgeta manmeri bilong PNG i givim han gen long bungim mani, kaikai, ol kolos na marasin na arapela moa helpim olsem gen. Dispela gen yumi lukim ol manmeri i sori long ol brata susa bilong ol long

Rabaul o Is Nu Briten provins na ol i givim helpim bilong wol wantaim wanem kain samting ol i ken givim.

Bihain long volkanu i bagarapim Rabaul long 1994, narapela bikpela hevi i kamap gen long 1997 we bikpela san i kukim olgeta hap bilong Papua Niugini na ples i drai olgeta. Ol kaikai bilong gaden i drai na ol wara bilong dring i drai na sindaun bilong ol manmeri i go nogut olgeta. Ol hailans provins bilong Papua Niugini i kisim taim olgeta bikos ais i bin pundaun na kukim olgeta graur. Na kaikai na ol samting i bagarap olgeta.

Olsem na long dispela taim, i hat long gol manmeri bilong Papua Niugini bai helpim ol narapela long dispela taim. Bikos olgeta pipel nau i stap long hevi insait long Papua Niugini olgeta. Olgeta manmeri i sot nau.

Ol lain tasol i stap long helpim olgeta pipel em gavman bilong kantri yet wantaim ol bisnis na kampani na ol voasis gavman.

Olsem na longlas yia i kam, gpavman bilong Papua Niugini i mekim save long baim rais na ol marasin na sel bilogn wokim haus, ol tenk bilong kisim wara long dring na ol arapela moa. Ol kantri olsem Japan, Australia, Nu Silan, saina, Inglan na Indonesia na arapela moa i kam wantaim kain kain helpim bilong ol. Ol is alim kaikai na ol helpim i kam long dispela taim nogut ol PNG manmeri i stap long en. Ol pipel bilogn Papua Niugini insait long ol taun i traim sampela kain rot bilong helpim ol lain bilong ol long ples. Olsem na ol i bin mekim kamap sampela kain bung bilong bungim mani na ol samting bilong salim i go long ol manmeri i kisim bagarap na taim nogut.

Dispela kain pasin bilong ol pipel yet i helpim ol pipel i save kamap long planti kain kain rot. Sampela em long pasin

bilong pusim wilbaro long rot na ol manmeri i tromoi liklik 1 toea na 10 toea nabaut. Sampela i mekim wokabaut o wokaton bilong pulim mani. Sampela ol musik lain i pilai musik na pulim ol manmeri i kam long harim musik na danis. Orait mani i kamap long dispela long geit i go gen long helpim ol manmeri.

Wanpela kain piksa tu i bin kamap long dispela yia we ol pipel bilong Hailans provins yet i bin kamapim rot bilong helpim ol yet. Long dispela yia, ol top ragbi lig pilaia bilong hailans i bung na pilai na we ol i pulim mani long geit long helpi ol pipel bilong ol husat i stap yet long hevi long bagarap bilong ais i pundaun na bikpela san we ol kaikai i drai.

Olsem na long dispela hatpela ragbi ligresis bilong ol, ol i kamapim mak olsem K58,000 long geit. Dispela mani long las wik, ol ogenasisa bilong dispela hailans ragbi lig resis i kisim na givim i go lon gol lain bilong Disasta na Emejensi Sevis (NDES) long kisim na skelim i go long wok bilong helpim bagarap ya. Ol lain NDES bai baim ol marasin na ol saplai bilong givim i go long hailans long helpim ol manmeri wantaim dispela bagarap.

Olsem na yumi ken lukim klia na save gut olsem long kain kantri olsem Papua Niugini, ol pipel i save helpim ol yet long taim bilong hevi na bagarap. Trus olsem sapos ol pipel i nogat tru samting ol ol i sot tru long ol samting, orait ol i no inap helpim narapela. Tasol long lukluk olgeta insait long ol hevi bilong PNG, yumi save gat pasin bilong sori na laikim narapela. Olsem na helpim bilong yumi long narapela i save kamap olgeta taim.

Pasin bilong lotu i save stap long yumi. Olsem na yumi save long tok bilong lotu we i tok, laikim narapela, helpim narapela i sot long samting na mekim gutpela pasin long narapela manmeri.

• Ol wok manmeri i straik egen-sim gavman long hevi bilong pe na bikpela pris bilong ol kaikai na kago long stau.




93 FM YUMIFM

Redio Stesen bilong yumi yet

Harim olgeta gutpela program long **93FM YUMIFM**

* Olgeta lokal sing sing, na ol musik bilong bipo yet.



- * **PNG MOTORS** - Prais bilong kes krop.
- * **YAMAHA** - Provinsel weda ripot.
- * **BSP** - Liklik bisnisman ripot.
- * **PEPSI** - Lunch hour rikwest.
- * **CITY PHARMACY** - Lukaut bilong bebi
- * **POST (PNG)** - Ron bilong ol sip.
- * **ELA MOTORS** - Kantri kaundaun.
- * **AMERICAN** - Gol.
- * **SANDE** - Gospel so.

Em rait Redio Stesen ikamap pinis, harim long tok ples bilong yumi yet, **93FM YUMIFM**

SALIM RIKWEST I KAM LONG:
YUMIFM Rikwest, Locked Bag 93,
Port Moresby, NCD, Fax: 320 1995

PNG FM PTY. LTD.
TRADING as NAUFM and YUMIFM
P.O. Box 774, Port Moresby, Papua New Guinea
Phone: (675) 320 1996 Fax: (675) 320 1995

Krai bilong belisi na luksave insait long wol na Taiwan

EDDIE SAUNDERS i raitim

KRAI na prea bilong yumi olgeta manmeri bilong gruan long sindaun belisi na amamas wantaim i stap insait long lewa na tingting bilong yumi olgeta gutpela manmeri bilong olgeta hap bilong wel. Olgeta de wanwan gutpela manmeri i save beten na salim tingting long dispela belisi i mas kamap. husait i gat hevi insait long kantri bilong na tasim famili na pipel bilong em, lewa bilong save bruk long belisi i mas kamap tru long ai bilong em. Taim yumi ritim dispela rait, i gat ol manmeri na ol kantri i salim tingting pis i kam namel long ol.

Taiwan i go long Saina, i go long Amerika, Indonesia, Japan India, Malaysia, Philippines, Afrika, Midel Is, i kam long Pasifik na Papua Niugini. Na Papua Niugini i go long olgeta arapela kantri isnait long wel. Na wanem samting save pasim dispela bel isi long i karim kaikai long ples daun olgeta? Em yumi man yet. Man i laikim moa pawa na pait long kontrolim narapela bai nogat strong. Dispela bringim bel-hevi na pait namel long ol pipel husait i sapos long i stap amamas wantaim. Sampela ol manmeri na kantri lukim amamas na belisi. Tasol planti i nogat. Ol i nogat fridom na luksave. Narapela samting em fridom na rait bilong ol papagraun asples long graun, wara, diwai na risosis isnait long ol graun, bus na wara bilong ol. Dispela em wanpela bikpela wari i save kirapim planti pait insait long kantri yet. Na insait planti ol intanesenel bung toktok bilong daunim dispela pasin i no stret wok long pairap yet. Inap ol yangpela lida bilong nau na bihain long yia 2000 i harim, skelim, na givim dispela luksave, belisi na amamas long wel olgeta. Ating dispela pasin i mas siat long lida yet pastaim, em soim famili, komyuniti, provins, kantri, rijen na wol.

Las mun Epril 25 Me 1 1998, mi go raun long Taiwan, Republic of China. Mi go stap wanwik atendim "Namba Tri Asia Pasifik Yang Lidas Konferens".

Mi lukim na harim dispela wari bilong yumi olgeta, "Belisi na Amamams namel long olgeta famili, pipel, wanwan kantri na wel olgeta." Mi stap namel man na glasim.

Kantri Taiwan insait long Esia, em i olsem Indonesia, Afrika, Midel Is, Kroasia, na sampela moa pipel insait long wol. Ol i krai na askim olgeta yangpela lida bilong nau na bihain long yia 2000 bilong olgeta kantri insait long wol long joinim ol long krai long Yunaited Nesens na wol bai luksave lon gol olsem ol i man, papa giraun. Na ol i Indipenden na Demokratik Kantri. Na ol i askim belsis long kantri bilong ol na wel olgeta. Narapela nem bilong Taiwan em, Republic of China. em min, ol kantri Sain (China). Ol laikim ol wantiam bikples China (Saina) i mas kamap yunaited na wan demokratik kantri. Tasol bikples China wantaim Taiwan i no wanbel na tupela i stap longwe. Yunaited Nesin tu i no luksave long Taiwan olsem kantri na memba bilong UN. Yunaited Nesins mekim na planti ol UN memba kantri i no luksave long Taiwan olsem kantri. Dispela save mekim ol Taiwan i wari. Ol i gat bikpela laik bilong ol long Saina olgeta i mas demokratik, yunaited na fri. Taiwan yet i Indipenden na i gat wanpela gutpela demokratik gavman na ikenomi bilon gem wanpela strongpela insait long wel.

KANAGE

"Em nau, narapela wik bilong mi ken"



■ Kanage em i wanpela pasto. Wanpela Sande em i go lotu wantaim olgeta man-meri pinis. Na i go kam long haus, na pasto tu i go long haus bilong em. Tasol i no longtaim em lukim lip bilong guava o yambo diwai i meknais. Em kam ausait na lukim wanpela liklik meri go antap long kisim yambo.

Em go sanap aninit long yambo diwai na meri ya kam daun. Na em givim em K20 na tokim em go lomn stua long baim wanpela pens. Yangpela meri mekim olsem pasto i tok, na em go long haus na tokim mama bilong em.

Orait neks Sande moning, mama bilong pikinini meri ya i go long sem yambo diwai. Em go antap na pasto lip diwai meknais. Pasto kam ausait na lukim mama antap long yambo diwai.

Em wokabout i go sanap aninit long mama i kam daun. Na em givim 20t tasol long mama ya na tokim em: "Go long stua na baim sampela resa. Na sevim sampela gras pastaim."

Man mama i bel kaskas stret. Bikos em ting pasto bai givim em tu K2 mani.

Bufu Benny (Namba 3 wina)

LAE

■ Kanage em wanpela tru tru lida man bilong ples Kananga long Kabwum distrik bilong Morobe provins. Em bin harim olsem wanpela praivet timba kampani bai kam katim timba long ples. Olsem na kwiktaim em bungim ol pipel bilong em long miting haus. Na putim ekstra toktok bilong em long miting ples. Na tokim ol pipel olsem: "Kampani bai kam with big money na katim tree insait long asgraun bilong yu. Namba bilong dispela mani i no smol, bikpela inap olsem K100." Em tok olsem na ting dispela em liklik tumas, na em tok: "No no, i no K100, nogat, K1,000." Na em skelim olsem K1,000 em liklik yet, na em tok: "I no K1,000, nogat, K10,000." Tasol em tingim olsem K10,000 i no inap. Na em bikmaus: "I no K10,000 nogat, bai yumi kisim K100,000. Na em dispela em mi tok tasol. Kampani yet bai kisim i kam, na bikpela tru na nem bilong dispela mani ..." em painim hat long kolim nem bilong mani.

Osem na meri bilong em ges na kolim: "Kota a?" Kanage bekim: "Yes, meri bilong mi tok stret, em kota tasol."

Man ol pipel i amamas na ting mani bilong-gol i winim mama benk bilong yumi. Na wanpela lapun i kirap bekim: "Em nau, ol save tok miliena, bai yumi kamap kota nau!"

PolyBoi Vicent

LAE

■ Kanage em man bilong les tru long kaikai taro. Tasol wanpela taim i nogat kaikai. Olsem na misis i kukim taro taim Kanage i no stap. Long biknait tru, Kanage i kam kamap long haus. Em i hangre nogut tru. Em i kisim kaikai bilong em na em i kaikai. Em i no save olsem em i kaikai taro, nogat. Em ting em kaikai kaukau ya. Kanage i pulap gut tru, na em i go slip. Tulait long moning Kanage i go long toilet na i pekpek. Na bihain i kam sindaun i stap. I no long taim, Kanage i pilim as bilong em i stat long sigirap. Em kirap i go bek long toilet, na brukim toilet rol na stat long klinim as bilong em. Tasol nogat, em i wok long sigirap yet. Em nau, em i stat long putim as bilong em i go antap, kam daun long olgeta pos bilong toilet. Tasol nogat i sigirap yet.

Em nau, Kanage i kam ausait long toilet, na sigirap i go long haus bilong em. Em mekim olsem i go na as bilong em i hot nogut stret. Na em i singautim Misis Kanage: "Yu kam sanap klostu long mi, na



winim as bilong mi. Bikos em i rong bilong yu ya, olsem na i hot bai yu yet yu kolim em."

Joanes Ape

BIALLA

■ Kanage wantaim poro laik go painim pis long solwara. Tupela pul long kanu i go ausait tru na slekim hanga go daun. Ples i tudak nau na Kanage i redi long laitim gias lam.

Em sindaun long fran bilong kanu na givim beksait long poro. Glas lam i lait pinis orait tupela i redi wantaim supsup long sutim ol pitel. Ol pitel i save tru long lait bilong lam na ol man i save redi long sutim ol na putim long huk. Na bihain slekim string i go daun long pulim ol bikpela pis.

Tasol dispela taim, Kanage wantaim poro i laitim lam na sindaun redi na wet nating. I nogat wanpela pitel i kam raunim lait o sait bilong kanu. Kanage i kisim taim long lukluk nabaut long solwara na ai bilong em tu raun pinis. Em belhat na sindaun i stap. Poro bilong em long beksait tu i kism taim na bel bilong em i solap na i pen tru. Mekim na em i laik rausim 'kago nogut'. Olsem na em saitim i go arere long kanu na taitim bun isi i stap. I no longtaim draipela longpela 'kago nogut' ya drip drip i go klostu long fran bilong kanu we Kanage sindaun putim was i stap.

Ai sait bilong Kanage i kisim liklik dispela kago na em i no givim sans. Em kaikaim tit na taitim olgeta rop masol na planim supsup stret antap long dispela kago na wilwilim gut tru. Em i singaut: "Yu pilim" Man poro long beksait ya i laik lap tasol em kaikai tit na giaman askim: "Kanage, em wanem kain pis yu sutim ya?" Kanage i lukim solwara as i kirap na strongpela smel nogut tu i kamap na em i bekim: "Poro, dispela i no pis, nogat. Em bikpela bulmakau bilong solwara ya. Yu smelim pekpek bilong em tu o nogat?"

Sem taim Kanage i pulim supsup i kam klostu long lait bilong lam na em i luksave olsem poro i trikim em pinis. Man klostu em i tromoi supsup long poro. Tasol em i senisim tingting hariap. Bikos em i tingting long bekim dinau narapela wik.

Donald Benson

BIALLA

■ Kanage stap long Mosbi long ples Hanuabada. Na maritim wanpela gutpela meri tru bilong hap. Skin bilong em i smut na i luk smat tru na em i ret skin na em namel sais stret.

Taim ol man i lukim em, leva bilong ol i save bruk stret. Kanage yet save laikim

meri ya tumas. So em i no save westim taim bilong em wantaim ol wantok bilong em ol silip wantaim ol. Bikos meri save katim stret leva bilong Kanage. Olsem na em mas stap wantaim meri bilong em olgeta taim.

Kanage yet i kisim wok long ovasis kampani. Na em i gat wanpela stoa na ka. Lain bilong meri i gat planti famili. Na Kanage tu gat planti famili. Planti taim, ol dispela famili isave kam kaikai long haus bilong Kanage. Na sampela lain bilong Kanage, ol save lus long meri bilong Kanage. Wanpela taim wanpela man i tokim Kanage olsem meri bilong em i save paul wantaim ol man. Taim Kanage i harim dispela tok, em i gat wanpela tingting tasol long kilim em yet long solwara.

Kanage go kamap long haus na tokim meri olsem: "Olgeta taim mi save laikim tumas na mekim gutpela pasin long yu. Tasol yu save paul wantaim ol man. So nau mi lusim olgeta samting long han bilong yu. Na mi yet bai go indai long solwara."

Kanage tok olsem na kisim wanpela spit bot. Na ron i go longwe liklik long namel bilong solwara. Mekim na misis na i singaut i go long Kanage. Na Kanage i stop na i redi long kalap long solwara. Na meri singaut olsem: "Yu no tingting long pikinini na ol famili bilong yu?" Kanage harim na bekim i kam bek: "Em bilong yu". Na meri i singaut gen: "Na ol haus na bisinis bilong yu?" Dispela i no senisim tingting bilong Kanage. Em singaut i go bek: "Em bilong yu". Meri singaut gen na tokim Kanage: "Olsem wanem long moni yu gat long benk na ol wantok bilong yu?" Kanage bekim: "Em bilong yu".

Olgeta gris toktok long senisim tingting bilong Kanage i no wok. Mekim na meri bilong Kanage i painim toktok long stopim Kanage long em i noken kalap long solwara na indai. Kanage i redi nau long kalap long solwara. Na meri bilong Kanage i singaut strong tru long Kanage. Na Kanage i tanim na lukim meri bilong em. Sem taim meri i apim dres bilong em i go antap, na long narapela han, em poinim stret long pilai boi bilong em, na singaut: "Na yu no tingim dispela samting". Man, Kanage i tanim na go i kam na kisim meri bilong em na tupela i go insait long haus na lokim dua stret.

Elvis Loti

GOROKA

■ Kanage em wok olsem teksi draiva long Mosbi siti. Em i no save gut long tok inglis. Wanpela Sarere apinun, em draiv i go long nupela Jacksons teminel. Na givim lif long wanpela turis meri, husat laik go long

Davara Hotel. Em draiv i go na long hap rot, turis meri askim long tok inglis: "Is PNG o hostile country?"

Trangu Kanage paul long kain inglis. Olsem na em i no bekim. Turis meri askim yet i go na smail wantaim tu. Dispela i givim rong tingting olsem nau long Kanage. Em ting turis meri mas askim long wanem kain stail ol PNG i gat.

Kwiktaim em tanim het tasol na givim gut smail stret long turis na tokim em: "Oh yes, PNG is a very hostile country, you talking about horse style, dog style, you name, we got it?"

Turis meri harim na paul olgeta. Orait taim Kanage lusim meri ya long hotel, em tokim em: "As I told you, just ask for any style and you will be served just right."

Francis Baoroba

Goldie River Barracks

■ Kanage na brata bilong em Danzsco resis stret long danis wantaim ol meri Waramo. Tasol long dispela danis, i nogat planti meri. Ol man tasol i pulap. Na taim resa singsing bilong kanage, Frooks i kam on, tupela baga nogut i painim ol poro meri nau. KANage isi yet na poro Danzsco kisim wanpela pinis. Tasol ples i pulap, olsem na tupela i danis longwe long tupela yet. Taim Kanage lukim meri ya i danis, em kam na askim. Tasol em kirap nogut long painimaut olsem meri danis bilong poro bilong em yet, Danzsco. Em sem pipia na go ausait long danis eria.

Bihain long danis, poro Danzsco go ausait na lukim Kanage. Na tupela lap indai stret. Na meri ya bihainim i kam ausait na lukim tupela. Na tokim Kanage: "Samting ya em wanpela. Olsem na yu mas hariap o bai spes i pas." Kanage harim olsem na bekim: "Kain bilong yupela ol meri long hia ya. Yu askim na ol bai tok ol ken dabolim tupela long wanpela taim. Olsem na mi askim."

Desmond Vihru

VANIMO

■ Meri Goilala i stap long 6 mail setelmen long Mosbi. Wanpela de man i go wok na em wanpela i stap long haus.

Em sindaun long fran bilong haus i stap na ol raskol i kam katim fens long beksait. Na brukim na go insait long haus na mumutim olgeta samting na go pinis. Meri ya sindaun i go na go insait long haus. Na painim olsem olgeta samting i no stap.

Em kam ausait tasol na salim tok long plis. I no longtaim ol plisman i kam kamap. Na askim em long wanem samting i kamap. Meri ya i no klia long tumas long Tok Pisin. Em kirap na tokim plis olsem: "Mi stap long plan bilong haus. Na ol raskol i kam katim long pens bilong mi, na i kam brukim as bilong mi i kam insait, na stilim long samting bilong mi na i go."

Sore ol plisman i harim na indai isi isi stret na tekov.

William Megusa

6 mail setelmen

MOSBI

■ Wanpela Sarere Kanage raun tromoi huk long Eriku taun long Lae. Na em lukim wanpela resa bilong ples Butipam i wokabout i kam. Kanage lukim meri ya na waia rop bilong em i sok seket pinis. Olsem na taim em abrusim meri ya, em askim: "Olsem wanem, sampela tingting i stap o?" Merim harim na tanim. Sem taim Kanage givim em ful smail stret. Na askim gen long Tok Inglis: "Hey beauty bum, the way you look just makes me unbalance. I don't know why ya?"

Meri ya harim na i no wanbel long Kanage. Em bikmaus i go long Kanage: "Same on you, go and jump in the lake?" kanage bekim: "And you will save me there on the other side of the lake."

Dispela hap tok i tanim tingting bilong meri ya. Na neks de, Kanage deiting meri ya na tupela go spin long Lae maket. Sampela poro lukim na askim: "Meri ya krosim na tokim tu long kalap long raun wara ya. Olsem wanem na yu autim em?" Kanage bekim: "Em nau, mi kalap long raun wara, na em sevim mi long hapsait."

Leva Kila

MOSBI

MUTRUS

Krai bilong belisi na luksave insait long wol na Taiwan

i kam long pes 20

Wanpela gutpela pasin bilong Taiwan pipel em, ol i les long kirapim pait kros. Ol laikim gutpela pasin bilong paitim tok, skelim wantaim belisi na stretim tok. Na bai i gat belisi na wok bung wantaim bilong gutpela olgeta. Ol i bisi long wok bisnis long kamapim gutpela sindaun bilong ol yet na olgeta pipel. Na olgeta pipel, stat long pikinini i go binismanmeri na politik lain i praud long kantri bilong ol. Na ol i bilip long ol yet i ken sanap long ol yet.

Ol i laik soim dispela belisi na yuniti i go long wel olgeta. Na ol i go pas na spendim bikpela mani long ogenisam na bringim olgeta yangpela lida bilong wol nau na bihain long paitim toktok na skelim lidasip bilong 21st sensuri.

Papua Niugini i wanpela laki kantri insait long wol. Yumi kisim Indipenden fri. Yumi i no pait. Tenkyu long ol kantri Australia ol husait kantri i givim yumi Indipendens fri. Na bikpela amamas tu long ol papa na lida bilong yumi bipo long Indipendens i bin askim long givim yumi Indipendens. Ol i no sikirapim pait. Ol soim beisi na daun pasin bilong yumi yet long paitim na skelim toktok na paim ansa long hevi bilong pipel na sosaiti.

Dispela em gutpela belisi na daun pasin bilong yumi long Melanesia na Papua Niugini. Yumi bin winim lewa bilong ol lain i bin bosim yumi long dispela pasin. Nau mipela laikim na soim yet olgeta kantri olsem mipela i pasin na amamas pipel. Wel i luksave long PNG long dispela namabwan pasin. Pasin planti ol manmeri long wel i krai long ol i mas i gat. Mipela i wanpela namba wan piksa bilong firdam na amamas long wel. Mi amamas long deligesin biong PNG mi go wantaim long Taiwan. Yumi i soim dispela gutpela pasin long di mipela kamap inap long minit mipela i lusim Taipei. Olgeta lain long Taiwan yet na ol deliget olgeta ap bilong wel i laikim yumi tumas long pasin bilong mipela tasol. gutpasin bilong ol arapela ples tu i stap. Yumi olgeta gutpela manmeri.

Pasin bilong ol pipel bilong Taiwan i olsem bilong yumi, Papua Niugini o Melanesia. Ol i save laikim belisi, daunpasin na laikim ol arapela man meri. Bikpela laik bilon gol em yumi olgetas wel i mas stap oslem brata na susa. Givim hand long wanpela na arapela long gutpela developmen bilong kantri bilong yumi olgeta.

Taiwan i gat bikpela na longpela taim long kirapim wok bisnis na developmen kantri na pipel. Na ol i wanpela kamap kantri insait long wol. Maski Yunaited Neins i no save long ol. Tasol olgeta pipel na gavman i sanap wantaim long soim wel olsem ol i fit na ken sanap na kamapim kantri olsem develop na ris kantri insait long wel. Ol i gat invesmen long olgeta ap



• Plisman sanap long harim kros na komplem bilong ol manmeri. Ol manmeri i straik egensim ol bikhet na raskel pasim

bilong wol. USA, Yurope, Japan, Malaysia, Hong Kong, Bikples Saina, Philipines, Indonesia, Thailand, Australia na ol liklik kantri olsem PNG na moa.

Taim moni problem long Esia i bin kamap ol i kisim taim. Bikos ol i no memba bilong Wol Benk na IMF. Ol dispela wol mani bodi o benk i save mekim dispela ol hevi, ol i tok. Ol i amamas ol i no i stap insait longdispela hevi. Taiwani no save kisim mani ausait. Em save givim na invest. Olsem na em i no stap insait long mani hevi nau insait long Asian a seksekim wol olgeta. Ol i praud long dispela posisen bilong ol. Olsem ol indipenden tru na ranim ol bisnis, mani na politik bilong ol. Na olgeta pipel sanap wantaim long kirapim kantri bilon gol. Em amamas bilong ol.

Em liklik eksperiens bilong yumi long Papua Niugini long lukim na lainim. Yumi gat olgeta risosis. Yumi ken kamap olsem Taiwan, sapos yumi i no sikirap nating long liklik mani. Na givim nating ol samting bilong yumi i ken givim yumi strongpela mani posisen bihain taim. Yumi wok long tingting long nau tasol. Yumi i no lukluk long gutpela bilong pipel na kantri bihain. Yumi mas lukluk long ol hevi bilong yumi nau na ol arapela kantri plenim developmen bilong kantri bilong mipela. Ating yumi mas sekrafais liklik nau bilong gutpela bilong bihain.

• NEKS WIK

Ol yut developmen program na eksperiens bilong ol arapela kantri. Na bilong yumi yet long PNG. Na bai yumi mekim wanem nau.



• Ol pipel bilong Morobe i straik bikos ol i gat hevi long graun bilong ol.



**PNG
HIT
PARADE**

**1
9
9
8**

POS.	SONG	ARTIST	STUDIO
3 2 1	MANGI SASAWA	SAUGAS	CHM
4 3 2	CASINO DARLIN'	LEONARD KANIA	CHM
6 4 3	MAMA & PAPA	ROBERT OEKA	CHM
1 1 4	KARKAR ISLAND	ROBERT OEKA	CHM
8 6 5	JAILBIRD MANGI	LEONARD KANIA	CHM
9 8 6	KUTI MANGI	ROBERT OEKA	CHM
2 5 7	KUNDIAWA	KUAKUMBA RUTZ	CHM
10 9 8	MANAM MOTU	QUAKES	PGS
5 7 9	CIRCLE OF TEARS	WILLIE TROPU	CHM
11 11 10	BALA EXPRESS	BALA FINSCH	PGS
13 12 11	EVERLASTING MEMORY	SAUGAS	CHM
15 13 12	BUSU BRIDGE	K. DUMEN	PGS
17 14 13	O'JAY	QUAKES	PGS
7 10 14	ACTING YOUNG	WALI HITS	TTS
19 17 15	O VAVINE	AZZIMBAH	PGS
00 18 16	NAMBIS MERI	BABUS	CHM
12 15 17	MAMA	AZZIMBAH	PGS
00 00 18	SUN NATING	MANDRAH SOULS	CHM
14 16 19	IAU LALIS	QUARKES	PGS
16 19 20	LAPUN MAN	LEONARD KANIA	CHM

PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995

Papamama i save strongim tingting long pikinini i mas mekim wok mani

MASTA WAI i raitim

WOK MANI em bikpela samting tru long laip na tingting bilong olgeta manmeri bilong Papua Niugini. Bihain long yumi pinisim skul na ol trening samting, yumi mas wok mani bikos dispela em bikpela laik na tingting tru bilong yumi na ol famili bilong yumi olgeta. Taim yumi wok mani, famili na olgeta lain bilong yumi i amamas.


Wok mani em wanpela driman olgeta manmeri i save gat na ol papamama i save pasim het bilong ol strong long lukim ol pikinini i mas bikpela, pinisim skul na wok mani. Yumi olgeta i save ting, sapos yumi wok mani, bai yu ken baim ol kain kain samting yumi laikim. Yumi ken bungim mani long wokim bisnis na yumi ken kamapim gutpela sindaun bihain sapos yumi gat mani long pasbuk. Dispela em sampela bikpela astingting yumi mas wok mani.

Wok mani em i olsem yu mas wok olsem kapenta, mekenik, plama, kuskus, taipis, draiva bilong kampani o gavman, haiwe draiva, loya, tisa, na olgeta kain kain wok ol manmeri i save mekim na kisim potnait pe.

Dispela em i laip na bilip bilong olgeta manmeri bilong dispela graun. Na dispela tingting i planim as pinis long bel bilong mipela olgeta manmeri na yumi save groa wantaim. Taim yumi kamap papamama tu, yumi tu i laikim ol pikinini bilong yumi i mas kamap ol wokmanmeri long bihain.

Dispela em stori bilong wanpela yangpela boi bilong Morobe provins. (Mi no inap tokaut long nem bilong em na asples bilong em). Boi ya em wanpela tasol we mama i lukautim em long liklik yet i kam bikpela. Em i no save tu long papa bilong em. Taim mi bungim boi ya long hai skul, mitupela i save gutpeia poroman tru. Mitupela i stap wantaim long wanpela klas long gret 7 i go inap gret 10. Na tu mitupela i save slip wantaim long wanpela domitori olsem na mi save gut tru long em. Long olgeta wiken, mama bilong em i save kam long Lae maket na salim ol liklik buia na gaden kaikai pinis, orait em i save kam gen long skul long lukim wanpis boi bilong em. Sampela taim em i save kam givim liklik mani long boi bilong em. Na sampela taim, em i save karim ol kaikai olsem banana, kakaruk na arapela kaikai bilong ples i kam givim boi bilong em. Na oltaim boi ya i save serim kaikai bilong em wantaim mi. Taim mi save kisim sampela gutpela samting i kam long mamapapa bilong mi, mitupela i save serim.

Taim mama bilong boi ya i save kam na mipela i sindaun kaikai, bai em i stori na tok, "yutupela i mas skul gut na winim skul na kisim gutpela wok long bihain. Nogat man bai helpim yutupela na mipela ol papamama i save hatwok long lukim yupela i kamap na kisim gutpela wok bihain long helpim sindaun bilong yupela yet". Taim meri ya i save tok olsem, mi ken tingim nau olsem meri ya i kilim skin tru long mekim pikinini



• LEPHAN: Ol yangpela manki bilong Lae lainim long lukautim ol abus olsem trening bilong ol. Poto: Bustin Anzu.

ANINIT: Ol pikinini i gat kainkain stail na pasin bilong mekim. Wanem hap i gat ol manki, i mas gat sampela kain stail na eksen i kamap.



bilong err. i kamap wanpela wokman long bihain. Na mi ting, papamama bilong mi tu i gat wankain tingting.

Bikpela sori long dispela poroman bilong mi em olsem, em i nogat papa. Olsem na mama yet i save mekim olgeta hatwok bilong gaden na ples long lukautim boi bilong em i kamap yangpela man.

Na em i hatwok long putim boi bilong em i go long skul na em i go kamap long hai skul na dispela taim mi bungim na poroman wantaim em. Mama bilong em i hatwok tru long olgeta skul fi bilong

boi bilong em long 10-pela kris-mas olgeta.

Taim mipela i bin wokim gret 10, tisa i askim mipela long wokim kain skul moa mipela i laik go long en bihain long gret 10. Mi bin laik go long Nesanel Hai Skul. Tasol poroman bilong mi i tok, sapos mi kisim wanpela sans long sotkat na wok bai i orait. Tingting bilong em i soim olsem em i no laik bai mama bilong em i hat wok moa bikos 10-pela kris-mas olgeta em i hatwok i kam. Dispela bikpela laik bilong poroman bilong mi i bin kamap tru. Wanpela taim,

ol bikman bilong wanpela bikpela kampani i bin kamap long kisim ol skul manki bilong gret 10 long go wok trening wantaim ol. Olsem na ol i holim wanpela tes long skul.

Na poroman bilong i winim stret dispela tes na kampani i kisim em. Em i no wari moa. Bikos taim em i go long trening wantaim kampani ya, em i kisim trening na tu wokmani wantaim. Long dispela taim mipela i pinisim gret 10, mi bin go long Sinia Hai Skul na mi no lukim poroman bilong mi moa. Na tu mi no save bungim irama bilong em moa. Mi save olsem mama i mas kisim gutpela malolo

nau long ples bikos boi bilong em i wok mani pinis.

Long las yia 1996, mi bin bungim em long Lae. Em i bin draivim liklik bas bilong kampani na ron i go olsem long Lae Taun. Mi singaut, tasol em i paul na ron i go. Tasol long las wik, mi traim ringim em long telefon na em kirap nogut tru long harim nek bilong mi gen bihain long klostu 10-pela kris-mas nau, mipela i bin lusim narapela. Em i stori long mi olsem mama i lapun meri pinis tasol em i sindaun isi nau na em i wok long lukautim gen mama bilong em.

Amamasim de bilong mama wantaim stail

LAS WIK Sande em wanpela spesel de bilong tingim ol mama. Long planti hap graun dispela de i bin gat rispek. Long makim dispela planti kain pilai na amamas i kamap long tingim dispela de.

Kain kain wok na pilai na planti ol narapela samting i save pasim ol mama long olgeta de na ol i no save malolo, ol i save stap long fran lain na ol arapela i save kisim strong long ol.

Ol i save mekim bikpela hat wok stret na long sait bilong developim kantri ol tu i save putim o givim bikpela han. Long kamapim yumi man na meri long stap olsem nau, i no long strong na laik bilong yumi. Mama i karim yumi, wasim yumi, givim kaikai long yumi, lukautim yumi na ol taim was long yumi nogat yumi painim sampela sik na hevi nabaut na dai.

Taim yumi sik ol i save kisim yumi go long haus sik, hangre, ol i save givim kaikai, doti ol i save wasim mipela. Krai ol is ave karim mipela raun na les ol i save putim mipela i go long slip. Tasol planti ol taim yumi i no save tingim. Na yumi no save rispektim ol.

Long taim bilong ol tumbuna, ol i save tok wok bilong ol meri i stap long haus taos, long lukautim pikinini, wokim gaden, planim kaikai, lukautim pik, kukim kaikai na ol narapela samting long sait



• **ANTAP:** Ol mama long Goroka i amamas na wokabaut long strit bilong Goroka taun. **ANINIT:** Ol sampela pikinini long Lae i amamas na danis long de bilong ol mama las wiken. Ol foto: Bustin Anzu.



bilong haus. Ol papa i no save rispektim ol na ting em ol lain bilong haus tasol.

Nau dispela bilip na laip stail i senis na ol mama nau i kisim sampela kain luksave insait long haus ples na komuniti tu. Planti taim yumi save kros na paitim ol ne rabisim ol. Planti taim yumi spak na save ronim ol long haus na mekim kainkain rabis, pasin long ol. Mipela ol papa i no save soim dispela laik na amamas long ol. Long dispela planti famili, ol mama i save stap wantaim hevi na wari.

Ol mama i mas gat sampela ol luksave insait long famili. Ol mama i save stap na famili is ave ron gut. Olgeta taim famili i no gat hevi na kros. Ol i gat amamas tasol. Em long wanem ol pikinini na papa i save laikim mama bilong ol. Dispela pasin i mas stap ol taim long famili.

Las wok Sande em de we i gat spesel mining bilong en. Olgeta mama long olgeta hap graun i

bung na mekim em de stret bilong ol mama. Ol i amamasim dispela dei wantaim stail.

Ol lotu, singsing, ol i danis, ol i go pati, na mekim ol samting long bilasim dispela de. Bikpela samting insait long dispela em ol baim presen. Ol papa na pikinini i pasim tok na baim presen bilong ol mama hait tasol. Long ol mama, ol yet i baim presen bilong wanpela narapela. Ol i wokim liklik kibung wantaim kaikai na bihain presentim ol dispela presen long ol narapela mama.

Pikinini wantaim papa i save long hatwok bilong ol mama na baim presen bilong ol. Ol i save olsem ol mama i save kirap long bik moning na redim brek fas na tu ol belo kaikai bilong ol pikinini long skul na bihain dina kaikai. Ol mama save wasim kolos bilong ol, brumim haus, wasim plet hap na was long haus. Ol papa na pikinini i tok dispela hatwok i mas gat sampela kain luksave.

Planti taim mipela i save wokim olsem tasol wanpela taim yumi

olgeta i mas amamas long ol mama. Em long taim bilong ol mama na tu olgeta narapela dei i mas olsem dispela de tu.

Ol mama em bun tru bilong ol famili. Sapos yu nogat mama long haus bilong yu, yu bai i no inap amamas. yu bai i no gat dispela pasin bilong givim bel i stap. Maski yu gat papa tasol dispela i no inap mekim yu amamas. Olgeta taim mama i mas i stap long amamasim yu.

Sapos mama bilong yu i lusim yu na painim nupela papa, papa i rausim em o em i dai, sindaun bilong haus bai i no inap gutpela. Olgeta taim bai yumi stap wantaim wari na luk sore.

Olsem na bikpela salens i stap long yumi ol papa na pikinini yumi mas laikim ol mama olsem yumi laikim yumi yet long olgeta taim.

Mi bilip las wik Sande yu mas amamasim mama wantaim kain kain stail singsing, danis, lotu na presen.



NEM: Martha Awayam

KRISMAS: 16 (meri)

ADRES: ARS Panga Kantri, PO Box 183, Bulolo, Morobe province.

LAIKIM: Kukim kaikai, harim musik, lukim TV na tok pilai.

NEM: Sipora Naton

KRISMAS: 16 (meri)

ADRES: Menyamya High School, PO Box 86, Menyamya, Morobe province.

LAIKIM: Pilai volibal, ritim buk, droim piksa, tok pilai na raun wantaim ol pren.

NEM: Ruth Nathan

KRISMAS: 15 (meri)

ADRES: Aseki Community School, PO Box 1, Aseki, Morobe province.

LAIKIM: Stori wantaim ol pren, tok pilai pilai basketbal, kaikai buai na wasim ol kolos.

NEM: Debbie Geamalu

KRISMAS: 17 (meri)

ADRES: Yha Hauka Coffee Mill, PO Box, 38, Aseki, Menyamya, Morobe province.

LAIKIM: Lukim TV, helpim ol papamama, danis, pilai hoki, raitim pas long ol penpren na tok pilai.

NEM: Jacob Joe

KRISMAS: 29 (man)

ADRES: Kimbe Town Authority, PO Box 127, Kimbe, WNBP.

LAIKIM: Raitim pas long ol penpren na laik painim wanpela gutpela meri bilong maritim. Krismas bilong em i mas namel long 25 na 30. Mi bai amamas long bekim pas bilong yupela olgeta.

NEM: Dickson Kaven

KRISMAS: 17 (man)

ADRES: PO Box 590, Wewak, Is Sepik province.

LAIKIM: Wok long gaden, go lotu, harim musik, pilai soka na mekim penpren.

NEM: Peter Tim

KRISMAS: 19 (man)

ADRES: PO Box 193, Bialla, WNBP.

LAIKIM: Pilai ragbi, draivim ka, raitim pas long ol penpren na harim musik.

NEM: Silas Beta

KRISMAS: 19 (man)

ADRES: Hargy Division one, PO Box 4, Bialla, WNBP.

LAIKIM: Pilai ragbi, raun wantaim ol proman na baim niuspepa na ritim na laikim mekim penpren wantaim ol arapela lain.

NEM: Joshua Wamakui

KRISMAS: 16 (man)

ADRES: Hangy Oil Palm, PO Box 2601, Bialla, WNBP.

LAIKIM: Pilai ragbi tas, soka go swim long solwara, harim ol kantri musik, raitim pas long ol pren na mekim penpren long ol arapela lain long narapela provins.

NEM: Matilda Chilly Otoo

KRISMAS: 22 (meri)

ADRES: PO Box 745, Agona Swedru, Ghana, West Africa.

LAIKIM: Painim wanpela man husat i ken mekim pren wantaim mi na mitpela i ken painim amamas long sindaun bilong mitupela long bihain.

NEM: Abigail Newman

KRISMAS: 24 (meri)

ADRES: PO Box 745, Agona Swedru, Ghana, W/A.

LAIKIM: Ritim buk, mekim pren wantaim ol man. Mi wanpela naispela na switpela meri Afrika na mi laik painim ol man i gat wankain laik na interes olsem mi. Bai mi bekim pas bilong yupela olgeta.

TOKSAVE

Yupela ol manmeri i salim pas long dispela seksen bilong painim PENPREN, yupela i mas salim gutpela poto bilong yupela i kam wantaim.



NEM: Chris Chan
KRISMAS: 19 (man)
ADRES: Budum Village, PO Box 949, Madang.
LAIKIM: Harim musik, pilai soka, lukim piksa, raitim pas long ol pren meri, wok long gaden na go lotu.

NEM: Martin Levi
KRISMAS: 17 (man)
ADRES: Advent PO Box 76, Wau Morobe province.
LAIKIM: harim gospel musik, kukim kaikai, wok gaden na stori wantaim ol pren long tok bilong God.

NEM: Jiwi Ess
KRISMAS: 18 (man)
ADRES: PNG Bible Church, PO Box 78, Bialla, WNB. P.
LAIKIM: Wok boskru long pmv, tok pilai wantiam ol pasindia, i go long lotu, singim ol lotu singsing, raitim pas na tok long ol pren.

NEM: Samuel Jonney
KRISMAS: 20 (man)
ADRES: PO Box 887, Kimbe, WNB. P.
LAIKIM: Go lotu, stori wantaim ol pren na senisim ol presen na raitim pas.


NEM: Paul Papi
KRISMAS: 19 (man)
ADRES: PO Box 348, Kimbe, WNB. P.
LAIKIM: Painim meri bilong maritim, raitim pas, lukim vidio na raun long danis.

NEM: Elizabeth Addae
KRISMAS: 25 (meri)
ADRES: C/O Kofi Addea, Cape Tech, PO Box A155, Cape Coast, Ghana, W/A
LAIKIM: Save long arapela manmeri, kukim kaikai, raun lukim arapela ples, lukim piksa, painim man long maritim.

NEM: Dady Vaargas
KRISMAS: 23 (meri)
ADRES: C/O Kwesi Dawood, PO Box 58, Cape Coast, Ghana, W/Africa.
LAIKIM: Mekim pren wantaim arapela, harim musik, go waswas long solwara, pilai spot, prenim ol man na painim man bilong maritim.

NEM: Kombo Kol
KRISMAS: 18 (man)
ADRES: Katu Diu (2) Kapiura, PO Box 451, Kimbe, WNB. P.
LAIKIM: Go lotu, raun long bus, wokim gaden, raitim pas long ol pren na painim meri bilong maritim.

Snek na palai i bagarapim resis



LONG bipo tru i gat wanpela ples i stap. Dispela ples i pulap tru long ol enimol bilong bus na ol i save stap gut wantaim na amamas wantaim.

Long wanpela taim, olgeta abus an enimol bilong bus i laik holim wanpela musik resis long ples. Na tim i kamap namba wan long dispela musik resis bai kisim bikpela prais tru. Ol i harim olsem namba wan prais em bai ol i winim pikinini meri bilong King. King bilong ol enimol long dispela taim bikpela pisin Paradais. Olsem na olgeta enimol i save olsem pikinini meri bilong king em smatpela meri tru na planti enimol man i save putim skin long em.

Taim dispela nius i go raun, planti enimol i redim ol musik bilong ol na stailim ol yet gut tru long winim dispela namba wan prais.

Ol pisin olsem parot, honbil na komomo i mekim kai kain stail danis na singsing bilong ol long putim kamap long dispela resis.

Ol arapela abus olsem dok, kapul, rat na pusi tu i bungim wantaim na traime stail bilong ol. Pik na walabi tu i wokim grup bilong tupela na redi na ol pis na kindam tu prektis na redim ol yet.

Klostu long bikpela de bilong musik na danis resis na olgeta hap em yum i ken lukim olgeta



enimol i bisi tru long stretim ol samting.

Ol i makim as bilong wanpela bikpela diwai pikus olsem ples bilong holim pilai long en.

Tupela enimol husat i nogat wanpela samting bilong soim long dispela taim em snek na palai. Tupela i sindaun long arere bilong rot na lukim planti lain tru i redim ol pilai bilong ol. Na tupela i askim tupela yet sapos tupela i ken traime wanpela samting. Tasol bikpela hevi em snek i nogat han bilong paitim musik na em bai slip danis long graun tasol. Long sait bilong palai tu em em i nogat gutpela nek bilong singim song. Bikos tang bilong em i longpela na i hat long singsing. Olsem na tupela i sindaun nating tasol na toktok

nabaut i stap. I no longtaim na snek i lap na tok, poro, mi gat wanpela plen. Na mi laik bai mitupela i traime strong na save bilong olgeta arapela lain ya.

Orait tupela i pasim tok pinis na tupela i go redim ol samting bilong tupela long mekim long nait bilong bikpela singsing na resis ya.

Long nait nau olgeta enimol i bung long mekim ol pilai bilong ol. Orait king Paradais i go long fran na i tokaut olsem wanem enimol i mekim top singsing danis bilong em bai maritim pikinini meri bilong em.

Orait bihain long king i toktok pinis na em sindaun na ol wanwan enimol grup i go mekim danis na singsing bilong ol.

Olgeta lain i kamap na mekim ol singsing na pilai bilong ol i go i go na klostu long pinis bilong pilai na pikinini meri bilong king i kam insait na sindaun. Taim olgeta enimol i lukim olsem, ol i bikmaus na kalap kalap nabaut i go antap na kam daun bikos pikinini meri bilong king Paradais em narapela kain kum katim meri stret. Pes bilong em i lait nating na ol skin bilong em i wel nating na mekim sindaun bilong olgeta enimol i bagarap stret.

Taim em i go sindaun long fran na wetim ol jas bilong mekim disisen long husat tru i winim namba wan prais, kwiktaim palai i kalap i go antap long het bilong dispela diwai pikus ya na kalap i kam pas long susu bilong pikinini meri bilong king. Taim pikinini meri bilong king i pilim olsem na em i laik bikmaus na kalap nogat, snek i kam aninit tasol long ol gras na i kam kaikai lek bilong meri ya. Taim pikinini meri bilong king i pilim olsem lek bilong em i posin, em i krai na kalap i go antap na tromoi win bilong em na em i flai i go antap tru long skai. Olgeta arapela pisin i lukim olsem na ol i sori na krai nogut tru na ol tu i tromoi win bilong ol na ol i flai i go antap. Olgeta i flai na bihainim pikinini meri bilong king Paradais i go inap em i go pundaun na dai long wanpela bikpela raun wara.

Em nau olgeta pisin i gat kros long ol enimol na ol i save flai na stap bilong ol yet long diwai na flai long klaut tasol.

Snek i sem long asua bilong em na em i save hait aninit long ol bikpela bus na gras tasol. Na palai tu i save sem na em i save hait insait long ol hul bilong diwai tasol na taim em bungim snek, em i save tingim sem bilong em na tupela i save pait.

Em tasol sotpela stori tumbuna bilong mi.

Menjao Waks
Wau, Morobe provins.

Mi laikim ol kain ovasis megesin we i gat piksa na stori bilong givim skul long save



MI LAIKIM ol kain ovasis megesin we i gat piksa na stori bilong givim skul long save long yumi yet olsem man na meri bikos mi ting dispela bai helpim mi long kisim gutpela skul long marit laip bilong mi.

Dia Laiplain,

Mi laik baim ol ovasis megesin we i gat ol piksa bilong ol bikpela manmeri tasol long lukim na ritim. Dispela em ol piksa we i no gutpela tumas long planti manmeri long lukim.

Olsem bikpela man husat i gat 25 krismas, mi ting olsem mi gat rait long long lukim ol dispela kain piksa long kain megesin. Mi ken ritim megesin long haus bilong mi yet na nogat narapela lain i ken lukim.

Long lukluk na tingting bilong mi, ol manmeri bai i no inap bungim planti hevi sapos ol i gat

save long ol yet olsem man o meri na tu skruim skul bilong marit.

Mi laikim megesin long praivet yus bilong mi yet. Mi nogat laik long salim dispela kain megesin o givim long ol yangpela manki long lukim o ritim.

Right to Read

Dia Pren,

Yu tok olsem sapos ol manmeri i gat gutpela save long (sex) skul bilong marit na save long yumi yet olsem manmeri, bai ol no inap long bungim planti hevi taim ol i marit. Laiplain i save kisim planti pas we i autim olsem sampela marit i no save slip wantaim long wanem ol i no klia long wanem samting ol bai mekim wantaim wanpela arapela. Hevi i no stap long dispela tasol, nogat save long skul bilong marit em i narapela samting.

Tasol long tude, i nogat nid long dispela kain samting i kamap bikos olgeta manmeri husat i save long rit i gat save long skul bilong marit na kain sindaun ol marit i save gat. Planti bukstoa long kantri i save salim ol buk na pepa we i gat ol infomesen long skul bilong marit.

Save we yu kisim long ol dispela buk i gutpela long helpim yu long skruim skul bilong marit na mipela i no ting olsem yu bai lainim gutpela samting o daunim ol hevi long marit laip taim yu kisim i kam insait long kantri r ol kain megesin bilong ovasis we i gat ol piksa na stori i no gutpela tumas.

Ol kain megesin we ol i tambuim long kisim i kam insait na salim long kantri bilong yumi em

ol i no raitim bilong skulim ol manmeri, nogat. Ol i wokim ol long pulim mani long ol. Ol i save putim ol kain piksa long strongim tingting na laik bilong ol man long baim pepa. Mipela i laik tokim yu olsem sampela long ol piksa i no gutpela na ol ken bagarapim sindaun na pren pasin bilong ol marit. Planti manmeri bai no wanbel sapos ol i painaut olsem ol poroman bilong ol i ritim ol kain megesin olsem.

Tok yu wokim olsem bai yu yusim ol dispela megesin long praivet yus bilong yu yet na i no inap larim ol yangpela pipel long lukim i soim olsem dispela kain megesin i no gutpela tumas.

Yu tingim tu kikbek we gavman bai kisim sapos em i larim ol kain megesin i kam insait long kantri? Sapos ol i larim wanpela man long baim ol kain megesin, em mas gviim rait tu long ol arapela bikpela manmeri long wokim wankain. Na em bai laikim ol wan wan long promis bilong noken salim ol megesin ya na tu, no larim ol arapela yangpela na liklik manki long lukim na ritim ol.

Yu ting olsem olgeta lain bai kipim promis bilong ol? Yu ting plis bai i lukautim kain lo we i larim sampela lain long baim na ritim kain megesin na tambuim ol arapela? Sapos ol lain i kisim ol kain megesin i kam insait i no brukim lo bai i gat sampela lain yet husat bai stilim ol na givim nabaut long ol arapela.

Yu ting olsem wanem, olsem wanpela bikpela man husat i gat tingting i moabeta yu no kisim ol dispela ovasis megesin we i no gutpela long ol yangpela pipel na ol liklik manki.

Laiplain



Bik Bro

REBO



REBO, MI GO SEKAP GIGI DOKTO TUDE OLI TOK MI BAI MIM BEBI GEL..

BEBI, GEL?! AIYOO! EM GUTPELA TRU! MI AMAMAS TRU!



REBO AMAMAS TRU!!!

TUMORA BAI MI GO NA MEKIM BIKPELA SHOPING TRU BILONG LIKLIK GEL!

EMELI TRU YAH



NEKS DE EM RINGIM OPIS LONG TOKSAVE..

MARGIE, TOKSAVE LONG OLGETA MI KISIM DEI OFF TUDE...



NAU EM GO MEKIM SHOPING BILONG LIKLIK GEL BILONG EM!!!



UMMA..

Baby Taso

BEBI BUK BET. KSD



REBO MEKIM BIKPELA SHOPING STRET...

MONING TRU, SE.. MAN, BIKPELA SHOPING TRU BILONG BEBI, ATING?

EM NAU!

Igo moa Neks Wik!!



SIPAK MAIK



RELI DRAWING NA LOITERING! SMAAT TRU YAH.

YESSE, SE! TENKIU TRU!

INO MI YAH.



NAU TASOL YUTUPELA WOKABAIT IGO BEK NA KOLETIM OLGETA BOTOL I BRUK LONG ROT, NAU!

!?!



UMPF!



OLGETA MANMERI LUKIM TUPELA NA OLI LAP INDAI!!!

HA! HA! HA! LUKIM TUPELA BENIMAN!!

HO! HO! HO! EM NAU, QIVIM!



GO STRET LONG POLIS STESIN!!

!?!



TAIM OLIKAMAP LONG STESIN, KLOSTU OL I DAI LONG SOTWIN!!!

PUFF! PUFF!

4-MAIL TREFIK

PUF! PUFF!

Igo moa Neks Wik!!

Pasin pamuk bikpela long Lae siti

Dia Edita,

Mi laik autim tingting long pasin mi yet mi lukim long ai bilong mi na i no stret. Wanem taim bai yumi hia long Lae siti inap long lusim pasin nogut? Sapos yu laik mekim wanem samting long laik bilong yu, em lalik bilong mipela wanwan. Tasol long mekim long pablik ples long ai bilong planti manmeri i lukim, em i no stret.

Mi laik tok kliia nau long dispela eria em ragbi lig graun em 'saioijapiok' i sanap long en. Man i luk olsem konfrens Mande to Mande. Planti meri save wokim pasin nogut na ol i stap oltaim long dispela hap. Mi lukim dispela pasin na i no stret. Olsem na nau mi laik tokaut long kain bikpela niuspepa olsem dispela, bai ol manmeri ken lukim na save.

Yumi tok dispela kantri bilong yumi em i kristen kantri. Olsem na mi askim yet yumi planti lotu nau, yumi pinisim tru kona bilong Lae siti inap wanpela lotu ol i ken i go na lotu wantaim ol long dispela hap. Bikos mi lukim dispela pasin na i no stret. Na tokim ol long lusim dispela pasin pamuk.

Paul-Elisha.

Village Benseng

Lover Watut, Morobe Provins

Stil pasin bikpela long Goroka maket

Dia Edita,

Mi laik kamapim wari bilong mi long Goroka maket i gat planti deti pasin tru i save kamap. Planti yangpela man ol save soim rabis pasin tru.

Ol save raun nating nating insait long Goroka maket. Na soim planti deti pasin tru.

Dispela em ol pasin olsem bilong pik poket, na bagarapim planti mama na ol lapun lapun bilong yumi. Plis yumi no kamap long animol. Olsem na tingting gut na kamapim pasin hambak.

Goroka maket em wanpela kalaful maket stret. Tasol dispela kain pasin nogut tasol i save bagarapim nem bilong maket, na tu bilong Goroka taun.

Luk olsem Hagen, Lae, Madang, i nogat dispela pasin i save kamap tumas. Tasol Goroka em deti pasin i save bagarapim nem bilong taun na maket. Dispela em asua long ol pik pokets. Dispela kain ino gutpela mama na papa isave kamapim. Nogat ol save kamap long ol pipia kaikai long Goroka taun yet. Olsem na long Sande i go long narapela Sande, nol nupela pipel long Goroka bai kisim taim stret. Mi les pinis long lukim ol mama i krai long ol bikhet mangi i stilim paus mani bilong ol. Sapos gavana tu no lukluk long dispela na stretim, kain bikhet pasin bai stap yet.

Kote. M. Nipiyarika

GOROKA

Makam memba stap we?

Dia Edita,

Mi wanpela mangi Makam insait long Morobe provins. Mi laik autim belhevi bilong mi long Memba bilong mipela long Palamen, Andrew Baing.

Long lukluk bilong mi, mi no lukim wanpela gutpela pasin long memba bilong mipela, Andrew Baing. Hia em sampela toktok bilong mi:

1. Vot i nogat gutpela kaikai
2. Sevis i stap we inap long promis yu mekim
3. Mipela lukim olsem olgeta sevis i go long Femri pipel tasol.

Mipela laik tok olsem mipela ol pipel i no lukim wanpela kaikai bilong ol ileksen promis yet. Wanem taim bai mipela i lukim ol dispela kaikai?

Max Peter

Nammiam

Painim lus pikinini

Dia Edita,

Dispela toksave em olsem mi painim tumbuna pikinini bilong mi, Jimmy Luke Par.gu. Em bin lus. Mi bin lusim em long tumbuna bilong em, Misis Emmah Luki Pangu. Na nau ol i stap long Wewak taun. Tumbuna bilong em i bin wok long wanpela hotel. Pos opiss' namba bilong dispela hotel em 103, Wewak. Plis sapos yu husat yu save long ol, plis givim ol dispela adres bilong mi.

Sapos tumbuna Jimmy Luke Pangu tu yu lukim dispela toksave, plis ringim mi long telepon namba 983 5412 o 983-5957.

Hia em adres bilong mi:

Joe L Kambu

C/-Fire Station Kimbe

West New Britain Province

Sapot long noken bringim poka masin long Madang

Dia Edita,

Mi wanpela yangpela man. Na mi save save laikim tru long ritim Wantok niuspepa. Dispela em i namba wan taim tru bilong mi long rait i kam. Wari bilong mi igo olsem.

Long Tinde Epril 22 insait long wanpela niuspepa, mi lukim olsem gavana bilong Madang provins, Jim Kas i egensim tupela sios bilong Lutheran na Katolik sios. Y

Mi laik tokim gavana olsem ol sios pasto na elda i wokhat tru long bringim ol sipsip

bilong God long gutpela na stretpela rot bai sindaun bilong ol i ken kamap gut. Ol i no mislidim o giamanim ol.

Mi laik tok olsem sapos ol bikman i ken skelim olsem bai ol save wanem rot i gutpela bilong bihainim na wanem rot em in o gutpela bilong bihainim. Gavana laik bringim poka masin i go insait long Madang. Long tingting bilong mi, mi egensim na in o laikim tru. Bikos planti sosel hevi olsem bilong brukim marit, famili i nogat kaikai, misyusim moni

na sampela moa bai kamap. Mi laik askim, nau ol dispela hevi i kamap long wanem as tru? Mi ken tok em long pasin bilong westim liklik toya long poka o gembling.

Nau yet mipela bringim pinis loto, betting shops, laki tiket i kam insait pinis. Tasol ol lida mas aipas yet na laik bringim gen poka masin long Madang.

Mi laik tokim yupela olgeta manmeri long Madang olsem yupela mas sanap strong na rausim dispela tingting bilong Gavana Kas, na ol sapota

bilong em long provinsal asembli.

Mi wanpela mangi Raikos long Madang yet. Na mi no laik lukim ol mama bilong mipela i kisim taim bikos long go insait bilong poka masin long Madang.

Em tasol na yu husat yu laik egensim o sapotim dispela pas bilong mi, yu rait i kam long dispela namba wan niuspepa na mi ken skelim.

Kiu Qolanga Bayume
RABAU



PARADAI LAIP "Putim Ai" PMV BAS RESIS

Turism Promosun Autoriti laikim ol PMV long PNG bai luk nais, na ol i putim bikpela prais, K1000.00 long husat PMV i luk nais tru, long wanwan senta bilong ol:

1. Lae
2. Madang
3. Mt. Hagen
4. Port Moresby (NCD)
5. Rabaul

Husat PMV long wanwan senta bai i winim prais ol jas bai ol i glasim:

- a. Bilas o sain olsem disain arasait long bodi bilong PMV.
- b. Gutpela kala na bilas long sikin bilong PMV.
- c. Piksa bilong ol maunten, ol kain pisin, purpur, solwara.
- d. Bilas bilong tambuna na PNG kastam.
- e. Insait na arasait bilong PMV i mas klin tru.
- f. Gutpela bisnis toksave i bihainim a.,b.,c. & d. antap.

Orait, stretim na klinim PMV bilong yu na hariap na stap insait long dispela resis long winim K1000.00. Ol wina bai oli i kisim tok orait bilong putim mak bilong 'Paradai Laip' long bodi bilong PMV bilong ol.

Sapos yu laik go insait long dispela resis, orait salim dispela entri fom i kam long 'Paradai Laip' - 'Putim Ai' PMV Resis - P.O. Box 1291, Port Moresby, NCD, pastaim long Novemba 27th 1998.

Nem:

PMV Numba:..... Sais: (haumas sit).....

Rut Numba:.....

Adres:

Telefon Numba:..... Fax Numba:

Long kisim moa toktok save long ol dispela Resis, askim:
PNG Tourism Promotion Authority - P.O. Box 1291, Port Moresby.
Telefon: 320 0211, Fax: 320 0223/ 320 1627

WANTOK NIUSPEPA I HAMAMAS LONG SAPOTIM DISPELA RESIS

WANTOK
NIUSPEPA BILONG YUMI OL PAPA NIUGINI STRET




**PAPUA NEW GUINEA
FOREST INDUSTRIES ASSOCIATION (INC)**

P.O. Box 4037, Boroko. Phone: 325 9458 Fax: 325 9563


**SAPOTIM GUTPELA FORES INDASTRI
BILONG PAPUA NIUGINI**

BISNIS BILONG KATIM NA SALIM TIMBA BUNGIM MOA HATPELA TAIM NAU


PRAIS BILONG TIMBA EM KANTRI SALIM LONG OVASIS LONG AMERIKEN DOLA (US\$)



NAMBA BILONG TIMBA EM KANTRI SALIM LONG OVASIS '000M3



MAN KAM INSAIT LONG KANTRI LONG SALIM TIMBA LONG
MAK BILONG MILIEN AMERIKEN DOLA



Bikos long ol mekimsave em bisnis bilong katim na salim timba i kisim,
husat i kisim helpim nau long dispela?

Fores Indastri i bin askim gavman long daunim eksport takis liklik, long helpim ol
timba kampani. Na bilong wanem na Wol Benk i egensim dispela?



355ml

Enjoy
Coca-Cola

**Recommended
Retail Price**

90t

Olgeta hap



90t Tasol

Noken Peim Mea!

Gavman bilong Skate em "2 minit nudels"

Dia Edita
 Mi wanpela mangi Saut Simbu. Mi save ridim Wantok niuspepa olgeta taim long lukim wok bilong gavman bilong PM Bill Skate. Nau bai yumi kolim gavman bilong PM Skate '2 minit nudels gavman'. Long wanem em i save senisim ol minista olgeta taim.
 Dispela kain senis tasol bai bagarapim kantri. PM Bill Skate yu mas larim wanpela minista i mas i stap long posisen bilong en inap long

wan yia o nogat larim em stap ful taim pastaim na bai yu lukim wok bai kamap gut long wanwan provins.
 Mi wanpela ful sapota bilong yu PM tasol ol wok yu mekim i no gutpela na mi les long en. bilong wanem na yu rausim wok long ol rait han man bilong gavman bilong yu olsem Simeon Wai. Yu mas larim em wok long minista bilong Komyunikesen o sapos yu rausim dispela ministri orait givim em narapela ministri.

Sampela em i orait tasol Mista Simion Wai yu senisim na givim vais minista bilong Fores em mipela ol lain bilong em i no amamas long en. Yu bin mekim bikipela promis taim yu kam long ilektret bilong Mista Wai olsem bai yu givim em wanpela posisen bilong minista na mipela olgeta pipel bilong em i amamas long em. I tru yu bin bihainim tok promis bilong yu tasol bilong wanem na yu seinism

em na makim em olsem wanpela vais minista.
 Mipela ol lain bilong em i no amamas long yu nau. Yu mas lukluk na givim wanpela minista gen long Hon Simon Wai. Sapos nogat mipela ol lain bilong en bai save olsem promis bilong yu em i no tru. Na mipela bai kolim gavman bilong yu "2 minit nudels gavman".
**Joseph Morex
 Mirima SDA Sios.**

Maski long sapatim nating Ginson

Dia Edita
 Mi wanpela mangi Kabwum nau mi stap long Gumum ples long Komba eria na mi sapatim toktok bilong Namam long Dengep ples. Em i lukim Kabwum i no stret na rait long Wantok niuspepa.
 Yu husat brata o sus i sapota bilong Ginson Soanu, tru tumas mi tokim yu olsem ai bilong yu na Ginson i stap long baksait bilong yutupela na ol votes bilong Ginson.
 Bikos yu save bihainim em na kaikai pipia kaikai em save kaikai olsem na yu wok long sapatim em. Sitoi Umut man Dendinga na Buaki Singeri, man Indagen em tupela tasol i trupla lida. Olsem na mi nogat toktok tasol mi sapatim toktok bilong mangi Dengep Mr Namam na yu husat i sapatim em i no save wanem hevi bilong Kabwum.

**Ninga M Zewong
 Gumum village**

Lukautim Mendi taun gut

Dia Edita
 Mi lusim ples long 1991 i kam inap 1998 nau mi go bek na mi lukim Mendi taun i no senis liklik bikos ol yangpela man i no lukautim taun bilong ol gut.
 Dispela ol yangpela man i save ting olsem Mendi em ples bilong ol na nogat man bai mekim wanpela samting olsem na ol i save mekim rambaut, bagarapim ol samting bilong ol bisnis manmeri, stil nambaut na mekim Mendi taun i no senis liklik tasol i bagarap.
 Nau mi laik mekim strongpela tok long yumi ol Mendi, yumi mas lukautim gut taun bilong yumi na wok klostu wantaim gavman bilong yumi na kirapim Sauten Hailans provins.

**Willie Kapei
 Mendi**

Noken salim buai na smok long haus sik

Dia Edita
 Mi wanpela mangi Morobe nau mi stap long Bialla WNB provins na mi laik autim wari bilong mi long Wantok niuspepa olsem. Wanpela taim mi i stap long Bialla haus sik na mi lukim wanpela pasin i no stret long ai bilong mi na mi no amamas tru.
 Mi save lukim ol sampela lain i salim buai na mutrus insait long haus sik. Na ol save kaikai buai na smok insait na spet nambaut ausait. Mi lukim dispela na i no stret.
 Yu husat i mekim dispela pasin plis lusim kain pasin. Haus sik i no haus maket bilong yu. Dispela longlong pasin em i go bikipela nau long Bialla haus sik. Olsem na ol dokta na nes na secriti mas was gut long ol sik manmeri. Ol sik manmeri i save mekim kain pasin olsem na bagarapim nem bilong Bialla haus sik.

**Kundip Hingi
 Bialla**



Liklik Sakias i makim laip bilong yumi

Dia Edita
 Dispela em i wanpela trupela stori na olsem laip testimoni bilong Jisas i go na i kam long laip bilong yumi olgeta pipel. Em i stori long wanpela man Judaman long lain tumbuna papa Abraham.
 Nem bilong Dispela man em Sakias, na em i wanpela sotpela man tru, na tu em i lida o hetman bilong ol lain i save kisim takis moni bilong ol pipel.
 Sotpela bilong Sakias i makim laip bilong yumi i stopela na tu long strong na tingting na save bilong yumi yet bai i hat tru long save long en.

Olsem Sakias i laik painim aut Jisas Kraiss em i husait tru em i go antap long diwai long lukim Jisas. Tasol bipo long em i mekim olsem, em i bin ron i go pas long olgeta manmeri long lukim Jisas i lusim taun Jeriko na i go long taun em i stap long en.
 Sakias i soim tru yumi long wei bilong painim Jisas insait long laip bilong yumi wanwan. Diwai i makim tok bilong en i stap long Baibel olsem rot bilong soim yumi Jisas.
 Sakias i ron i go pas i soim tru, wanem kain laik, bel na tingting em i gat long laip bilong

en long bikipela Jisas. Long save long Jisas, yumi wanwan yet i mas soim tru olgeta laik bilong yumi na taitim bun tru long save long em
 Saikais i go antap pinis long diwai na Jisas i kamap long rot Sakias i sindaun antap long diwai na tokim em long Jisas bai i stap long nait wantaim em.
 Yes, yumi i bihainim stretpela rot bai yumi inap painim Jisas.
 Sapos God i toktok long bel bilong yu orait beten bai God i soim yu nau rot i go stret.
**Philip Pais
 Vanimo, Sandaun Provins.**

Salim ol kam man i go bek long ples bilong ol

Dia Edita
 Mi wanpela man bilong Sandaun provins i laik sapatim pas bilong tupela brata ya em Dic Niu bilong Hagen na Jeffery Kat bilong Boana, Morobe provins.
 Tupela brata i toktok long rausim ol kam manmeri go bek long asples bilong ol bikos planti ol kainkain hevi na trabel i wok long kamap bikipela tru insait long ol taun na siti bilong yumi Papua Niugini.
 Mi laik tok tu olsem long sapatim pas bilong tupela brata ya olsem wankain pasin tu i wok long kamap bikipela long Vanimo taun.
 Ol wankain pasin bilong smukim ol spak brus o mariwana, brukim ol hasu na stil, pik poket na paitim man o meri nating long kisim samting. Ol dispela samting i wok long kamap bikipela tru bikos i gat ol kainkain manmeri i wok long

lusim asples bilong ol na hangamap nabaut long ol siti na taun.
 Yumi ken lukim na harim ol dispela hevi bilong lo na oda i bikipela tru. Mi laik yupela ol bikman bilong Lokol Level gavman na nesenel gavman i mas lukluk long dispela hevi long rausim ol kam manmeri i go bek long asples bilong ol na i mas putim tambu long ol manmeri i noken lusim asples na provins bilong ol na sindaun nambaut long ol setelemen long ol narapela taun na siti bilong yumi. Olgeta kam man mas go bek long ol papa na mama graun bilong ol em papa god i givim pinis yumi. Yu husat laik sapatim o egensim rait tasol long wantok.
**Amos Peter
 Vanimo**

Wok bung long kisim Ramu nikel/kobat main

Dia Edita
 Mi wanpela obseva insait long namba wan anuel jenerel miting bilong ol Hailens Pasifik long Mosbi long las wik Fraide. Insait long dispela anuel jenerel miting, mi bin harim planti gutpela toktok i kamap. Sampela ol toktok i kirapim bel bilong mi long raitim dispela pas i kam long Wantok niuspepa bai ol papagraun bilong Ramu nikel/kobat main i mas wok bung long larim dispela kampani i go het na mekim wok.
 Yumi laikim sevis na sapos gavman i no inap givim yumi sevis, larim ol kampani i kam insait na givim yumi sevis. Tru kampani i no gat rait long kam na mekim wok long graun bilong yumi sapos ol i no gat gutpela plen bilong givim yumi sevis. Olsem na long wankain taim yumi askim long sevis bilong ol kampani, mi laikim ol papagraun i mas bungim het wantaim na kamapim wanpela gutpela tingting bilong kisim sevis.
 Em tasol tingting bilong mi, na sapos yu husat i gat laik long sapatim mi orait rait i go long Wantok niuspepa bai mi ken ritim.

**David Karimbe
 Mosbi**

Tok bilong God i gat pawa long senisim laip

Dia Edita
 I TRU olsem planti manmeri i laik senisim laip bilong ol tasol ol i no save long wanem kain bai ol i senis na bihainim God.
 Dispela em i wanpela gutpela tingting bilong painimaut tru samting we yu ting inap helpim laip bilong yu long dispela graun na bihain taim tu.
 Jisas Kraiss wanpela tasol inap senisim laip bilong pipel.
 Yumi mas harim ol gutpela skul na bihainim ol skul na tok bilong God i stap long buk Baibel. Moa yet yumi mas go long lotu na bihainim ol skul tok yumi kisim long sios bilong yumi.
 Sapos yu i laik painimaut moa orait go long wanpela haus lotu ol i save bilip na autim tok long nem bilong Jisas Kraiss o go kisim moa skul long ol wokman bilong God insait long ol sios bilong yu. Bihainim Kraiss na bai yu kisim laip i stap gut oltaim.

**Philip Pais
 Vanimo SDP**

Brukim Aitape/ Lumi ilektoret

Dia Edita
 Mi i no amamas long mipela ol Lumi i stap aninit long Aitape olsem wanpela ilektoret. Nau yu no inap painim wanpela wokman bilong gavman olsem kiap long Lumi. Nogat olgeta. Na distrik opis long Lumi i stap nating.
 Olsem wanem mipela ol Lumi i gat liklik populesen o bikipela populesen? Mipela ol Lumi i gat bikipela namba bungim wantiam Yankok na Edwaki na kamapim ilektorate bilong mipela yet. Na tu planti ol gavman sevisesi save stap tasol long Aitape na Lumi i nogat.
 Mi askim Gavana John Tekwei wantaim ol bikman bilong provins na ol save man bilong Lumi long brukim boda bilong mipela long Aitape bipo yia 2002.
 Gavana bilong Sandaun i slip tumas na raun tumas long ovasis long wokim wok bilong fri tred zone long Vanimo na lus tingting olgeta long ol narapela distrik long wanem ol hevi bilong ol na wokim wok gut long helpim ol.
 Mi i no amamas long Lumi i go aninit wantaim Aitape olsem wanpela ilektoret. Larim Aitape bilong ol yet na mipela Lumi bilong mipela yet.

**Willie Towa
 Lumi**

TOKSAVE KAM LONG EDITA

Wantok i prinim nau let bilong ol manmeri wantaim potu we i soim klia pes bilong yupela. Olsem na yupela ken salim tu poto bilong yupela i kam long dispela adres.

**Painim Penpren, Wantok Niuspepa,
 P.O. Box 1982, Boroko, National
 Capital District.**

MUTRUS RAGBI LIG NIUS



Ol nupela tim bilong SP kap resis i soim stail

PETER MAIME i raitim

OL nupela tim resis insait long SP kap resis long dispela yia i soim gutpelastail bilong pilai. Planti olupela tim nau i pret pinis. Dispela i mekim na kompitisen bilong SP kap long dispela yia i nau wok long kamap strong moa long ol yia i go pinis.

Ol tim husat i nupela long dispela resis em Ramu Crushers, Central Lagatois, Enga Mioks, Kimbe Bulls na Waghi Tumbe. Ol olupela tim em Mendi Muruks, Hagen Eagles, Goroka Lahanis, Pom Vipers, Simbu Angras, lae Bombers na Rabaul Gurias.

Planti olupela tim nau i save go long fil wantaim dabol tingting taim ol i pilai wantaim wanpela

bilong ol dispela nupela tim. Long raun tu bilong 98 SP kap resis, Mioks i wilwilim Lahanis long Goroka. Dispela win i kirapim ai bilong olgeta manmeri husat i save bihain dispela Kap resis. Ol sapotas bilong Lahanis i no wanbel long dispela win bilong Mioks.

Long raun tri, ol Lagatois i nekim Lahanis gen long Mosbi. Dispela lus bilong Lahanis i mekim na menesmaen bilong ol Lahanis i bin toktok strong long rausim olgeta pilaias bilong ol. Long dispela raun tu gen, Crushers i bin rausim trasis bilong Angras long Dickson Oval long Kundiawa. Dispela win bilong Crushers i semim ol manmeri bilong Simbu husat i sapotim lokol tim bilong ol.

Long raun 4, Tumbe i bin

krugutim nek bilong Eagles long Minj. Long dispela taimol Eagles ino bilip olsem ol i lus long Tumbes. Mioks tu i bin pairapim Bombers long Wabag long dispela taim yet. Ol pipel bilong Enga husat i witnesim dispela gen i go bek long haus wantaim bikpela amamas.

Tumbe i bin kam daun long Mosbi na brukim sel bilong Lagatois nambawan taim long raun 5. Olgeta lain Jiwaka long Mosbi siti husat i go sapot long tim bilong ol i bin kisim draipela pilings stret, Bihain long dispela gem, ol sapotas i kalap i go long fil na apim ol pilaias na opisals bilong Tumbe.

Long las wiken, Crushers i amamas gen i bin pamim Gurias 22-12 long Ramu. Ol Crushers i amamas olsem ol inap long

winin wanpela olpeal tim na bikpela selebresim i bin kamap bihain long dispela gem. long wan kain taim, Lagatois ikaikai Vipers 24-22 long mosbi.

Bihain long raun 6, Eagles istap antap long poin leda wantaim 10 poin, Muruks, Vipers long 8, Angras, Tumbe long 7, Bombers, Mioks, Gurias 6, Lahanis, Lagatois, Crushers 4 na Bulls 2.

Long dispela Sande, Tube bai pilai wantaim Crushers long Banz, Mioks bai skelim bun wantaim Vipers long Wabag, Gurias bai skelim Muruks long Kokopo. Long arapela pilai, Lagatois bai bungim Bulls long Kimbe, Lahanis bai bihainim Hailens haiwe igo daun na sekan wantaim Bombers na Eaglesbai smelim Angras long Hagen.

Beklain i mekim win bilong Simbu Angras

FRANCO NEBAS i raitim

GUTPELA pilai long beklain i lukim ol Simbu Angras i winim sempion tim bilong

Hailens spia hiro Goroka Lahanis 24-20 long namba 6 raun bilong SP kap resisas Sande long Kundiawa.

Dispela win i lukim Angras nau i muv igo antap long namba 4 spot wantaim 7 poin na Lahanis istap long namba 9 spot wantaim 4 poin. Angras husat igat bikpela sapotas bikos long asples bilong ol ino givim sans long ol boi long Goroka we ol putim strongpela pilai long stat bilong gem igo pinis.

Long pes hap Angras igo pas long skoa wantaim 14 poin na Lahanis 10. John Kawage i skoa pas bilong Angras long pes 5 minit bilong gem taim em i brukim difens bilong Lahanis igo pundaun long trai lain. Em ken i wokim narapela gutpela brek igo insait long hap bilong ol Birua na setim Rodney Onguglo long putim seken trai bilong Angras na Randal Kaupa i putim namba tri trai namel long pos we kik igo insait kisim skoa bilong ol igo antap 14-0.

Tasol ol Lahanis i wok hat moa bipo long hap taim na lukim boi nogut ya Oliver John i skoarim pes trai bilong ol we kik tu igo insait daunim skoa olsem 6-14. Dispela trai mekim moa strong long Lahanis na ol i pilai moa hat we ol i skoarim na tu trai bilong long bringim skoa i sanap olsem 10-14 bihain long kik ino bin go insait. Skoa i sanap olsem we ol igo long brek.

Long seken hap Angras i kam bek strong wantaim sampela gutpela bal wok i lukim ken John Kawage skoarim namba tu trai bilong em we skoa igo moa antap 20-10.

Dispela trai i bin kamap long gutpela bal wok na bek hap bilong ol sped beklain bilong ol olsem, sentas Robert Ate, David Samuel, tupela wingas John Kawage, Charlie Ombie, 5/8 Randal kaupa na ful bek Jay Tu.

Kaupa husat i kisim man of the mes i bin givim het pen long ol difendas bilong Lahanis we em i skoarim tupela trai na setim wanpela trai. Lahanis lukim olsem ol bai lusim gem i pilai moa strong we ol i putim tupela trai tasol taim i sot na Angras i kamap wina 24-20.

Dispela win i lukim Angras i nau istap long namba 4 spot tasol ol gat bikpela wok yet istap. Long dispela sande bai ol wip wantaim Mt hagen Eagles, narapela wiken wantaim LBC Lae Bombers na flai igo long Kokopo wantaim Rabaul Gurias. Bihain wantaim Enga Mioks na Sentral lagatois long kundiawa. Dispela em 5 pela gem we ol i mas traim long win na ken stap insait long fainels.

Long arapela SP kap mets, Waghi Tumbe winim Enga Mioks 14-12, Ramu Crushers nekim Rabaul Gurias 22-12, Lagatois autim Vipers 24-22, Mendi Muruks bagarapim sindaun bilong Bombers 24-4 na Eagles kaikai Kimbe Bulls 40-22.



• Winga bilong Sentral Lagatois Keusi Tete i resis wantaim huka bilong Vipers Winnie Reset long kisim bal. Lagatois i win 24-20. Foto: Ivan Bayagau.

Ramu Crushers laik traim bilip bilong Waghi Tumbe

RAMU Crushers bai brukim bun wantaim Spear Wahgi Tumbe long Minj ragbi lig Oval long Sande. Dispela em namba 6 raun bilong SP kap resis we planti senis i bin kamap long poin leda na tu ol strongpela tim i pundaun long ol nupela tims.

Dispela i soim olsem olgeta tim wantaim i soim strong bilong ol long winin dispela kap wan-

taim wanem prais mani ol i putim.

Ol nupela tim olsem Tumbes, Crushers na Enga Mioks i semim planti olupela tim we igat ol bik-lain Kumuls. Maski ol i gat nem long pilai ragbi na wokim nem, ol nupela tim tu i laik ol i bagarapim dispela driman long pilai long ol bikpela pilai resis.

Tupela nupela tim Tumbe na Crushers ino gat ol biknem pilaias tasol

ragbi lig ino stat nau tasol olsem na bai tupela tim i yusim ol mangi long ples stret. Tumbe bihain long winim wanbus Mioks long tupela poin long raun 6 bai mekim olsem ol dispela win bilong ol igo, ino inap isi. Nau yet Tumbe igat 7 poin na em i sindaun long namba 4 ples na mas wok hat bikos planti ol tim tu i stap klostu long em.


Crushers tu i olsem Tumbe. Pes taim bilong

em long smelim SP kap resis we nogat ol biknem pilaias olsemol arapela nupela tim tasol ol i save bilip long ol yet olsem ol i ken wokim. Ol ino pilaim sampela biknem tim olsem Eagles, Vipers na Muruks yet tasol ol tim husat ol i pilaim ol i soim sampela han mak bilong ol olsem sapos ol i kam bek gen neks yia ol i mas lukaut. Ol bai ino inap pilai kaskas long ol.

SP CUP

SPOT THE BALL

COMPETITION



NAME: _____ SHIRT SIZE: _____

ADDRESS: _____ TELEPHONE: _____

2nd chance draw No correct winner this week

Indicate by 'x' where you believe the centre of the ball is. First correct entry will win. Judges decision is final. Fill in your details above and send to "SPOT THE BALL COMPETITION, C/- SP Holdings, Marketing Dept P.O. Box 6550, Boroko NCD." You could easily win these great supporters gear. One shirt and one cap.

* Employees of SP Holdings and the media are not eligible to enter this competition.



WIN THIS SP CUP GEAR!

Craft Works 8088d

pes 30

Me 14, 1998

WANTOK

1998 SP CUP COMEPTITION

Teams	P	W	D	L	F-	A	PTS
Eagles	6	5	-	1	165-	100	10
Muruks	6	4	-	2	145-	81	8
Vipers	6	4	-	2	176-	133	8
Angras	6	3	-	2	133-	117	7
Tumbe	6	3	1	2	112-	114	7
Bombers	6	3	-	3	143-	91	6
Gurias	6	3	-	3	113-	94	6
Gurias	6	3	-	3	118-	137	6
Lahanis	6	2	-	4	116-	120	4
Lagatois	6	2	-	4	113-	164	4
Crushers	6	2	-	4	100-	208	4
Bulls	6	1	-	5	83-	158	2

ROUND SIX RESULT

Tumbe 14 def Mioks 12
Crushers 22 def Gfurias 12
Lagatois 24 def Vipers 22
Muruks 24 def Bombers 4
Eagles 40 def Bulls 22

SROUND SEVEN DRAW (SUNDAY MAY 17)

Tumbe Crushers (Banz) Ref: J Siune.
Mioks vs Viprs (Wabag) Ref C. Balio
Gurias vs Muruks (Kokopo) Ref: A. Pu
Angras 24 def Lahanis 20
Bulls vs Lagatois (Kimbe) Ref: W Tukar
Bombers vs Lahanis (Lae) Ref: M Tolingling
Eagles vs Angras (Mt Hagen) Ref: S. Fareho

LAE RUGBY LEAGUE DRAWS SEASON PROPER ROUND 5 & SP ROUND 7

Saturday May 16

Outside ground

9.00 U/19 Defence vs Tigers
10.00 U/19 Brothers vs Royals
11.00 U/19 Panthers vs Tarangau
12.00 noon U/19 Spiders vs Magani

Sunday May 17

Outside ground

9.00 U/17 Panthers vs Tarangau
10.00 U/17 Spiders vs Magani

Inside ground

Saturday May 16

Inside ground

9.00 B Panthers vs Tarangau
10.20 B Spiders vs Magani
11.40 B Defence vs Tigers
1.00 B Brothers vs Royals
2.25 A Panthers vs Tarangau
4.00 A Spiders vs Magani

9.00 U/17 Defence vs Tigers

10.15 U/17 Brothers vs Royals

11.30 A Defence vs Tigers

1.15 A Brothers vs Royals

3.00 SP CUP Lae Bombers vs Goroka Lahanis

PORT MORESBY RUGBY LEAGUE

ROUND 8

LLOYD ROBSON OVAL

Saturday May 16, 1998

9.30 U/19 Souths vs Gerehu Utd
10.30 U/19 Paga vs West
12.00 Res Waliya vs Post Puma
1.30 Res Paga vs West

Sunday May 17, 1998

9.00 U/19 Waliya vs Post Puma
10.00 Res Souths vs Gerehu Utd
11.30 A Waliya vs Post Puma
1.00 A Souths vs Gerehu Utd
3.00 A Paga vs West

PORT MORESBY RUGBY LEAGUE

CLUB	P	W	D	L	F	A	P
Paga Panthers	7	7	0	0	222	133	14
Post Puma	7	6	0	1	168	115	12
Hawks	8	6	0	2	198	163	12
Defence	8	5	1	2	260	173	11
Royals	8	5	1	2	229	177	11
Tarangau	8	3	3	2	169	161	9
Gerehu United	7	4	0	3	175	154	8
Dobo Warriors	8	3	1	4	138	149	7
Kone Tigers	8	3	1	4	157	177	7
Magani	8	1	2	5	174	194	4
Souths	7	1	2	3	139	156	4
Brothers	8	0	1	7	109	193	3
West	7	0	0	7	156	272	0


- 2 Competition points deducted for fielding a suspended player
- 2 Competition awarded for successful appeal fielding a suspended player by Souths club.

Weekedng results: round 8

Tarangau 14 drew Dobo Warriors 14
Royals 23 Def Hawks 20
Defence 21 Def Brothers 20
Kone Tigers Def Magani 20

KIUNGA RUGBY LEAGUE POINTS LADDER A GRADE ROUND 2

Club	P	W	D	L	F	A	PTS	%
Waliya	2	2	-	-	52	8	4	87
Cowboys	2	2	-	-	73	22	4	77
Tigers	2	1	-	1	40	49	2	45
Raiders	2	-	-	2	10	38	0	21
Panthers	2	-	-	2	8	52	0	13
Hawks	2	-	-	2	0	54	0	0



SP kap tims bai pait hat long winim ol las gems

FRANCO NEBAS i raitim

SP kap kompitisen i wok long go strong moa olgeta wiken we ol tims wok long pait hat long stap insait long fainel 4 ples. Sampela bikpela wari i bin kamap pinis long sampela gems igo pinis wantaim ol nupela tims wok long bagarapim sindaun bilong ol namba wan tims bilong dispela kap resis.

Bihain long raun namba 6 las wiken leda i sanap olsem, las yia sempions Hagen Eagles i sindaun antap long namba wan spot wantaim 10 pions, Mendi Muruks, Pom Vipers 8, Simbu Angras, Waghi Tumbe 7, Lae Bombers Enga Mioks, Rabaul Gurias 6, Goroka Lahanis, Ramu Crushers 4 na Kimbe Bulls 2.

Dispela i soim olsem ol nupela senta tu i wok long pait hat stret long stap insait long dispela kap fainel we nogut bai las sans bilong ol bikos long next yia bai igat 8 pela tims tasol pilai insait long dispela kap resis.

Ol tims olsem, Mioks, Tumbe, Crushers na Lagatois i soim pinis ol lapun tim bilong dispela resis olsem ol tu ken pilai insait long dispela bikpela resis bihain long sampela gems bilong ol wantaim ol dispela olpela tims we ol i autim tiket bilong ol.

Long dispela raun 7 bilong SP kap resis, bai i paia stret wantaim strongpela salens long olgeta tim bikos ol i

mas winim dispela ol las gems bilong ol long stap insait long fainels o nogut bai ol i popaia. Bihain long dispela raun bai igat las 5 pela gem istap bipo long gren fainel.

Long Banz Oval, Tumbe bai kisim Crushers we ol mangi long asples bai igat bikpela sapot long as graun bilong ol. Tumbe i stap namba 5 long leda na Crushers seken las. Dispela gem bai pulim planti sapotas bilong Tumbe i kam witnessim. Gem bai stap namel long tupela sait wantaim we husat i wokim liklik asua bai winim dispela gem.

Mioks bai kisim Vipers tu long as graun bilong ol yet we bai strongpela pilai bai kamap. Mioks i bin lus long Tumbe na Vipers long Lagatois las wiken we tupela bai traim long pait long bekim dispela lus. Mioks bai i orait liklik long wanem long asples bilong ol tasol ol vipers tu em ol hap stail mangi tu ya. Sapos ol papa graun i krangi bai sinek bai kaikaim ol.

Bombers husat i kamap namba tu ples long las yia i stap long mak bilong aut long dispela resis sapos ol ino wokim gut long dispela gem na las 5 gems. Ol bai kisim Lahanis long Lae yet we i luk olsem bai ol i autim tiket bilong Lahanis. Tasol nokenting ol apo bai pilai isi long ol. Ol tu wok long kam bek nau na Bombers mas lukautnogut bai ol i bagarapim sindaun long asples graun na sapotas bai ronowe nabaut.

Tumbe autim Mioks long tu poin

ROBERT BOMA i raitim

WAGHI Tumbe i winim namba tri gem bilong ol taim ol i autim Enga Mioks 14-12 long Banz ragbi lig oval las wik.

Dispela pilai i bin kamap gut tru, tasol ol lain asples Tumbe i yusim ol sapot na winim dispela gem ya.

Ten minit long pilai, kepten Paul Minape bilong Mioks i no westim taim na putim namba wan trai. Nisan Pakistan i kikim konversen na skoa i go antap 6-0.

Tumbe i bekim trai na skoa i sanap long 6-6.

Tasol ol lain asples i abrusim ol Tumbe na putim wanpela trai na skoa

i sanap 10-6 Dispela skoa i sanap na tupela tim i go long malolo long hap-taim.

Long namba tu hap, Mioks i putim wanpela trai taim Pakistan i brukim difens bilong Tumbe na putim trai aninit stret long gol pos. Dispela i helpim Mioks long abrusim skoa bilong Tumbe 12-10.

Tumbe i lukim olsem taim i wok long pinis nau, ol i salim ol bikpela fowat bilong ol olsem Malcolm Nombri, Frank Kaman, James Koronam na Ben Otto long brukim difens bilong Mioks.

Ol i wokim dispela kain pilai i go na Ma Wus i putim wanpela trai. Dispela trai em i las poin bilong dispela gem.

• Faiv et bilong Paga na Lagatois Tuksy Karu bai kisim strongpela salens i kam long Valerian Hakeria. Karu i takolim Raphael Mua bilong Vipers.

Skulbois ragbi bai stat gen long Mosbi

POT MOSBI Skulbois Ragbi Lig kompetisen bai stat long dispela wik Sarere. Olgeta pilai bai kamap long PRL oval 1 na PRL oval 2.

Vais presiden bilong skulbois ragbi lig Jerry Karavi i tok olsem planti ol komyniti skul na haikul i soim pinis laik long stap insait long dispela kompetisen.

Kavari i tok ol i laik makim 1998 olse ya bilong senis. Ol nupela eksekutiv bai wok strong long traim painim sponsa long mekim ol dispela wok ya.

On nupela opisal em Robin Lavuru, tresera em Steven Tandale, sekretari em Tora Ivora.

Karavi i tok skul bois em i as bilong kamapim gutpela sinia tim.

Em i tok em i amamas tru olsem planti ol skulboi pilai nau i pilai long A gret kompetisen. Sampela bilong ol dispela pilai em Godfrey Luke (Royals), Roysiro Waburi (Souths) na Raphael Kora (Dobo Warriors).

Ol skul i givim nem Hohola Demonstresen, Badihagwa, Evadahana, Laloki, Pot Mosbi Intanesenel Haikul, Boreboa, Bavaroko, Morata, Holy Rosary, Morata, Koki, Boroko Secondary, Gerehu, Coronation, St Thresea, Sogera, Kilakila, Sevese Morea, Philip Aravure, Waigani, Tokarara, Mainohana (Bereina)

Paga Panthers i sainim Kumul faiv et Valerian Hakeria

PAGA PANTHERS long Mosbi i wok long sainim planti ol gutpela pilai long A gret tim long dispela yia.

Long dispela wik tasol Valerian Hakeria, em i faiv et bilong Kumul i sainim nem wantaim ol boi Panthers. Em bai poroman Ravu Tala na Norris Selu long kamapim gutpela pilai long skram.

Nau yet Vipers tu i nogut gutpela namba 6, olsem na Valerian bai guria nogut sapos em i joinim Vipers bihain long wanpela o tupela gem.

Valeria i save pilai long Buka Ragbi lig we i save kamapim wanpela planti ol gutpela pilai.

Vipers i lus tupela taim pinis, na i gutpela bai ol i ken kisim Valeria long kamap namba 6 na lusim yangpela Brian Gul long riserv bens.

Hakeria em i mekim bilong 1996 PNG tim long Wol Nains long Fiji we ol i bin kamap nambe tu.

Dispela wiken kosa Robert Jakis na Joe

Katsir bai traim em long pilai long dispela wiken egens Wests.

Wests i kisim liklik sponsa long Mutrus na i luk olsem dispela bai helpim ol long kamapim gutpela pilai tru egens long Paga Panthers.

Dispela pilai bai kamap gut tru ya. Long fowat Paga i gat James Yali, Samson Numapo, Michael Marum na Leonard Tarum long go pas long ol pilai. Na long beklain, kepten yet Norris Selu, Ravu Tala, Nick Andy em wanpela pilai we ol selekta bilong Vipers i mas tingting long kisim em nau na fulbek Mondo.

Ol lain Wests i nogut ol pilai. Ol i wok long strong long Joshua Kouoru, Manso Oa na John Taropa long winim gem.

Insait long arapela gem, Post Pumas bai soim nupela yunifom taim ol i bungim Waliya. Ol boi Daru i mas was gut bikos ol boi Telikom i no laik pilai kaskas long Sande.

Menesa Alex Tondopa i tok kosa John

Kuma i wok long trenim ol pilai na ol bai redi long nekim ol Waliya.

Long beklain Puma i gat Meli Muga, Joe Mainde, Chris Cajefan, Theo Sambe, olpela pilai bilong Bombers Samson Tamean. Na long fowat Francis Wani, John Clement na Takai Siwi bai go pas.

Wani em wanpela olpela pilai bilong Kwinlens Skulbois long Australia, na Siwi em olpela pilai bilong Kundiawa Warriors. Tasol nau ol i joinim Post Puma long Mosbi Ragbi Lig resis ya.

Long sait bilong Waliya, Michael Toivita bai go pas long ol boi Daru ya.

Post Puma i sindaun namba tu long poin lata na Paga Panthers i ran long namba wan poin. Dispela gem em bilong skelim strong bilong ol

Poin lata em Paga 14, Post Puma 12, Hawks 12, Defence 11, Royals 11, Tarangau 9, Gerehu United 8, Dobo Warriors 7, Kone Tigers 7, Magani 4, Souths 4, Brothers 3, Wests 0.

MUTRUS

RAGBI LIG NIUS



Bombers mas panim gutpela beklain

BUSTIN ANZU i raitim

LBC LAE Bombers igat bikpela hevi yet long beklain bilong em, Sapos ol i laik winim dispela las 5 gems na stap insait long fainels ol i mas traim stretim beklain bilong ol.

Kosa Steve Malum sapos ino was gut long ol mangi bilong kol ples ol bai rausim bom bilong ol na tu daunim ol igo moa yet daun long poin leda.

Mendi Muruks i rausim bom bilong Bombers 24-4 long Mendi

na tu ol Lahanis i lus long han bilong ol wanbus Simbu Angras 24-22. Long poin leda nau yet em Bombers i sanap long namba 6 na Lahanis long 9 ples.

Bombers wantaim nupela kosa Malum, ol i ting olsem ol bai winim olgeta tim isi tru bikos kosa i gat planti ekspirens, tasol olsem wanem na ol i wok long lus, i mas gat sampela hevi namel long tim. Bikpela samting ol i mas panim nau em gutpela beklain, planti taim ol i save ronim bal tasol ol i nogat gem plen na ol birua i save bagarapim ol.

Ekspirens em wanpela samting tu we ol tim opisol i mas luksave. Fulbek Robert Sio em wanpela tasol we em ino inap mekim mejik, i mas gat sampela olpela pilaias insait insait tu long helpim em. Ol fowets em olgeta resa mangi tasol.

Long dispelaSande sapos ol i laik stap insait long fainel 4 orait ol i mas painim gutpela beklain na usim ol gem plen na noken sanap longlong na pilaim bal olsem fowet.

Tupela Josephs, Gilbert na Darby (ino brata) long hap bek na 5/8 i mas singautim bal long huka David Gilipu long yusim gem plen na tu long setim ful-

bek Robet Sio na winga Philip Erike. Sio na Erike em tupela strongpela pilaiia we sapos ol i givim bal gut tru bai tupela i painim spes long skoarim trai.

Ol fowets, Peter Dai, Wilby Brown, Lucas Daniel na Andrew Norman mas pairapim banis bilong Lahanis olgeta taim ol i kisim bal olsem ol i bin wokim long Ramu Crushers.

Lahanis long narapela sait i laik bai win tu na strongim ron bilong ol insait long dispela resis. Ol opisol bilong Lahanis nau i stap antap long tait wara

long wanem ol i lusim planti gem pinis.

Ol i gat pilaias husat i gat stail bilong ol yet olsem Mathew Midi, Joe Ambane na Ivan Mosaka na tu ol foma kumuls olsem John Markam, Yer Bon bai strongim franlain taim Fatty Buka, David Buko, Paul Makeso na Oliver John bai wokim gem plen bilong ol long beklain.

Tupela tim wantaim i gat wankain o lstrong long pilai. Ol fowets na beklain i wankain tasol wanem tim i wokim gem plen bilong em bai winim dispela gem.



• Marcus Bai i pilai strong long daunim skoa bilong tim bilong em Melbourne Storms. Dispela piksa i soim taim Storms i salensim Parramatta.

Bai
daunim skoa
bilong Storm
wantaim
gutpela takol.

TIM bilong Marcus Bai long Nesenel Ragbi Lig long Australia, Melbourne Storm i lus long asples bilong ol 18-14 long St George las wik.

Moa long 13,250 ol sapota i bin kamap long Olympic Pak long lukim dispela pilai namel long Storm na Dragons.

Skoa bilong St George inap long go antap tasol Bai i mekim tupela gutpela takol long stapim ol pilaiia long skorim trai. Sapos em i no stap, sori tumas, Skoa bai sanap olsem long 30 ya.

Winga bilong St George Nathan Blacklock i skorim tupela trai taim em i katim wanpela pas na kisim bal na ranawe na putim trai. Dispela tupela trai i bin kamap long namba wan hap bilong pilai long strongim sans bilong St George long win.

Olpela senta bilong Newcastle tasol nau joinim St George Jamie Ainscough i putim wanpela taim we i mekim ol Storm i hatwok tru ya. Melbourne Storm i gat planti sans tasol gutpela

takol bilong ol St George i no givim spes long ol ya.

Ol poin bilong Storm i kamap long riserv pilaiia Danny Williams and Russel Bawaden na Craig Smith i kikim ol konversen. Kosa bilong Dragon David Waite i amamas long tupela poin. Referi Bill Harrigan i givim 12-pela penalti long St George long kamapim ol paul pilai na 5-pela tasol i go long Melbourne Storm.

Kosa bilong Melbourne Chris Anderson i tokaut olsem ol pilaiia


bilong em i guria liklik olsem na em i no pilai gut.

Anderson i tok nau em i lainim dispela asua na bai traim long noken mekim wankain asua long ol gem i kamap bihain.

Sapos ol rita i laik save moa, nem bilong Bai i no kamap moa long top trai skora. Bikos long tupela gem i go pinis, em i no putim wanpela trai. Skoa bilong em i sanap yet long 4-pela trai tasol.


MUTRUS

Ragbi Lig Nius



Liklik toksave!

Prais bilong Wantok niuspepa 50t tasol!



WANTOK

NIUSPEPA BILONG YUMI OL PAPUA NUIGINI STRET!

Word Publishing Company Pty. Ltd. P.O. Box 1982, BOROKO, NCD.
Telephone: 325 2500 - Fax: 325 2579 - email : word@global.net.pg



Tubusereia gren fainel • Antap: Sempion tim bilong Tubusereia gren fainel, Lavara Broncos. Aninit lephan: Ol yangpela sapota bilong Broncos i bilas gut tru long sapatim tim bilong ol ya. Aninit raithan: Tupela susa ya Taita Reid na Avia Reid i sapatim Tigers tim bilong tupela long Tubusereia gren fainel. Tigers i winim birua tim Raiders 1-0. Aninit tru lephan: Ol yanpela susa bilong Tubusereia i save sapatim Lavara Broncos. Lavara i autim Dimana long gren fainel las wik 13-6. Ol poto: Joe Ivaharia.





• Rait han: Pilaia bilong POMIS i train long hetim bal egens long Korobosea. Ol POMIS i no laki tumas ya na lus.



POT MOSBI WIKEN SPOT EKSEN

• Lephon: Smok balus bilong Vipers Robert Volu i painim hat stret long brukim banis bilong Central Lagatois. Aninit: Lok bilong Central Lagatois Steven Soki i kisim taim Name Osei i takolim em ya. Huka Winnie Reset (lephan) i redi tasol long pinisim win bilong Soki. Tim bilong Soki i win 24-22. Ol poto: Ivan Bayagau.



• Lephon: Dispela kain stail i wok long kukim Bisini ya. Olsem na sapos yu nogat wan-pela samting plis, kamap na lukim soka long dispela wiken. Raithan: Tupela susa ya Tabitha Suwae na Judith Michael i mekim save long kaikai ya. Tupela i memba bilong Pot Mosbi tim husat i pinis namba tu long Sydney Womens Spots Festival. Poto: Ivan Bayagau na Franco Nebas.



Posman amamas long ol meri Mosbi

OLPELA nesenel soka kosa Kisakiu Posman i tok i gat bikipela rum yet we soka i ken kamap gut na strong. Em i autim dispela toktok long wanpela welkam pati bilong ol meri Mosbi husat i bin pilai long Sidni Wimens Spot Fesitval las mun.

Wok bilong soka na developmen i ken kamap gut sapos i gat ol eksperiens kosa husat i gat save long teknik bilong soka. Dispela bai helpim tru wok bilong soka insait long kantri ya.

Dispela wokabaut bilong ol meri em long helpim ol i redi long Wol Kap kwalifaia tonamen long Auckland, Nu Silan long

mun Oktoba. Dispela tonamen i pulim ol tim i kam long Australia, Nu Silan, Fiji, Solomon Ailan, Westen Samoa, Cook Ailan na Papua Niugini.

Posman i strong long i mas gutpela kosing program long helpim ol kosa bilong man na meri. Dispela em i wanpela bikipela asua we PNG nau yet i no gat na dispela tasol i save mekim na stendad bilong soka long kantri i go daun tru.

Posman i mekim bikipela tok amamas long ol meri na tok soka bilong ol meri i wok long go fowat.

Em i tok planti bai sapatim em olsem soka i stap long taim na i gat bikipela rot i stap yet long mekim soka i kamap gutpela.

Mosbi tim i bin stap long fainel wantaim Nu Saut Wels Institut tim na lus 3-0. Tasol i wilwilim ol arapela tim bilong Australia ya.

Olpela kosa tu i mekim bikipela tok amamas i go long ol lain husat i sapatim wokabaut bilong ol meri Mosbi NCDC, Cellnet, Solomon Airlines, PNGFA na PMSA.

Nupela presiden bilong PMSA Dr Malai Kuam i toktok amamas long gutpela win bilong ol meri.

PMAS makim ol skwat bilong nesenel sempionsip

POT MOSBI Soka Asosiesen i makim pinis trening skwat bilong man na meri bilong nesenel sempionsip long Kwins Betde wiken.

Dispela sempionsip bai kamap long Wabag na Lae. Ol meri bai kik long Wabag na ol man long Lae.

PMSA i askim tu wanwan klap long givim nem bilong 4-pela pilaia long stap insait long developmen skwat. Ol klap i mas givim nem bilong wanem ol pilaia ol i gat long PMSA opis long Me 15.

Sempionsip bilong ol man bai kamap long Jun. Tasol kik bilong ol meri bai kamap long Ogas 2.

Nem bilong ol pilaia em (man) Willie Bera, Abiang Kera, Panui Karol, Beno Luluai, Joe Aisa, Dur Yarawi, Taku Niebo, Batman Furigi, Roy Karang, Geoffrey Emang, Francis Moiyap, Steven Mune, Hans

Gewabing, Wesley Waiwai, Steven Mali, Kila Babaga, Selau Elizah, Robert N'Dramoi, David Kaepapa, Nasa WAnghu-Andiki, Brian Tani, Peter Gabe, Tarzan Tutua, Jimmy Korei, Kila Launch Taupe Heai

wimens: Geraldine Eka, Cathy Davani, Loana Mave, Miriam Lanta, Riita James, Christain Holland, Tabitha Suwae, Cathy Salaiiau, Annette Kora, Margaret Luluai, Fiona Wakes, Judith Michael, Julie Alau, Ikanau Matangiau, Pheobe Rarabun, Nelly Taman, Rikie Jonathan, Lyna Waho, Sherol Marsipal, and Josephine Waiwai.

Olgeta pilaia nem bilong ol i stap hia i mas kamap long pilai graun long kisim trening program bilong ol.

Bikipela astingting bilong nupela eksekutiv em long winim taitel we Lahi i holim.



Tripela pilaia bilong Central Lagatois i bungim Raphael Mua bilong Vipers. Vipers lus 24-22.

Spiders lainim Royals long pilai

BUSTIN ANZU i raitim
LAE Bisket Spiders i soim ol Motoris disaun senta (MDC) Royals long pilai ragbi long las wik Sarere long Lae Ragbi Lig pilai graun.
O mangi bilong Is Taraka i mekim gut ol plisman 20-6 na tu lainim ol long rul na wei bilong pilai ragbi. Ol plisman

i konarism ol gut tu insait long long pes hap we skoa i sanap 4-4. Tasol long nekim hap, Royals i no inap holim ol Spiders na larim ol putim trai.
Royals wantaim dispela Kumul, Bombers na Lahanis forwet Andrew Kuna na narapela olpela Lahanis senta Agi Tete i no inap tru soim kala bilong tupela. Spiders i bagarapim gutpela

gem plen bilong ol aninit long lukaut bilong seken rowa Paul Gela na Timothy Peterson long beklain.
Hapbek Lawrence Tackayo i kikim tuepla penalti gol na ol i lid 4 nil insait long pes hap. Tasol Royals i les long ol i karim kiau olsem na insait senta Elizah Atewao i putim wanpela trai long kona i bringim skoa i go antap 4-4 i go inap

hap taim.
Long seken hap, ol plisman i kisim wanpela penalti na ol i go pas 6-4. I no long taim Patterson i putim wanpela trai klostu long gol pus na ol i lid 10-6. Ol Spiders i aplaim presa ol plisman na ol holim wanpela skram insait long 22 mita mak bilong ol 5/8 Tete i kisim bal na laik rausim tasol Enock Ruwand Kongo i kisim dispela bal na pundaun

antap long trailain. Dispela i kisim skoa go longwe long ol plisman.
Royals i taitim olgeta bun na kambek taosl ol i no inap, kepten Andrew Ame ra lok Sepsy kar i soim tru kala taosl ol Spaidamen i was gut long ol. 5/8 Jeffrey Bagasel i mas tu maindim ol beklain gut tru. Mekim i go na luka Tom Kongo i putim las trai na ol i win 20-6.

Babaka autim tiket bilong kumuls long Pom soka

BABAKA long Sande i autim tiket bilong Blue Kumuls 3-2 long primia divisen bilong Pot Mosbi soka asosien kompitisen long Bisini Oval. Kumuls husat i lukluklong namba tu win bilong ol i no strong tumas na Babaka i winim ol.

Babaka i skoa pas insait long pes 10 minits bilong gem taim Ernest Kila i pasim wanpela gutpela bal igo long Jimmy Manau husat i no gat difenda makim em i kisim wanpela pawaful kik long brukim umben bilong ol polisman. Dispela gol i mekim Kumuls i kirap nogut na ol i wok long traim hat long bekim dispela gol.

Nasa Wangu husat i pilai long fowats i traim hat long levelim skoa tasol ol kik kamap long em ino gutpela tumas igo autsait long gol maus. Kumuls ino les yet, ol i wok long traim hat yet we wanpela kona kik i kamap i lukim Fidelis Gabe sutim bal igo insait long gol mak taim swipa bilong Babaka Vela Kini i no hariap long rausim bal insait long penalti eria. Brain Tani i kisim dispela kik.

Biahain long dispela gol, ol polisman i haraip tasol long strongim difens bilong ol na kontrolim gem we ol birua i wok long kamap wantaim planti trabel, tasol ol i no was gut na mekim rong na Babaka kamap wantaim wanpela penalti. Kila Kila i kisim dispela kik na putim skoa bilong ol igo antap 2-1 long hap taim.

Ol Polisman i kam bek moa strong long seken hap na mekim Babaka kamap wantaim planti rong long eria bilong ol. Dispela i kamapim wanpela penalti bihain long wanpela difenda i han bal long penalti eria. Wangu Andiki i kisim dispela penalti tasol lek bilong em ino pas gut long bal na igo autsait long gol maus.

Nogat mani long helpim hailens soka asosien skwat

FRANCO NEBAS i raitim

HAILENS soka asosien i wok long painim moni yet long helpim soka skwat bilong ol long wokim trening kemp long NSI Goroka.

Seketiri bilong hailens soka asosien Dimirit Mileng i tokim Wantok olsem, ol i bin makim pinis tupela tim bilong man na meri long kamap long trening kemp long NSI.

Ol i bin makim skwat ya long Hailens soka sempionsip long Enga las mun we ol i tok bai tok-save long dispela ol pilai istap long skwat bai kamap long trening long NSI long Goroka.

Bihain long dispela kemp long Goroka bai ol i makim fainel skwat long karim nem bilong Hailens long go salensim ol arapela sentas long kantri.

Ol i laik traime dispela tingting wantaim Lahi soka asosien long Lae pastaim we bai ol i salens long tripela mets olsem ragbi lig stat op origin.

Toktok i bin go gut wantaim ol opisal bilong Lahi soka asosien we ol i tok orait tasol long dispela tingting. Long wanem i gutpela long ol olsem em bai lid ap gems bilong redim skwat bilong ol long pilai long Nesenol taitels long LFA long kwins b/dei wiken long mun June.

Ol Lahi i redi pinis, tasol i gat hevi long Hailens olsem ino gat moni long redim tim bilong ol na



• Soka eksen namel long Hoods na Abau long Mosbi soka resis. Abau win 3-0. Foto: Ivan Bayagau.

tu lukautim Lahi taim ol i kam pilai antap long Goroka.

Bikpela wari bilong ol nau em long painim sponsa long helpim ol long redim tim bilong ol.

Mileng i salim askim igo long bisnis haus long Goroka na arapela Hailens sentas long kamap wantaim helpim long redim soka tim bilong Hailens long pilai soka.

Planti manmeri long Hailens tu i save bihanim soka olsem ragbi lig na saposigat gutpela sponsa ating Hailens tu bai wokim nem long soka na ino long ragbi tasol.

Long arapela soka nius, lokal kompitisen long Goroka i no stat yet bikos long ol klabs husat i soim laik long pilai ino hariap long stretim afilesen fi bilong ol.

Ol opisal i givim dispela wik fraide long ol peim fi bilong ol o bai ino nap gat kompitisen long dispela yia.

Goroka soka asosien tasol em ino statim sison bilong em yet we ol arapela sentas i statim pinis i stap nau long namba 3 or 4 gem bilong pes raun. Ol klab husat i soim laik long pilai em, Murat, Telikom, Guria, Seigu Elcom, Goroka united, Morobe United, Tarangau, IMR Rapatona, Kalibobo, Lynx na Bridgestone.

Afilasen fi i sanap olsem K500, long wanwan klab. Mileng i tok sapos ol i peim fi long dispela Fraide bai kompitisen bai kik op long Sarere.

Dispela bai luk olsem Goroka bai ino inap pilai long Nesenol taitels long June.

Wok redi long Supa Lig na nesenel sempionsip

WOK REDI bilong tupela bikpela sempionsip bilong netbal, Nesenel Sempionsip na Supa Lig i wok long go het.

Mausmeri bilong Ogenaising Komiti long Goroka we Supa Lig bai kamap, Kate Karpenter i tok komiti bilong em i salim pinis olgeta rejistresen fom i go long wanwan asosiesen.

Em i tok i gat 14 asosiesen i memba bilong nesenel bodi, PNG Netbal Federesen. Tasol nau yet City Pharmacy long Goroka na Yunaited long Alotau tasol i givim nem long stap long Supa Lig.

Difendin sempion Telstars long Mosbi i no givim het nem long dispela bikpela tonamen. Tonamen ya bai kamap long Remembrance Day long Jun5-6.

Karpenter i askim ol primia klap long wanwan asosiesen long givim nem kwik bipo long de bilong kisim nem i pas long Me 22. Nesenel championsip bai kamap long Remembrance De long Julai 16-20.


Wanwan klap long Goroka i kisim wok pinis long lukautim ol tim i kam pilai long Isten Hailens.

Ripot long Nesenel sempionsip, Jill Laka i tok ol i redim pinis olgeta samting. Olgeta gem bai kamap long Sir Ignatius Kilage stedium.

Wantok i no inap kisim moa toktok bilong em bikos i gat sampela asua long telepon ya.



NATIONAL HEART FOUNDATION OF PAPUA NEW GUINEA INC



SMOK KEN KILIM YU

!! Stop Nau !!

Na statim gutpela nupela laip

Dispela toksave i kamaut na kisim sapot bilong moni i kam long National Heart Foundation of Papua New Guinea. Ol i putim aut dispela toksave long interes bilong pablik lewa helt.

PO Box 158, Mt Hagen, Western Highlands Province.
Telepon namba 542 2199 Feks namba 542 2384.

Pukpuk ragbi long komuniti skuls

BUSTIN ANZU i raitim

EIT PELA komuniti skuls insait long Lae siti bai kisim ragbi Yunion long pilai long olgeta Sarere stat long neks mun.


Dispela spots program em wnapela nupela kain pilai insait long ol skul bilong siti. Dispela pilai em wankain olsem pilai tas ragbi tasol aninit long rul bilong ragbi yunion.

Ol dispela skuls i bin holim wnapela trail pilai long Februari long dispela yia na em i bin kamap gut tru. Nau ol i laik staim dispela pilai long neks mun. Dispela pilai ol i kolim Coca Cola pikinini pgoram Kondineta bilong Pukpuk Ragbi Robin Tarere i tok ol i bin statim lon gol hai skuls long dispela mun pinis na nau ol i holim bilong ol komuniti skuls.

Ol skuls husait bai pilai insait long dispela em Taraka, Ambu Demonstresen, Hunonville, Gantom, St Martins, Butibum Igam Bareks na Lowa Appa kommuniti skuls.

"Dispela pukpuk ragbi aninit long Coca Cola program em bilong lainim ol pikinini taim ol liklik yet long luksave long we bilong pilai ragbi. Na tu long pasin bal, takolim ol man, karim bal na ron na ol nara-pela rul bilong pilai ragbi.

Sapotas kalb bilong ragbi union long Morobe (scrum) bai sponsorim dispela program. Scrum i bin ronim ol wantaim program 2-pela yia i go pinis olsem na ol i amamas long kamapim dispela program gen.



Bros bilong man o?

• Pilaia bilong Adau Yellow Pages i kalap stapim bal long bros egensim pilaia bilong Hoods long Mosbi soka resis las wiken insait long primia divisen. Adau win 3-0..

Guria autim tiket bilong Telikom long Lahi soka

FRANCO NEBAS i raitim

GURIA i autim tiket bilong Telikom long Lahi soka asosisen primia wan kompitisen 2-1 long las Sande. Guria kam bek long seken hap long skoarim tupela gol bihainlong Telikom i holim ol wantaim nogat gol long pes hap.

Pes hap bilong gem i lukim bal istap wantaim Telikom planti taim we ol i wok long brukim difens igo insait long ples birua tasol ol kik ol i kisim ino gutpela we i lukim kipa i savim na sampela igo long sait.

Ol beklain na midfil bilong Telikom i soim gutpela stail pilai bilong ol we planti taimol i wok long tanim difens igo long atek tasol ino save makim gut long pairapim umben bilong ol Guria.

Abia Abia, Lawrence, na tupela wing bilong ol Amos Puy na John Bal Yagum i putim strongpela pilai stret wantaim helpim kam long beklain Yanding Tomda na Chris Bafui.

Dispela i mekim ol Guria i panim hat long brukim difens na i skoa long pes hap.

Long pes 15 minits bilong seken hap i lukim Guria i wok long holim bal planti taim we i wok long go insait long hap birua mekim ol yangpela Telikom i anda presa.

Long dispela pilai bilong Guria i lukim ol kisim kona kik we ol telefon boi i no was gut long ol taim straika Yakam Kipu sutim bal igo insait long umben. Dispela i bin wanpela gutpela kik stret Kipu kisim long brukim kiau.

Telikom i no wari long dispela gol tasol wok long traim hat yet long stretim dispela gol tasol ol lapun bilong

Guria i save yet na putim strongpela banis we ol birua ino inap long brukim. Hans Fred, Peter Paliwa, Alwin Nema na David Banap i putim blok long olgeta hap we ol tarangu Telikom i panim 6 rot.

Ino long Guria i lukim wanpela gutpela sans long apim skoa igo antap 2-0. Gol ya i bin kamap long narapela straika bilong Guria Steven Yalu taim ol Telikom i wok long faul istap long gol mak bilong ol na baga ross ya i isi tasol lukim net i pairap.

Taim tu wok long sot na ol telefon bois ino laik long karim kiau olsem na i wok long pait hat yet igo klostu long gol maus bilong Guria. Ino long taim gutpela pilai kamap long John Bal i lukim em putim wanpela gol bilong ol Telikom.

Ol traim long putim namba tu tasol ino inap, long wanem ol Guria i wok long pilai difens na strongim kona bilong ol long noken lukim Telikom sutim narapela gol longmekim ol dro. Dispela i lukim ol Guria kamap wina wantaim 2-1 long ful taim.

Keptan bilong Telikom Gidix Nasa husat ino bin pilai bikos long sik i tokim wantok olsem ol mangi bilong em i bin putim gutpela pilai stret givim liklik het pen long ol Guria. Em i tok, "ol bois i bin gat planti sans long skoarim gol tasol ino mekim use long pes hap bilong gem, dispela i lukim Guria i kisim sans long em na skoarim tupela gol ya tasol nogat em gutpela gem.

Long arapela gems, Cellnet Sobou rausim Lae Biscuit 4-1, Defence rausim Rapatona 3-2, Unitech forfeit Sikambu na Asiawe holim Dazzale Morobe United

VOICE mail

Available in
NCD.....Coming
Soon to Lae
& Mt. Hagen!

TELIKOM'S NEW AND EXCITING SERVICE

For as little as **K2** per month you can have a phone answering system and voice message storing and retrieving service at your convenience.

HOW VOICEMAIL WORKS.




When your telephone is busy on a call or an in-coming call to your phone is not answered after some rings **VOICEMAIL** automatically answers the call. The caller is asked to leave message after the tone, just like an answering machine.

For more information, contact Telikom Marketing Division
P.O Box 291 Waigani, NCD.
Phone: **300 5562** Or **300 5567**.



TELIKOM PNG
Now we're really talking!

WANTOK SPOT



Kosa i hatim Kwinslen selekta long abrusim Adrian Lam

HENRY MORABANG i raitim

BIKPELA tok pait nau i kamap long Nesenel Ragbi Lig long Australia long watpo na olupela kepten bilong PNG Kumul na hapbek, Adrian Lam i no stap insait long skwat bilong Kwinslen.

Dispela Kwinslen skwat bai bungim Nu Saut Wels long namba wan stet ov orijin long Me 22, neks wik Fraide.

Kosa bilong Adrian Lam, Phil Gould i autim tok kros bilong em long ol selekta bilong Kwinslen long i no makim Lam bikos ol i makim Allan Langer. Gould i tok taim Langer i stap hapbek, Kwinslen Maroons i no winim wanpela Stet ov Orijin gem. Tasol taim Lam i kamap, ol Kwinslen i win 3-0. Dispela i soim olsem Lam i mas kamap hapbek bilong Kwinslen na i no Langer.

Bipo em Wally Lewis. Taim ol selekta i makim ol pilaia, namba 7 jesi em ol selekta i no save fasol bikos kela Wally yet i papa long dispela jesi i nap em i ritaia long 1991. Allan Langer i kisim ples tasol Kwinslen i no win liklik.

Dispela em i wankain taim Gould tu i kamap kosa bilong Nu Saut Wels.


Kosa bilong Sydney City Roosters i tok i luk olsem kosa bilong Kwinslen Wayne Bennett i wok long makim ol pilaia bilong em tasol. Long tim bilong Kwinslen, i gat 11-pela Brisbane Broncos pilaia olgeta. I gat 5-pela pilaia bilong Kwinslen i memba bilong skwat bilong tim i winim Nu Saut Wels 3-0.

Planti ol saveman bilong ragbi lig i sutim tok long ol selekta i wansait long sait bilong Supa Lig na i no bihainim gut wok selekta.

Gould i kros nogut tru long ol selekta i no makim Lam long sindaun long inta sens bens bikos em i bin helpim tim bilong em long autim Brisbane Broncos 26-12 las wik Sande long ANZ stedium. "Kwinslen i no winim wanpela stet ov origin taim Langer i hap bek stat long 1991. "Ol i win taim Adrian Lam i stap hap bek long olgeta tripela gem, na ol i win 3-0.

Olpela kosa Paul Vautin tu i no amamas long ol selekta i abrusim Adrian Lam na fulbek Robbie O'Davis.

• **Lukim stori bilong Marcus Bai long pes 32**



Resis bilong Kwinlens hapbek posisen...

• **Planti save man i ting Allan Langer (antap) i stilim namba 7 jesi bilong Adrian Lam long raithan.**



Davani i redi long nupela salens

NUPELA kosa John Davani i redi tasol long kisim nupela salens olsem nesenel soka kosa bilong Papua Niugini. Davani i kisim ples bilong Richard Nagai.

Wantok i toktok wantaim Davani long Brisbane, Australia, las wik na painimaut olsem em i amamas tru long kisim dispela wok.

Em i tok olsem em i no aplai long kosa long sinia men nesenel kosa, nogat, em i laikim wok bilong junia. Tasol ol PNGFA i luksave long gutpela save bilong em long soka na askim em long kamap kosa. Davani i tok bikpela wok em long painim ol nupela pilaia long putim ol insait long nesenel skwat. PNG i gat bikpela salens tru em long difendim Melanesian Kap em i winim long Eae long 1996. Nupela kosa i tok em wantaim tim menesmen bilong em bai holim yet olupela Melanesian Kap skwat na tu makim nupela ol pilaia.

Davani i tok PNGFA long wanpela eksekutyut miting long Trinde tupela wik i go pinis i makim olupela kosa olsem tim menesa na teknikel opisal bilong PNG tim long go kik long Melanesian Kap long Vanuatu. Olpela menesa Philip Parkop i kamap asisten menesa.

PNGFA i oraitim tu Posman na Joe Turia olsem asisten kosa long redim nesenel tim bilong Melanesian Kap. Davani i tok 4-pela pilaia em i gat long tingting long kisim na joinim skwat em Reginald Davani, pikinini bilong em yet, Lawrence Drake na Richard Hilli. Dispela ol tripela pilaia i save pilai long Fouxex League, em i profesenel soka kompetisen insait long Brisbane.

Reg na Lawrence i save pilai long Ipswich Knight na Richard Hilly em i save pilai long Taringa Rowers. Richard i bin pilai long Ipswich Knight las yia tasol em i transfe i go long Rowers long bigin bilong dispela yia.

Arapela pilaia em Andrew Lepani na David Aua. Aua nau i skul long Yunivesiti long Lae na i save pilai long Sobou wantaim biknem pilaia Richard Daniel. Davani bai kambek long PNG long mun Jun. Em bai i gat tripela mun tasol long tren wantaim ol pilaia go stap insait long Melanesian Kap soka resis long Septemba long Vanuatu.

Olpela kosa Richard Nagai i tok amamas i go long John Davani long kamap olsem nupela nesenel soka kosa. Nagai i tok em i nogat wanpela belhevi long Davani. Na em yet i amamas long sotpela taim em i stap hetkosa bilong PNG na winim Melanesian Kap. PNG i bin stap insait long planti Melanesian Kap na i no win liklik. Em i save pinis namba tu na namba tri tasol, long 1996, em i winim dispela Kap ya. Siaman bilong PNGFA Kosing Kaunsil Edris Kumbuwah i askim olgeta soka sapota long givim sapot long nupela kosa.

Kumbuwah i tok Davani em rait man long kisim wok bikos planti ol sinia kosa long kantri i no aplai long kisim wok kosa. Davani yet i laik lukautim junia tasol taim i nogat man long sinia kosa, PNGFA i askim sapos em i ken kisim wok bilong sinia kosa o nogat.

Kumbuwah i tok Davani i gat gutpela save long planti ol pilaia long nesenel tim na i gutpela long em i ken holim wok. I tru em i stap long Brisbane, Australia, tasol em i save toktok yet wantaim planti man long PNG bikos em i bilong hia.

Stet ov Orijin

KWINSLEN MAROONS

DARREN LOCKYER - Brisbane
WENDALL SAILOR - Brisbane
STEVE RENOUF - Brisbane
DARREN SMITH - Brisbane
MATT SING - Sydney City
KEVIN WALTERS - Brisbane
ALLAN LANGER - Brisbane
PETER RYAN - Brisbane
JASON SMITH - Parramatta
GARY LARSON - Norths Sydney
GORDON TALLIS - Brisbane
JASON HETHERINGTON - Canterbury
BRAD THORN - Brisbane
Riserv - Shane Webcke - Brisbane, Wayne Batrim - St George, Ben Ikin - North Sydney, Tonie Carrol - Brisbane

NU SAUT WELS BLUES

YIM BRASHER - S/ Sydney
ANDREW ETTINGHAUSEN - Cronulla
TERRY HILL - Manly
PAUL MACGREGOR - Gold Coast Charger
ADAM MacDOUGALL - Newcastle
LAURIE DALEY - Canberra
ANDREW JOHNS - N/ Knights
BRAD FITLER - S/City Roosters
NIK KOSEF - Manly
DEAN PAY - Parramatta
PAUL HARRAGON - N/ Knights
GEOFF TOOVEY - Manly
RODNEY HOWE - M/Storm
Riserv - Ken MacGuinness - Western Suburb, Mathew Johns - Newcastle Knights, Steve Menzies - Manly, David Barnhill - St George



IT'S THE SP CUP THE NO1 GAME



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.